



JORNAL

do

Parlamento Nacional

VI. LEGISLATURA

1.ª SESSÃO LEGISLATIVA (2023-2028)

REUNIÃO PLENÁRIA DE 18 DE JULHO DE 2023

Presidente: Ex.^{ma} Sr.^a Maria Fernanda Lay

Vice-Presidentes: Ex.^{mos} Srs. Maria Teresinha da Silva Viegas e
Alexandrino Afonso Nunes

Secretária: Ex.^{ma} Sr.^a Virgínia Ana Belo

Vice-Secretárias: Ex.^{ma} Sr.^a Bendita Moniz Magno

SUMÁRIO

Sr.^a Presidente loka sessão plenária ne'e iha tuku 8 liu minuto 56 dadeer.

Antes da Ordem do Dia – Sr.^a Presidente halo leitura ba agenda, hafoin ne'e, convida Sr. Primeiro-Ministro ho nia elenco governamental atubele hola fatin iha bancada Governo nian. Tuirmai, Sr.^a Presidente husu ba Sr.^a Secretária da Mesa, Virgínia

Ana Belo, atu halo leitura ba pedido substituição temporária husi Sr.^a Deputada Nurima Ribeiro Alkatiri ba fali Sr.^a Deputada Verónica Fernandes, tuir lista candidatura número 24 Comissão Nacional das Eleições nian.

Ordem do Dia – Apreciação do Programa do IX Governo Constitucional.

Sr. Deputado no Sr.^a Deputada sira-ne'ebé halo intervenção mak hanesan Sr. Aniceto Longinhos Guterres Lopes (FRETILIN), Sr.^a Maria Angelina Lopes Sarmiento (PLP), Sr.^a Olinda Guterres (KHUNTO), Sr.^a Cristina Yuri Rebelo dos S. Costa (FRETILIN), Sr. Joaquim dos Santos «Boraluli» (FRETILIN), Sr. Luís Roberto da Silva (KHUNTO), Sr.^a Maria Angélica Rangel da C. dos Reis (FRETILIN), Sr.^a Cedelízia Faria dos Santos (CNRT), Sr. Gabriel Soares (CNRT), Sr.^a Veneranda E. M.

Lemos Martins (CNRT), Sr. Natalino dos Santos (CNRT), Sr. Patrocínio Fernandes dos Reis (CNRT), Sr. António da Conceição «Kalohan» (PD), Sr. Antoninho Bianco (FRETILIN), Sr. Marcos Soares (CNRT), Sr. Romeu Moisés (CNRT), Sr.^a Maria Gorumali Barreto (CNRT) no Sr. David Dias Ximenes «Mandati» (FRETILIN).

Sr.^a Presidente taka sessão plenária ne'e iha tuku 16 liu minuto 37.

Sr.^a **Presidente** (Maria Fernanda Lay): — Sr. Deputado sira, ha'u husu favor ida hola fatin para ita hahú tanba ita iha ona quórum de funcionamento. Nune'e, permite ha'u atu hahú ita-nia sessão plenária ohin dadeer.

Horas hatudu tuku 8 liu minuto 56 dadeer.

Ita-nia Plenária ohin dadeer, reunião plenária de terça-feira, 18 de julho de 2023, iha 9h00 abertura, iha Período de Antes da Ordem do Dia ita la iha buat ida, no Período da Ordem do Dia maka ita-nia apreciação do Programa do IX Governo Constitucional.

Maibé, permite ha'u cumprimenta Excelentíssimo Sr. Primeiro-Ministro, membros do IX Governo Constitucional, distintos Deputados no audiência tomak mak ha'u respeita, bom dia.

Molok ita tama ba iha sessão principal ba apreciação do Programa do IX Governo Constitucional, permite, iha pedido de substituição temporária husi bancada FRETILIN nian.

Sr.^a Secretária, halo favor lê.

Sr.^a **Secretária da Mesa** (Virgínia Ana Belo): — Obrigada, Sr.^a Presidente.

Bom dia ba Ita-Boot, ba Sr. Primeiro-Ministro ho elenco governamental no colega Deputado sira hotu.

«Excelentíssima Senhora Presidente do Parlamento Nacional,

Sr.^a Maria Fernanda Lay.

Excelência,

Na sequência do pedido de substituição da Sr.^a Deputada Nurima Ribeiro Alkatiri, a Bancada da FRETILIN vem solicitar a Vossa Excelência, a sua substituição temporária pela Senhora Deputada Verónica Fernandes, candidata número 24 da lista da Comissão Nacional das Eleições, a partir do dia 17 de julho até 17 de agosto de 2023, nos termos dos n.ºs 1 e 2 do artigo 5.º e n.º 1 do artigo 9.º da Lei n.º 5/2004, de 5 de maio, sobre o Estatuto dos Deputados, e ainda o n.º 1 do artigo 5.º do Regimento do Parlamento Nacional.

Sem mais outros assuntos de momento, aproveito a endereçar a Vossa Excelência os meus melhores cumprimentos.

Díli, 13 de julho de 2023

Aniceto Longuinhos Guterres Lopes,

O Presidente da Bancada da FRETILIN»

«Requerimento de justificação antecipada de faltas e pedido de substituição temporária.

Nurima Ribeiro Alkatiri, Deputada ao Parlamento Nacional, pertencente à Bancada da FRETILIN, pretendendo ausentar-se por mais de três dias consecutivos por motivo de trabalho político, vem requerer a Vossa Excelência a justificação antecipada das faltas e a sua substituição temporária pelo candidato não eleito que se lhe seguir na respetiva lista, o que faz nos termos e para os efeitos previstos nos artigos 4.º, alínea a), 5.º e 9.º, n.º 1, da Lei n.º 5/2004 do Estatuto dos Deputados, de 5 de maio, artigo 15.º da Lei n.º 6/2006, de 28 de dezembro da Lei Eleitoral para o Parlamento Nacional, e artigo 5.º do Regimento do Parlamento Nacional.

Díli, 13 de julho de 2023

A Deputada, Nurima Ribeiro Alkatiri.

O Presidente da Bancada da FRETILIN,
Aniceto Guterres Lopes»

«Excelentíssima Sr.ª Presidente do Parlamento Nacional,
Sr.ª Maria Fernanda Lay,

Excelência,

Eu, Verónica Fernandes, candidato n.º 24 da lista da Comissão Nacional das Eleições, venho por este meio informar a Vossa Excelência que aceito substituir a Senhora Deputada Nurima Ribeiro Alkatiri, nos termos dos n.ºs 1 e 2 do artigo 5.º e n.º 1 do artigo 9.º da Lei n.º 5/2004, de 5 de maio de 2004, do Estatuto dos Deputados, e ainda do n.º 1 do artigo 5.º do Regimento do Parlamento Nacional.

Sem mais outros assuntos de momento, aproveito endereçar a Vossa Excelência os meus melhores cumprimentos.

Verónica Fernandes, a Deputada.»

Obrigada Sr.ª Presidente.

Sr.ª **Presidente:** — Muito obrigada, Sr.ª Secretária.

Hodi nune'e, ha'u convida Sr.ª Deputada Verónica Fernandes atu hola fatin.

Técnico sira informa katak Senhora Deputada seidauk to'o iha fatin.

Sr.ª **Presidente:** — Seidauk mai? La iha buat ida.

Sr. Primeiro-Ministro ho Srs. membros do IX Governo, ami convida Ita-Boot sira atu hola fatin iha bancada oin nian.

Se nune'e, Sr. Primeiro-Ministro, ita bele hein lai uitoan tan até as bancadas preencherem, está bem? Ita husu tempo uitoan tan lai para bele preenche tiha hotu cadeiras mak ita hahú efetivamente.

Muito obrigado.

Sr.^a Secretária, halo favor halo leitura ba guião ita-nian ohin dadeer. Halo favor.

Sr.^a **Secretária da Mesa** (Virgínia Ana Belo): — Obrigada, Sr.^a Presidente.

«Apreciação do Programa do IX Governo Constitucional.

Debate.

1. O documento de onde consta o Programa do Governo é apresentado pelo Primeiro-Ministro e distribuído a todos os Deputados no dia 12 de julho de 2023.

2. A primeira reunião plenária para apreciar o Programa do Governo tem lugar em 18 de julho de 2023.

3. O debate não pode exceder cinco dias consecutivos, ocorrendo as duas reuniões plenárias seguintes nos dias 19 e 20 de julho de 2023.

4. Durante o debate, as reuniões plenárias, com início às 9h00, não têm Período de Antes da Ordem do Dia.

5. O debate inicia-se no dia 17 de julho de 2023, com uma apresentação do Primeiro-Ministro, que dispõe para o efeito o tempo máximo de 40 minutos, podendo a Mesa conceder-lhe, caso necessário, algum tempo adicional.

6. Segue-se um período de perguntas e respostas, dispondo as bancadas parlamentares, para cada dia de debate, dos tempos globais fixados em minutos, na seguinte grelha:

- Governo – 195 minutos
- Bancada do CNRT – 93 minutos
- Bancada da FRETILIN – 57 minutos
- Bancada do PD – 18 minutos
- Bancada de KHUNTO – 15 minutos
- Bancada do PLP – 12 minutos.

Total, 390 minutos.

7. Os tempos globais atribuídos a cada uma das bancadas parlamentares e ao Governo para cada dia de debate são geridos pelos próprios, descontando-se o tempo que cada Deputado gastar no tempo total da respetiva bancada e de cada membro do Governo no tempo global atribuído ao Governo.

8. Nenhuma intervenção terá duração superior a 10 minutos, procurando a Mesa conceder alternadamente a palavra, de acordo com as inscrições que for registando às diferentes bancadas parlamentares e ao Governo.

9. As bancadas parlamentares podem ceder parcelas de tempo umas às outras e ao Governo, e este às bancadas, desde que a cedência seja anunciada de viva voz pela direção da bancada cedente ou pelo Primeiro-Ministro, no caso de se tratar do Governo.

10. O tempo gasto na utilização das figuras regimentais do ponto de ordem e da defesa de honra e consideração não é descontado nos tempos globais determinados no ponto 6 do presente guião.

11. A Mesa gere o uso da palavra de acordo com as disposições regimentais.

12. O debate termina em cada dia quando não houver mais pedidos de palavra ou estiverem esgotados os tempos globais atribuídos, podendo a Mesa determinar, caso se justifique, no último dia de debate, a atribuição de tempos adicionais a cada uma das bancadas parlamentares e ao Governo.

13. No final do debate, a Mesa dá palavra aos líderes das bancadas parlamentares e ao Primeiro-Ministro para, querendo proferirem uma declaração final pelo tempo máximo de 10 minutos moção de rejeição ou voto de confiança.

14. Até ao encerramento do debate, pode qualquer bancada parlamentar apresentar moção de rejeição do Programa do Governo ou o Governo solicitar a aprovação de um voto de confiança.

15. Até a sua votação, qualquer moção de rejeição do Programa do Governo ou voto de confiança apresentado pode ser retirado.

16. A aprovação de uma moção de rejeição do Programa do Governo exige maioria absoluta dos Deputados em efetividade de funções.

17. As moções de rejeição do Programa do Governo e voto de confiança eventualmente apresentados são votados começando pelas moções de rejeição pela ordem de apresentação e terminando no voto de confiança, caso tenha sido apresentado.

18. A Presidente do Parlamento Nacional comunica o resultado ao Presidente da República, conforme o caso para os efeitos previstos na alínea g) do artigo 86.º e na alínea e) do n.º 1 do artigo 112.º da Constituição.».

Obrigada, Sr.^a Presidente.

Sr.^a **Presidente**: — Tuirmai, ita ba kedas guião ponto n.º 5, Primeiro-Ministro que dispõe para o efeito o tempo máximo de 40 minutos.

Halo favor, Sr. Primeiro-Ministro.

Sr. **Primeiro-Ministro** (Kay Rala Xanana Gusmão): — Obrigado, Presidente do Parlamento.

Sua Excelência Sr.^a Presidente do Parlamento Nacional, Suas Excelências Vice-Presidentes do Parlamento Nacional, Suas Excelências Senhoras no Senhores Deputados, Senhoras no Senhores membros do Governo, Senhoras no Senhores, bom dia ba Ita-Boot sira hotu.

Uluknanain ha'u hakarak agradece ba privilégio ne'ebé povo Timor fó mai ha'u hodi dala ida tan hetan oportunidade atu mai iha Magna Casa ida-ne'e, hamutuk ho distintos Deputados atu debate kona-ba futuro País ne'e nian iha tina lima mai ne'e.

Iha 12 de setembro de 2012, bainhira ha'u mai apresenta Programa V Governo Constitucional nian, ha'u dehan nune'e: «Ita hotu iha consciência kona-ba necessidade ne'ebé prioritárias ba Nação no kona-ba dificuldades ne'ebé timoroan sira enfrenta loroloron. Ne'e la'ós katak falta de qualidade husi ita-nia povo mak limita tiha ita-nia desenvolvimento, maibé tanba falta de oportunidades».

Infelizmente, tinan 11 liu tiha, oportunidade sira-ne'e seidak mosu ba ita-nia povo, povo ne'ebé continua moris ho dificuldades. Pior liután, iha tinan neen ikus mai no foin liubá, ita assiste ka haree katak iha retrocesso ka hakiduk ba Estado de direito democrático, nune'e desenvolvimento no crescimento económico parado hela hodi fó impactos diretos ba população. Tanba ne'e, debate no apreciação ba programa ne'ebé IX Governo Constitucional lori mai, labele sai hanesan formalidade constitucional ida.

Ami husu voto de confiança ba Executivo ida-ne'e, ne'ebé qualificado no experiente no hakarak hatuur fali regras de boa governação, de transparência, de eficiência no eficácia atu ita hotu bele lori Timor-Leste ba buat ne'ebé ita mehi kedas iha tempos difíceis luta nian.

Ha'u la bele promete milagres, nune'e mós ha'u la bele dehan katak sei mosu progressos ne'ebé imediatos ba desenvolvimento nacional. Maibé ha'u bele promete katak hahalok sira-ne'ebé ita hotu haree iha tinan-tinan kotuk sira-ne'e, hanesan inércia, ineficiência no irregularidades lubuk ida, buat sira-ne'e hotu sei la halo parte iha estrutura equipa governamental ida-ne'e.

Senhores Deputados, ferik no mós katuas sira, inan no aman sira, jovens Nação ida-ne'e nian, ita hotu hatene katak liberdade la'ós moris iha kiak laran no lakon tiha esperança. Liberdade ida-ne'ebé ita hotu uluk mehi mak la'ós de'it moris iha paz no segurança nia laran, maibé atu hetan acesso ba saúde, educação, ba justiça no ba emprego, ne'e hotu katak atu moris di'ak, maibé mós liberdade ita mak tem que conquista. La iha plano estratégico ida ka programa do Governo ne'ebé bele implementa ho de'it esforço exclusivo husi ema ida ka husi instituição ida. Loos katak cabe ka pertence ba Executivo responsabilidade ne'ebé boot atu traça plano sira-ne'e no atu executa, maibé esforço sira-ne'e precisa envolvimento husi cidadão hotu-hotu.

Ha'u compreende katak ita-nia povo kolen tiha ona no sente dificuldade atu fiar ba promessas no ba compromissos políticos ne'ebé povo rona beibeik tiha ona tinan ruanulu resin ida nia laran. Ha'u mós compreende katak iha duni desilusão ka desapontamento, maibé ha'u tem que dehan filafali katak ita-nia Estado sei jovem hela, no tanba ne'e duni sei Estado frágil ida.

Tanba ne'e hotu ha'u husu, dala ida tan, buat importante tebes ida husi cidadãos hotu-hotu: confiança. Confiança katak ita bele mantém paz social, ita bele hadi'a justiça no ita bele consolida

instituições do Estado. Ne'e hotu nu'udar pilares fundamentais atu atrai investimentos hodi nune'e desenvolve ita-nia setor económico no social husi dalan ne'ebé sustentável.

Ho buat ne'e hotu, ha'u-nia primeiro repto, que é pedido no apelo, sei ba claro, la'ós de'it ba ha'u-nia Governo rasik, maibé mós ba órgãos de soberania hotu-hotu, ba sociedade civil no ba timorenses hotu-hotu: Mai, ita hotu, hakuak causa nacional foun ida-ne'e! Mai hamutuk ita luta ba ita-nia Estado de direito democrático ho kilat ne'ebé naran vontade atu serbisu, ho kilat musan husi participação ativa no construtiva ida que di'ak, hamutuk ho hanoin no visão ida de'it kona-ba liberdade no desenvolvimento, no katak visão ida-ne'e la pertence ba IX Governo Constitucional, maibé pertence ba povo de Timor. Haree tuir katak Constituição da República Democrática de Timor-Leste ne'ebé rege ka regula ita-nia Estado de direito democrático, Constituição ne'e la pertence ba Presidente da República ka ba Governo ou pertence ba membros Parlamento Nacional, Constituição ne'e pertence ba timoroan hotu. Timoroan sira foin daudaun iha eleições hodi usa sira-nia direito legítimo fó-sai momoos mensagem ida-ne'e. Timoroan sira dala ida tan fó mai ita hotu lição kona-ba cultura democrática. Agora, ita ne'ebé temi nu'udar governantes tem que buka apreende lição ida-ne'e hodi hala'o ita-nia knaar ho responsabilidade atu cumpre ita-nia missão.

Tuirmai, ha'u sei apresenta conjunto de compromissos Governo ida-ne'e nian ba Ita-Boot sira-nia apreciação no debate ho hanoin katak futuro hahú ohin, nune'e ami hakarak katak agenda atu implementa iha país sai resultado husi diálogo participativo no construtivo.

Senhora Presidente do Parlamento Nacional, Vice-Presidentes do Parlamento Nacional, Senhoras no Senhores Deputados, Programa IX Governo Constitucional nian ba período entre 2023-2028 kaer hamutuk compromissos principais neen:

Primeiro – Reafirma Estado de direito democrático.

Ami sei corrige irregularidades hotu ne'ebé governação anterior hamosu hodi halakon tiha sistema ne'ebé iha kona-ba boa governação, transparência no, liuliu, responsabilidade financeira no administrativa. Ne'e inclui atu halo reformas ne'ebé estruturantes hodi acelera mudança ne'ebé necessário iha setores ne'ebé la fó resposta ne'ebé di'ak no ho tempo ba sociedade timorense, hodi nune'e investe ba melhoria instituições Estado, katak iha ninia sistemas, ninia processos no ninia metodologias, hodi nune'e hetan capacidade atu lori desenvolvimento sustentável no inclusivo.

Ami sei revê legislação hotu-hotu no ninia regulamentação tanba ida-ne'e necessário ba consolidação do Estado, liuliu:

- Lei ne'ebé cria RAEOA no ZEESM, atu garante iha duni separação de poderes entre entidades rua ne'e hodi estabelece autoridade foun ida iha Região de Oe-Cusse Ambeno no sei halo total reestruturação ba pessoal;

• Lei ne'ebé cria tiha município de Ataúro, tanba conceito RAEOA tem que continua inclui Ataúro no mós tanba condições infraestruturas no técnicas sei mínimo liu atu Ataúro bele separa an autonomamente husi RAEOA;

- Lei da Organização Judiciária;
- Lei da Câmara de Contas;
- Estatuto dos Magistrados Judiciais, Estatuto do Ministério Público no Estatuto da Defensoria Pública, ne'ebé foin daudaun mak aprova;

• Quadro legal ba instituições e setores da segurança interna no mós proteção civil, inclui mós legislação rodoviária no Lei ba Artes Marciais;

• Regime legal ba setor financeiro hodi revoga tiha legislação ne'ebé la atualizado ona mas nafatin em vigor;

• Lei do Orçamento e Gestão Financeira no Regime de Aprovisionamento e Contratos Públicos, hodi neinek hadi'a tiha sistema de contabilidade do Estado husi «*cash basis system*» ba fali «*accrual basis system*»;

- Lei Tributária atu introduz Imposto de Valor Acrescentado;
- Legislação hotu-hotu ne'ebé existente ba combate a corrupção;
- Lei da Pensão Vitalícia atu regime ida-ne'e bele integra iha regime de segurança social contributivo kona-ba pensões ba membro foun iha órgãos de soberania;

• Legislação ne'ebé regulamenta Lei de Base do Plano Nacional de Ordenamento do Território ne'ebé foin hetan aprovação;

• Quadro jurídico ba organização no funcionamento Autoridade Municipal sira-nian no Administrações Municipais hodi fó continuidade ba estratégia atu ba descentralização administrativa no mós aproveita atu aprova regulamentação kona-ba Lei do Poder Local no Descentralização Administrativa, Lei Eleitoral Municipal, no Lei ba Finanças Municipais.

Iha loron 120 mai ne'e ami mós sei loke auditoria imediata ba RAEOA no ZEESM, nune'e mós auditoria ba instituições do Estado seluk, hanesan Tribunal de Contas, Comissão Anti Corrupção, Ministério Público, Comissão da Função Pública, Inspeção Geral do Estado, no ba órgãos da administração eleitoral, inclui mós auditoria ba negócios ka contratos ne'ebé anterior Governo halo iha ona final do mandato.

Ita la bele ko'alia kona-ba Estado de direito se ita la temi mós justiça, no, Estado de direito só bele iha bainhira justiça kaer nia surik ho habilidade hanesan bainhira sukat ka tetu iha balança justiça nian.

IX Governo considera hanesan prioridade boot ida atu fó atenção tomak ba setor de justiça atu nune'e justiça bele hala'o ho maior profissionalismo, seriedade no transparência. Ho nafatin objetivo atu reafirma ka consolida Estado de direito democrático, ami sei revê ho kle'an Plano Estratégico de

Desenvolvimento ne'ebé halo tiha ona revisão, mas boot liu fali ida uluk, liuhusi consulta ne'ebé permanente ho sociedade civil hodi atualiza tiha plano ne'e atubele reflete ho di'ak estado atual Nação nian.

Plano ida-ne'e mós sei continua tau atenção ba desenvolvimento iha capital social, iha infraestruturas no iha economia, hodi acelera diversificação económica no criação de emprego ka serviço iha país.

Desafio boot ida, maibé sai mós nu'udar ita-nia oportunidade ne'ebé boot tebes mak ita-nia população jovem aumenta ba beibeik. Ita tem que buka estratégia ne'ebé di'ak atu capitaliza recursos ne'ebé importante ne'e.

Kona-ba exploração recursos energéticos país nian, ita hakarak sai husi maldição dos recursos hodi aposta ba juventude. Iha processo ne'e, hatutan recursos naturais no recursos humanos jovens mak sei mosu progresso ba Nação. Nune'e husi setores diversificação económica ne'ebé tradicionais ka baibain, sei haree ba setor Costa Sul nu'udar centro petrolífero regional projeto Tasi Mane, iha-ne'ebé Governo ida-ne'e sei halo buat hotu-hotu tanba sei fó efeitos multiplicadores ba municípios hotu-hotu.

Implementação ba Tratado das Fronteiras Marítimas entre Timor-Leste ho Austrália iha Tasi Timor sai nu'udar prioritária ba Executivo ida-ne'e, hanesan mós atu lori cadoras exploração *Greater Sunrise* nian mai costa sul de Timor-Leste no, atu garante eficiência boot liu iha setor ida-ne'e, ami sei halo reestruturação imediata iha direção Timor Gap E.P. no ANPM.

Ikusliu, nu'udar parte integrante ba construção do Estado no Nação, no tanba ita hakarak harii Estado ho pleno direito, ami sei fó prioridade máxima atu finaliza delimitação de fronteiras terrestres no marítimas ho Indonésia.

Segundo compromisso – Desenvolve capital social.

Nação justa no desenvolvida, Nação ne'ebé garante acesso ba saúde no educação ho qualidade no mós Nação ida-ne'ebé combate desigualdade no promove inclusão liuhusi cria oportunidades ba ema hotu independentemente husi género, idade, fatin hela ba, região, condição social ka económica, no mós husi orientação sexual.

Husi tinan 2007 to'o tinan 2017, Governo ida iha tempo ne'ebá fó prioridade boot ba promoção iha justiça social.

Ita hotu hatene katak iha prazo ne'ebé naruk atu fó educação no formação de qualidade no tan atu cria oportunidades de emprego maka sei sai hanesan instrumentos ne'ebé fundamentais atu sai husi mokit no kiak.

Atu ne'e hotu bele acontece, Estado ninia dever maka assegura katak Combatentes da Libertação Nacional ne'ebé simu sacrifícios barak iha funu, feto sira no labarik sira, husi ne'ebé sei

hamosu sucesso ba desenvolvimento sustentável, nune'e mós famílias kiak no mukit sira, ferik ho katuas sira no cidadãos seluk ne'ebé vulneráveis, hanesan sira-ne'ebé portadores de deficiência, bele hetan acesso atu hatán ba sira-nia necessidades básicas no moris di'ak.

Tan ne'e, Governo sei continua fó apoio ba população hodi desenvolve daudauk ninia políticas no cria estratégias atu reduz população ninia dependência ba Estado.

Ami sei, liuliu:

- Consolida implementação ba Estratégia Nacional de Proteção Social no ba Lei do Regime Geral da Segurança Social, atu garante proteção ba cidadãos ne'ebé moris iha situação difícil ka vulnerável;

- Consolida Instituto Nacional de Segurança Social no Fundo de Reserva da Segurança Social, hodi bele gere Sistema de Segurança Social ho independência, transparência, eficácia no eficiência, inclui regimes contributivos ho não-contributivos;

- Aprova Lei de Bases de Proteção Social;

- Revê no avalia documentos legislativos no operacionais ba Pensão Social no ba Programa Bolsa da Mãe Geração Foun;

- Loke tan centros de solidariedade social, ne'ebé iha ona municípios, ba postos administrativos hotu-hotu, hadi'a serviços de atendimento social, liuhosi centros de solidariedade social no hadi'a Programa de Apoio ba Instituições de Solidariedade Social;

- Hadi'a Centro Nacional de Reabilitação atubele fó assistência di'ak liu no tratamento ba portadores de deficiência no loke centro ne'e ba município sira;

- Cria oportunidades de negócios ba feto sira-ne'ebé iha situação de vulnerabilidade ho objetivo atu assegura sira-nia independência económica;

- Garante igualdade de oportunidades ba feto sira no continua implementa questões ne'ebé sensíveis ba género iha setores hotu-hotu governação nian;

- Assegura katak labarik-feto sira iha idade escolar tem que completa ensino básico no buka previne katak feto-oan sira, bainhira halo ona maioridade, tinan 18, husik hela escola;

- Continua implementa Plano de Ação Nacional Contra Violência Baseada no Género no promove campanhas contra violência doméstica

Segundo compromisso – Desenvolve capital social. ;

- Apoia idoso sira, liuliu no ho urgência ba sira ho idade superior a 70 anos;

- Cria centros de atendimento ba idosos iha município sira hotu no buka hala'o programas de tempos livres no terapia ocupacional ba ferik ho katuas sira;

- Estimula ka dudu criação negócios auto-sustentáveis ba cidadãos portadores de deficiência, hodi investe mós iha equipamentos no acessibilidade ba equipamentos iha instituições públicas;

- Desenvolve programas de apoio la'ós de'it ba portadores de deficiência, maibé mós ba famílias no comunidades ne'ebé tau matan ba pessoas portadores de deficiência;
- Melhora mecanismos de socorro no assistência ba vítimas de desastres naturais, inclui assistência alimentar, construção de infraestruturas no distribuição materiais de construção no mós materiais ba armazenamento;
- Continua promove reconhecimento oficial no apoio ba Veteranos no Combatentes da Libertação Nacional no ba sira-nia famílias;
- Estuda viabilidade atu cria Fundo dos Veteranos no apoia criação Banco Comercial ho verbas husi Fundo de Investimento dos Veteranos.

Ha'u temi ona katak ita-nia jovem sira mak sai hanesan rico-soin ida ba ita-nia Nação, la'ós de'it katak sira mak iha poder atu transforma País ne'e, hanesan mós sira mak sei sai Nação nia futuros líderes.

Governo sei investe iha Política Nacional de Juventude ne'ebé sei garante ação coordenada, hodi lori ba desenvolvimento no autonomia jovem sira-nian, sei desenvolve hanoin ida-ne'e liuhosi investimento ne'ebé responsável liu iha áreas desporto no cultura tanba área rua ne'e mak sai nu'udar instrumentos importantes atu desenvolve competências cívicas, sociais no liderança, no promove jovem sira bele iha ocupação hodi contribui ba paz social.

Atu jovem sira bele conhece sira-nia passado, bele fó honra ba loron ohin nian no atu valoriza sira-nia futuro rasik, sei buka conclui investigação rigorosa kona-ba História da Luta da Libertação Nacional, atubele promove mós divulgação kona-ba História Contemporânea de Timor-Leste.

Nafatin iha área da Cultura, Governo hakarak cria no apoia Associação de Arte e Cultura Timorense, atu encoraja jovens talentosos iha artes no cultura, bele reafirma identidade nacional no lori ba conhecimento internacional.

Sei haree atu kaer filafali projeto sira uluk ba construção Museu no Centro Cultural iha Díli no atu melhora la'ós de'it quadro jurídico ne'ebé liga ba cultura, hanesan mós atu investe iha equipamentos no iniciativas culturais.

Distintos Deputados, Senhoras no Senhores, ita la bele ko'alia kona-ba capital social, karik ita la aborda nu'udar prioridade setores saúde no educação, no, iha área ida-ne'e ami sei haree liu ba políticas ne'ebé la'o hela no mós kona-ba melhoria iha prestação pública ba serviço essencial sira-ne'e.

Governo sei serbisu maka'as atu hadi'a planeamento, financiamento, gestão no prestação de serviços ho qualidade tanba Governo haree katak problema principal mak setor crucial rua ne'e ba desenvolvimento Nação nian.

Iha setor da Saúde, Governo sei continua implementa Política Nacional de Saúde no Plano Estratégico Nacional do Setor da Saúde 2011-2030, hodi maximiza esforços hotu atubele garante

prestação de serviços ne'ebé di'ak liu, nune'e mós atu loke luan ka generaliza acesso ba cuidados de saúde ho qualidade, hodi haktuir didi'ak no beibeik kona-ba eficiência, transparência no profissionalismo iha gestão de recursos financeiros, humanos, materiais no logísticos ba infraestruturas no equipamentos, liuliu, Governo sei:

- Garante imediata disponibilidade ba medicamentos ne'ebé necessários iha hospitais no iha centros de saúde, hodi hala'o reforma ba gestão no administração iha setor da saúde, atu nune'e, iha futuro, direito fundamental kona-ba proteção da saúde ba cidadão sira labele sai tan problema;

- Melhora nutrição infantil no liu mós husi merenda escolar ne'ebé nutritiva ba labarik sira hotu;

- Garante atu suco hotu-hotu, liuliu sira iha áreas remotas, bele hetan acesso ba posto de saúde ida ho pacote de serviço ne'ebé abrangente;

- Assegura atu centros de saúde comunitários iha postos administrativos bele fó atendimento ba ema moras ho número boot liután;

- Continua hadi'a saúde materna no saúde infantil liuhosi políticas abrangentes, ne'ebé inclui cuidados preventivos no integrados hanesan iha casos vacinação;

- Hadi'a no haluan prestação de cuidados médicos iha Hospital Nacional Guido Valadares, iha especialidades oioin ho tan médicos no técnicos especializados, atubele hahú halo tratamento ba moras sira-ne'ebé normalmente tem que ba estrangeiro;

- Reforma Laboratório Nacional de Saúde no Banco de Sangue atubele hadi'a gestão dos serviços laboratoriais no iha sistemas de fornecimento de sangue;

- Kona-ba infraestruturas, Governo sei continua harii no reabilita postos de saúde no mós hadi'a centros de saúde comunitários no hospitais de referência, inclui infraestruturas de apoio ne'ebé necessárias;

- Sei cria mós hospital de saúde psiquiátrica.

Kona-ba setor da educação, Governo hakarak katak iha 2028 Timor-Leste bele atinge ka hetan educação ho melhor qualidade no loke mós oportunidade de acesso boot liu ba hotu-hotu hodi nune'e educação bele iha kbiit atu fó resposta ba necessidades iha mercado de trabalho no contribui atu hamenos desemprego liuhosi aprendizagem ne'ebé beibeik, hodi nune'e hapára tiha círculo kona-ba pobreza intergeracional. Nune'e, Governo sei:

- Reforma gestão no administração iha sistema educativo, husikedas Ministério da Educação ba nível municipal no to'o escolas, inclui define ona procedimentos ka regras adequadas no sistemas ba monitorização no avaliação;

- Melhora qualidade de ensino iha níveis de ensino hotu-hotu liuhosi maior capacitação dos professores;

- Revê currículos escolares, liuliu iha ensino secundário geral no vocacional atu assegura aluno sira bele hetan competências adequadas ba mercado de trabalho no ba necessidades de desenvolvimento nacional;
- Continua constrói, reabilita no fornece equipamentos ba escolas do ensino pré-escolar to'o secundário;
- Avalia didi'ak capacidade de funcionamento no resultados husi aluno sira no mós kona-ba financiamento husi escolas CAFE (Centro de Aprendizagem e Formação Escolar), atu haree ba possibilidade hodi loke iha postos administrativos;
- Aumenta ba doubro número de bolsas de estudo ne'ebé sei atribui tuir mérito no tuir necessidades nacionais;
- Hadi'a ensino superior hodi garante adequada avaliação no acreditação académica no mós formação ne'ebé contínua ba professores ka docentes;
- Haluan ensino superior técnico iha áreas estratégicas ba economia nacional hodi cria Instituto Superior Politécnico de Turismo, Hotelaria no Agências no Guias de Turismo iha Lospalos, Instituto Superior Politécnico de Engenharia iha Suai no Academia de Pescas e Estudos Marinhos iha Manatuto. Governo mós sei hadi'a infraestruturas, gestão no ensino iha Instituto Politécnico de Betano;
- Cria comissão coordenadora das universidades e institutos superiores atu estuda estratégia coletiva ida kona-ba atu define assistência ne'ebé di'ak liu husi Estado no kona-ba implementação objetivo atu hasa'e qualidade do ensino.

Husi sikun seluk, sei continua aposta iha formação profissional no emprego hodi investe iha qualificação de jovens iha áreas estratégicas de desenvolvimento. Sei mós continua coopera ho países amigos atu cria oportunidades ba formação profissional no emprego iha estrangeiro liuhosi estágios profissionais no husi programas de trabalho sazonal ho hanoin katak timoroan sira-ne'e fila mai País no bele aplica sira-nia competências ne'ebé sira hetan.

Terceiro compromisso – Desenvolver as infraestruturas

Entre 2007 ho 2017 setor infraestruturas sai hanesan motor ba desenvolvimento nacional ne'ebé bele dudu capital social, crescimento económico, criação de emprego no consolidação iha instituições.

IX Governo Constitucional hakarak recupera fali ímpeto ida-ne'e no kaer filafali plano integrado ba infraestruturas, ho obras ho qualidade no proporcionais ba investimento.

Nune'e, iha loron atus ida ruanulu mai ne'e sei halo levantamento kona-ba principais necessidades iha manutenção de estradas no normalização mota iha país tomak, hodi bele hahú obras de reabilitação ne'ebé urgentes iha 2024.

Governo decide troços de estradas prioritárias iha fase rua, no sira-ne'ebé urgentes liu maka estradas ne'ebé liga ba postos administrativos no estradas rurais, atu depois ba estradas urbanas iha Ainaro, Baucau, Bobonaro, Ermera, Lautém no Viqueque.

Husi sikun seluk, sei reforça investimento iha acesso ba água potável no ba saneamento básico, condição sira-ne'e essenciais ba saúde pública no ba qualidade de vida populações nian. Ba ida-ne'e, sei aprova no implementa Plano de Investimento, Política no Reforma Institucional 2023-2030, atubele cumpre objetivos ne'ebé define ona iha PED no iha ODS (Objetivos Desenvolvimento Sustentável), n.º 6. Plano ida-ne'e sei identifica investimentos ne'ebé necessários ba abastecimento de água e saneamento iha país tomak. Governo mós sei continua assegura katak população tomak hetan acesso ba eletricidade liuhossi expansão ba Programa de Eletrificação Nacional. Kona-ba Ataúro, sei realiza estudo de viabilidade atubele concretiza plano ne'ebé sustentável ba eletrificação ilhéu Ataúro.

Governo ida-ne'e mós sei estabelece Gabinete de Recursos Naturais Renováveis, ne'ebé sei coordena ninia ações iha nível intersetorial, no realiza análises no estudos de viabilidade relevantes ba setor ne'e, no atu sai nu'udar responsável ba implementação projetos de energia renovável, inclui ninia gestão, monitorização no avaliação.

Iha âmbito ida-ne'e, Governo hakarak implementa projetos pilotos ba energia renovável, hanesan construção Centrais iha Lariguto no iha Bobonaro, ba desenvolvimento eólico; no mós sei investe iha sistemas energia solar nian no sei desenvolve estudo de viabilidade ba construção central termoelétrica iha Díli, atu produz energia husi lixo doméstico no lixo industrial.

IX Governo comprometido atu concluí instalação Cabo de Fibra Ótica, hodi garante ligação de *Internet* ho qualidade, ba cidadão hotu iha País tomak.

Governo sei compromete atu haree fali ba planos de investimento iha transportes terrestres, marítimos no aéreos, ho destaque ba iniciativas tuirmai ne'e:

- Halo revisão profunda ba Código de Estrada, ho incidência ba aumento da segurança, liuhossi criação aulas obrigatórias prévias ba exame de condução;
- Hadi'a instalações portuárias iha Com ho Ataúro;
- Construi instalação portuária ida iha Kairabela, Vemasse, atu facilita acesso husi tasi no fó apoio ba setor do turismo;
- Halo estudos de viabilidade ba construção do porto iha Manatuto no ba criação linha marítima nacional ida;
- Reestrutura no moderniza Porto de Díli, hodi transforma ba Marina da Cidade no Porto ba Cruzeiros;
- Desenvolve Plano Diretor ba Aeroporto Internacional no hala'o ninia expansão;
- Desenvolve estudos de viabilidade ba aeroportos municipais no operacionaliza Aeroporto de Suai.

Quarto Compromisso – Desenvolve Economia.

Senhoras no senhores, bainhira ita hakarak cria oportunidades ba povo, ita tem que desenvolve economia diversificada ida, ho base iha agricultura, pescas, pecuária, turismo no investe iha criação pequenas no médias indústrias no empresas, hodi nune'e bele reduz neineik importação bens no produtos husi rai li'ur.

Ita la bele ko'alia kona-ba soberania plena se ita la consegue sai auto-suficientes iha ai-han. IX Governo sei haluan setor agrícola, sei melhora práticas de cultivo no produtividade agrária no sei desenvolve ações atu melhora produção iha culturas agrícolas específicas no sistemáticas, tuir potencial husi região ida-idak iha País.

Kona-ba pecuária, hakarak aumenta produção animal ba 20% to'o 2028, ho objetivo atu diminui importações de produtos animais husi estrangeiro. Sei investe atubele incentiva pescadores iha sira-nia esforço da pesca, ho forma sustentável.

Nune'e, ha'u hakarak destaca ka salienta políticas tuirmai:

- Atu cria Laboratório Público ba Investigação Agrícola, hodi haree ba desenvolvimento de programas de investigação, ba principais produtos agrícolas iha Timor-Leste;
- Atu estabelece Instituto de Pesquisa e de Desenvolvimento Agrícola, ne'ebé sei haree liu ba sistemas de produção, hamutuk ho agricultor sira;
- Atu continua melhora práticas agrícolas, hodi aumenta no hadi'a produção no fó apoio ba agricultores, liuliu husi formação, equipamentos no sistemas de irrigação;
- Atu continua fó apoio ba produção do café orgânico ho alta qualidade, inclui promoção do café Timor, iha nível nacional no internacional;
- Atu estabelece Centro de Investigação de Produção Animal, atu haree didi'ak ba espécies ne'ebé adapta di'ak liu ba condições Timor-Leste nian, hodi melhora qualidade genética no técnicas de reprodução seletiva;
- Atu apoia estabelecimento Associação de Criadores de Gado, hodi facilita bele la'o ba oin no haree ba respetivas políticas no sira-nia iniciativas;
- Atu promove criação de pequenas empresas hodi fó apoio ba pecuária, inclui infraestruturas ba refrigeração, triagem, processamento no embalagem de carne, ho objetivo atu desenvolve indústria pecuária ida, ne'ebé segura no ho qualidade;
- Atu revê estudos ne'ebé hala'o tiha ona iha setor das pescas, hodi identifica ações no estratégias prioritárias ba crescimento setor ida-ne'e nian;
- Atu regulamenta no controla pesca no atu promove campanhas ba pescador sira no ba comunidades, kona-ba técnicas de pescas, ne'ebé fó risco ki'ik liu ba atu estraga produção ikan nian no ambiente ne'ebé hale'u sira;

- Atu investe iha formação de recursos humanos, iha área pescas no aquacultura, hodi apoia serviços técnicos iha tasi laran no iha aquacultura, no mós ba pesca de alto-mar, ho orientação ba exportação iha futuro;

- Atu elabora ka halo estudos kona-ba estabelecimento entidade ida ho administração indireta do Estado, ba área das pescas no aquacultura, hanesan Instituto Nacional das Pescas e Aquacultura, ne'ebé sei sai fonte de promoção no motivação ba investimento privado.

Hanesan ha'u temi tiha ona, IX Governo empenhado tebes duni atu lori gasoduto ka kadoras mai Timor-Leste, hodi prova ba mundo katak ne'e solução economicamente viável no segura. Nune'e, desenvolvimento costa sul nian sei sai centro de atividade iha setor petróleo no gás natural, ho estabelecimento base logística iha Suai, hanesan mós refinaria petrolífera ida no mós complexo petroquímico iha costa sul no instalação fábrica de gás natural liquefeito, gás ne'ebé sei mai husi *Greater Sunrise*, liuhosi construção gasoduto, husi tasi okos to'o rai-maran.

Ho Projeto Tasi Mane, sei mosu desenvolvimento iha costa sul tomak, ho construção cidades foun no infraestruturas de apoio. La'ós de'it exploração, maibé iha ona fase de construção, no mós iha fase operação de infraestruturas no serviços ne'ebé sei mosu tan, sei cria postos de trabalho liu rihun limanulu, diretos no indiretos.

País tomak sei beneficia husi projeto ida-ne'e, la'ós de'it kona-ba aumento do Produto Interno Bruto, maibé kona-ba dinâmica económica ne'ebé fó ba produtividade husi fator económico oioin, ne'ebé inclui mós subcontratação de serviços hanesan restaurantes, engenharia, segurança, fornecimento de combustível, serviços de gestão, profissionais no técnicos no necessidades iha produtos agrícolas – ne'e hotu atu menciona de'it balu.

Husi sikun seluk, Governo ida-ne'e determinado atu haree ba tasi husi ângulo seluk, tanba tasi crucial tebes ba Ema nia moris! Tasi fó buat hotu mai ita: hahán, saúde, conetividade, entretenimento, inspiração no prosperidade.

Husi tasi, iha setor lubuk ida-ne'ebé mosu hanesan motor ho potencial boot ba desenvolvimento sustentável. Husi setor tradicionais, hanesan pescas, portos, construção no transporte naval, atividades portuárias, turismo, petróleo no gás natural, ba setores estratégicos, hanesan defesa no segurança, ba setores seluk, hanesan biotecnologia, energias marinhas renováveis no, até mesmo, tasi ho nia kbiit atu halakon carbono.

Atu harii economia tasi ne'ebé sustentável, sai, tanba ne'e duni, oportunidade ida ba ita-nia País. Ha'u bele dehan mós katak esperança ida. Governo sei continua implementa campanha «Ha'u-nia Tasi, Ha'u-nia Timor», atu sensibiliza kona-ba áreas marítimas de Timor-Leste, no sei fó prioridade ba elaboração Política ba Economia Azul iha Timor-Leste, ho hanoin ba crescimento sustentável da Nação, inclui preservação, conservação no uso sustentável iha ita-nia recursos

oceânicos no ba promoção de iniciativas no programas, ne'ebé tau matan ba sustentabilidade ambiental, económica e social.

Política ida-ne'e sei precisa esforço conjunto no dinâmico husi vários ministérios no entidades públicas, liuliu sira-ne'ebé hetan responsabilidades iha área agricultura no pescas, meio ambiente, negócios estrangeiros, petróleo, administração estatal, defesa no segurança, atu assegura desenvolvimento ne'ebé di'ak no sustentável ba Economia Azul.

Programa ida-ne'e mós sei dinamiza setor do Turismo, ne'ebé sei alinha ninia estratégia ba atração turística no ba melhoria iha promoção de produtos e ofertas turísticas, turismo marítimo sustentável no ecoturismo de Timor-Leste.

Estratégia ida-ne'e mós sei reforça ita-nia estratégia atu preserva no valoriza ita-nia recursos naturais, ita-nia biodiversidade, hodi salvaguarda ho di'ak meio ambiente terrestre no marítimo, ba desenvolvimento sustentável da economia.

Ikusliu, no antes de hakotu compromisso ida-ne'e ba economia, ha'u tem que refere katak Governo sei aposta iha dinamização husi investimento estrangeiro no iha desenvolvimento ba ita-nia setor privado nacional, liuhosi cria condições atrativas no seguras, hodi hasai ka reduz tiha obstáculos ne'ebé taka hela dalan, hodi fomenta empreendedorismo, atu setor privado, nacional no internacional, bele sai nu'udar parceiro ne'ebé di'ak ba Governo iha crescimento económico.

Excelências, Senhoras no Senhores,

Ita tama ba Quinto Compromisso – Consolida Governação

Para além de reformas legislativas ne'ebé sei hala'o, Governo sei aposta iha política económica, ne'ebé bele contribui ba desenvolvimento investimento iha setor privado no iha política fiscal ida ne'ebé sei contribui ba equilíbrio fiscal ne'ebé boot liu, liuhusi sistema tributário ida ne'ebé hatama receita doméstica barak liu, hodi kaer regime fiscal ne'ebé competitivo, no bele atrai investimento.

Iha tinan lima mai ne'e Governo hakarak cria campos de trabalho ba hotu, hodi bele reduz taxa de pobreza mínima ba 10%, liuhusi desenvolvimento das infraestruturas no desenvolvimento iha tecido económico, hanesan temi ona. Política di'ak ida ba setor financeiro mak sei contribui ba mudança iha estrutura economia nian, ne'ebé depende hela ba despesas públicas, atu lori ba economia ne'ebé sustentável, liuhusi aumenta atividades husi setor privado.

Setor privado la progride, liuliu tanba hein de'it projetos do Estado no la iha acesso ba crédito no financiamento ba prazo naruk ho funan ne'ebé natoon. Banco sira-ne'ebé iha, fó de'it crédito ba organizações internacionais no ba empresas ne'ebé mai husi sira-nia rain no ba setores ne'ebé depende liu ba contratos ho Governo no husi investimento público.

Governo sei estabelece Banco de Desenvolvimento de Timor-Leste, ho objetivo atu facilita acesso ba financiamento ho longo prazo, ho taxas de juros ne'ebé acessíveis, atu empreendedores bele participa iha desenvolvimento da Nação.

Husi sikun seluk, Governo sei apoia no expande Banco de Comércio Nacional de Timor-Leste ba municípios no postos administrativos, hodi nune'e micro, pequenas no médias empresas, urbanas no rurais, bele ona halo parte ativa iha crescimento económico.

Governo hakarak mós katak iha ninia política de investimentos, Fundo Petróleo bele mós considera investimentos ne'ebé empresa sira halo husi sira-nia ações. Ba ne'e, Governo sei hametin capacidades husi empresas estatais existentes, hodi nune'e bele orienta sira-nia atividade atu promove investimentos iha Timor-Leste no hodi avalia didi'ak efeitos financeiros no económicos ba Estado liuhusi promove atividades husi empresas estatais ba setores produtivos.

Governo mós sei estabelece Corporação de Investimento de Timor-Leste, nu'udar companhia estatal ba investimento no mós atu capitaliza companhias estatais, liuhusi planos de negócios.

Governo sei aprova Regime ba Setor Empresarial do Estado hodi melhora ninia acompanhamento ba empresas estatais no promove participação husi Estado iha investimentos privados no contribui ba ninia retorno financeiro e económico.

No mós sei haree ba mecanismo de diversificação financeira, liuhusi «Ações para o Investimento do Setor Privado» (*Equity Participation*), ne'ebé Governo hakarak atu implementa, tanba sei estimula investimentos husi setor privado, sei promove desenvolvimento das infraestruturas no sei contribui ba diversificação da economia no criação do emprego, hodi bele arrecada ka hatama receitas ba Estado.

Política sira-ne'e só iha sentido quando Governo continua fortalece política fiscal no política de gestão das finanças públicas ho transparência, ho responsabilidade, ho eficiência no sustentabilidade. Nu'udar prioridade ida iha ninia mandato, Governo sei, tanba ne'e, reforma Gestão das Finanças Públicas.

Governo sei mós garante katak sei fila ba rigor da execução da despesa pública, hodi investe iha descentralização financeira ba instituições públicas no ba autoridades regionais no municipais, hodi reforça capacidades husi instituições públicas, liuhusi interligação do sistema informático iha setor público ho sistema informático financeiro. Hamutuk ho ida ne'e, Governo sei kaer fali «orçamentação por programas» atu evita halo despesas irrelevantes ne'ebé fó dalan ba corrupção.

Sexto Compromisso – Promover a Boa Governação e Combater a Corrupção.

Ikus ona, Governo sei serbisu atu garante setor público ne'ebé forte, honesto no eficiente, associado ba mecanismos de justiça no segurança interna nian, ne'ebé sei contribui ba segurança no prosperidade País nian.

Governo sei atua ho determinação:

- Iha avaliações de desempenho no promoção ho base iha mérito;
- Iha combate contra corrupção, liu mós husi medidas de prevenção. Membro Governo ida-ne'e sei la sai hanesan exceção, tanba sei aprova Código de Conduta;
- Liuhusi tecnologias de informação, inclui mós Governo eletrônico, no liuhusi cooperação ne'ebé di'ak ho meios de comunicação social iha País, sei promove boa governação;
- Iha reforma no modernização da Administração Pública;
- Iha fortalecimento institucional, inclui halo revisão ba matriz organizacional iha instituições;
- Iha formação no capacitação dos recursos humanos iha Administração Local do Estado, ho objetivo atu hadi'a prestação de bens no serviços públicos locais.

Hanesan ha'u dehan iha kedas início, Governo sei hala'o processo de descentralização, hodi aposta iha potencialidades município ida-idak nian, ho hanoin katak processo ne'e bele considera hanesan segunda independência ba País, iha-ne'ebé ema hotu bele contribui ba ninia desenvolvimento rasik.

Nune'e, iha tinan lima mai ne'e ita sei hahú processo Poder Local liuhusi descentralização ne'ebé faseada ba Governo no ba assembleias municipais, depois de cria tiha ona condições infraestruturas no técnicas. Objetivo ida-ne'e sei la realiza bainhira la iha participação ativa no responsável husi timoroan sira hotu, husi ponta leste ba ponta oeste.

Ikusliu, iha âmbito boa governação no combate ba corrupção, ha'u sei la bele evita ko'alia, dala ida tan, kona-ba Justiça no Defesa e Segurança. Iha assunto ne'e, IX Governo Constitucional sei fó prioridade ba:

- Implementação Conceito Estratégico de Defesa e Segurança Nacional, inclui revisão no aprovação ba ninia respetivo quadro legal;
- Reforma no reestruturação imediata ba Sistema Nacional de Inteligência atubele garante integridade no profissionalismo iha instituição ida-ne'e;
- Reestrutura iha Polícia Científica de Investigação Criminal, tanba necessidade absoluta atu iha integridade no profissionalismo ne'ebé boot liu;
- Revisão ba Plano Estratégico de Segurança Interna 2030, atubele adequa Plano ne'e ba desafios ne'ebé iha daudauk, iha setores Segurança Interna no Proteção Civil; elimina partidarização husi Forças de Segurança e Defesa do País;
- Implementa Reforma ne'ebé kle'an iha setor da justiça, no criação Supremo Tribunal de Justiça, ho formação irrepreensível ka tem que di'ak liu, ba Juízes no Procuradores.

Senhora Presidente do Parlamento Nacional, Vice-Presidentes do Parlamento, Senhoras no Senhores Deputados, ha'u tem que dehan katak dalan ne'ebé iha ita-nia oin, dalan ne'e nakonu ho desafios, desafios ne'ebé ita tem que enfrenta ho responsabilidade.

Ne'e programa ida ne'ebé exige determinação ne'ebé forte, perseverança no honestidade, tanba dalaruma fácil liu bainhira ita hahú do que bainhira ita tem que corrige processos no sistemas, vícios no hábitos ne'ebé instala ona iha fatin hotu-hotu. Maibé, precisa duni halo, atubele la'o filafali husi dalan ba progresso.

No ita hotu tem que preparado ba conjunturas ne'ebé ita la consegue prevê agora, la'ós de'it crise interna husi irregularidade democrática ne'ebé ita hasoru foin daudauk iha ita-nia País, ne'ebé provoca duni estagnação social no económica, ne'e mosu mós tanba falta de capacidade atu analisa no supera ka hakat liu crise sira seluk, iha mós cenário internacional, ne'ebé lori ita mai to'o atual estado Nação nian.

Ita mós enfrenta pandemia global, ho impacto ne'ebé boot iha mundo tomak, pandemia ne'ebé provoca milhões de vítimas mortais, obriga taka fronteiras, no halo democracia global sai fraca tiha no lori ba crise económica no social iha mundo, ne'ebé agrava liután pobreza no desigualdades iha mundo.

Timor-Leste la consegue escapa husi situação ida ne'ebá! Cheias iha 2021 la provoca de'it ema mate barak maibé lori estragos graves ba País. Liu tiha tinan rua, ohin loron mós ita sei sente, uitoan ka barak iha fatin hotu-hotu, desastres husi udan, hodi estraga estradas no uma barak ne'ebé seidauk hadi'a, no buat sira-ne'e hotu fó lembra mai ita kona-ba importância ba ordenamento territorial, liuliu iha capital de Díli.

Menos de tinan ida liu tiha, mosu funu iha Ucrânia, no ita, ne'ebé dook tebes husi ne'ebá la bele indiferente ba funu ida-ne'ebé iha Europa. Funu ida-ne'e lori mós incerteza barak mai ita-nia jovem Estado ne'ebé precisa atu desenvolve. Funu ida-ne'e hatudu de'it katak líderes mundiais la iha liu vontade atu tuur hamutuk hodi buka pás, maibé buka compete ba malu, sé mak iha liu kilat, sé mak iha liu kbiit.

Guerra la'ós de'it ação ne'ebé aat no fo'er liu husi ser humano iha ohin loron, guerra iha Ucrânia hatudu loloos ação ne'ebé aat no fo'er liu husi líderes mundiais. Funu ida-ne'e la'ós de'it provoca ona crise humanitária ne'ebé boot liu husi Segunda Guerra Mundial, maibé provoca mós instabilidade democrática no económica iha país barak, husi ne'ebé Timor-Leste la'ós exceção ida, ho quebras iha abastecimentos, – Rússia taka tiha dalan atu hahán to'o iha Ucrânia, ooooh la furak – ho pressão inflacionária internacional, ho aumento iha preço energia no matérias primas.

Comunidade Internacional, ne'ebé sempre lailais no presente iha ninia apoio mai Timor-Leste, continua duni, durante crise sira-ne'e, presta ninia solidariedade mai ita-nia povo. Maibé, países doadores no agências internacionais iha mós povo barak ne'ebé moris iha terus laran atu sira mós tau sira-nia atenção.

Timor-Leste tem que prepara an atu lida ho crises nacionais no internacionais, no hasoru complexidades no desafios ne'ebé mundo fó mai ita. Husi conflito ba guerra, husi crise refugiados ba

fanatismo husi terrorismo, husi insegurança marítima ba alterações climáticas, Timor-Leste la bele de'it buka abrigo iha “tempestade”, tempo aat sira-ne'e, hodi haluha katak iha li'ur ne'ebá iha mundo ida ho mudança ne'ebé permanente.

Ita tem que enfrenta mundo ho forma pró-ativa, tanba la iha país ida ne'ebé consegue ultrapassa mesamesak desafios ne'ebé globais. Timor-Leste iha capacidade atu iha voz mais ativa iha palco internacional ho experiências ne'ebé válidas atu partilha ka fahe, la'ós de'it iha âmbito de países g7+ nian, maibé ho rai seluk tan iha mundo. Ita-nia sucesso iha resolução pacífica de disputas, iha caso delimitação de fronteiras marítimas, liuhusi Convenção Nações Unidas do Direito do Mar no tuir direito internacional, hamosu respeito mundial mai ita. Ita hakarak continua atu retribuui solidariedade, ne'ebé ita simu durante tinan sira funu nian no depois de restaura ita-nia Independência....

Hotu ona?

Sr.^a **Presidente**: — Sei continua, Sr. Primeiro-Ministro.

Sr. **Primeiro-Ministro** (Kay Rala Xanana Gusmão): — Oh besik ona. Minuto 10 tan! Obrigado.

Ita hakarak continua atu retribuui solidariedade, ne'ebé ita simu durante tinan sira funu nian no depois de restaura ita-nia Independência, atu hatutan ita-nia voz ba movimento internacional iha promoção ba reconciliação, paz no estabilidade.

Ita sei promove multilateralismo, nu'udar objetivo prioritário ba política externa, iha complexidade conjuntura internacional nian. Ita sei reforça ita-nia envolvimento iha ONU no iha agências internacionais seluk, hodi participa iha temas centrais, hanesan alterações climáticas, iha assuntos tasi nian no sustentabilidade ba oceanos, iha Economia Azul, iha questões kona-ba migrações no refugiados, nune'e mós iha iniciativas ho cariz humanitário. No, claro, sei fortalece relações de amizade, cooperação no solidariedade ho Estado hotu-hotu, no mós ho países amigos no parceiros de desenvolvimento, liuliu ho Rain sira-ne'ebé besik, hanesan ita-nia vizinhos, países da região, ka ho países da CPLP, no mós ho país hotu ne'ebé fó sira-nia apoio incondicional mai ita durante fase oioin iha construção paz e da Nação.

Ha'u tem que temi, ho gratidão, katak iha fulan ida-ne'e duni, iha fulan ne'ebé ami simu posse, ita hetan honra boot ho visitas husi Ministro dos Negócios Estrangeiros do Japão, Ministra de Negócios Estrangeiros da Austrália no mós loron hirak tan husi Primeiro-Ministro de Portugal. Amizade no cooperação bilateral, ne'ebé sira hatudu, sei reforça ita-nia convicção katak ita bele cumpre ita-nia missão ba timoroan sira. Husi compromisso ne'e, halo mós parte atu prepara an didi'ak atu tama nu'udar membro pleno iha ASEAN no iha Organização Mundial do Comércio.

Tan ne'e hotu, agora ha'u lança ha'u-nia segundo repto: Ita hotu tem que sai diplomatas ba ita-nia País! Ita tem que construi imagem credível ba País independente ida-ne'e, ne'ebé responsável no iha dalan ba desenvolvimento, ne'ebé mós defende tolerância, direitos humanos, Estado de direito democrático no sistema mundial ne'ebé haktuir regras internacionalmente aceites. Independentemente ba ita ida-idak nia condição profissional, social ka económica, ita sei dignifica ita-nia presença iha estrangeiro, enquanto ita haree ba rai-laran hodi atrai investimentos, comércio no turismo mai Timor-Leste.

Atu remata, ha'u agradece ba distintos Deputados, Ita-Boot sira-nia colaboração no determinação atu debate no melhora agenda estratégica ba IX Governo Constitucional.

Loron aban começa ohin, iha-ne'e no agora kedas. Ita sei responde ba ita-nia mandatos husi Parlamento no husi Governo, mandato ne'ebé ita simu husi ita-nia Povo. Ne'e mak ita-nia dever, ne'e maka ita-nia responsabilidade.

Ha'u conta ho Ita-Boot sira-nia voto de confiança hodi, hamutuk, ita bele cria oportunidades ba ita-nia Povo!

Obrigado wa'in ho respeito tomak.

Basa liman husi Deputado sira.

Sr.ª Presidente: — Muitíssimo obrigado ba Sr. Primeiro-Ministro nia intervenção.

No tuirmai segue período do pergunta e respostas, dispondo as bancadas parlamentares para cada dia do debate de tempos globais ne'ebé fixa tiha ona iha ita-nia tabela ho grelha ne'ebé entrega tiha ona mai ita.

Entretanto, ita hahú ho Bancada da FRETILIN. Iha ona registo iha-ne'e, Sr. Deputado Aniceto Guterres.

Sr. Aniceto Longuinhos Guterres Lopes (FRETILIN): — Obrigado.

Excelências Sr.ª Presidente do Parlamento Nacional, Sr. Primeiro-Ministro IX Governo Constitucional, Vice-Primeiro-Ministro sira, ilustres membros do Governo, distintos Deputados, maluk doben povo Timor-Leste, bom dia ba ita hotu.

Ba dala uluk, lori Bancada FRETILIN nia naran hato'o ha'u-nia apreço ba IX Governo Constitucional, liderado husi Sua Excelência Sr. Primeiro-Ministro, Kay Rala Xanana Gusmão, ne'ebé consegue formula ona nia programa governação ba tinan lima tuirmai. Ne'e mak ohin daudauk ita iha Parlamento Nacional, liuhosi nia representante povo sira, hahú halo debate de apreciação.

IX Governo, Governo ida ne'ebé hetan duni legitimidade democrática tomak atu apresenta Programa mai iha Parlamento Nacional no kaer ukun hodi cumpre mandato constitucional, basá povo mak fó ona confiança liuhosi urna iha eleição legislativa.

Iha regime democrático hotu-hotu iha mundo, partido ne'ebé manán eleição mak bá kaer ukun, ukun ho maioria ka minoria, ho coligação ka sem coligação. Partido sira-ne'ebé la manán eleição, biar la ukun, maibé contribui nafatin nu'udar oposição.

IX Governo Constitucional nia existêcia ho nia programa governação ida-ne'e mak sei completa no fó continuidade ba esforço coletivo sira iha processo construção e consolidação do Estado, Nação, ne'ebe hahú kedas ona husi 28 de Novembro 1975, continua hikas iha era restauração independêcia to'o ohin loron, ho Governo oiain mak mosu no substitui malu ona, husi I Governo to'o VIII Governo Constitucional.

Ho Governo sira-ne'e nia esforço sira, apesar de Nação no Estado jovem, Timor-Leste consegue ona fó passo mesak boboot. Transita husi nação pós-conflito ba iha desenvolvimento, harii no hahi'i paz no estabilidade, halo ona buat barak, maibé barak liu mós mak precisa no tem que halo iha vertente oiain.

Nu'udar Nação no Estado soberano, ita hotu sei hamutuk embarca iha agenda nacional foun ba transformação económica no ba modernização social. Ita hamutuk consolida ita-nia coesão social, combate assimetrias no pobreza, atu Timor-Leste sai duni país ida credível, aberto, no favorável ba investimento externo no ba programa desenvolvimento sira seluk.

Excelência Senhor Primeiro-Ministro, ba IX Governo nian Programa ida-ne'e, em princípio Bancada FRETILIN la iha objeção. Dala ida tan, la iha objeção! Muito menos, atu rejeita. Maibé, ami iha pergunta barak no observação crítica ruma ba parte balu husi documento Programa ida-ne'e.

Atu dehan loloos ne'e mak ne'e: mais de 90 % programa iha documento ne'e foti husi Programa VIII Governo Constitucional nian, Governo ne'ebe Excelência Senhor Primeiro-Ministro rasik mak forma no sai parte durante metade husi Governo ida-ne'e nia mandato, que programa sira-ne'e balu ita reconhece seidauk implementa karik, maibé barak mak hahú halo implementação no hetan ona progresso no resultados. Maibé, iha documento Programa ida-ne'e rasik menciona kona-ba período 2017 to'o 2023 hanesan período de estagnação, período de violação sistemática ao sistema, às leis e às regras de boa governação e de transparência.

Loos duni, cada Governo iha nia deficiência no nia próprio êxito. Maibé, esforço coletivo husi Governo dahuluk sira-ne'e hotu, inclui VII no VIII Governo nia esforço mós, mak ohin loron ita regista Timor-Leste nia progresso significativo sira kona-ba crescimento económico no redução pobreza.

Ohin loron Timor-Leste sai nu'udar ponto de referência iha gestão do fundo soberano, iha democracia, iha liberdade de expressão, no seluk-seluk tan. Hanesan exemplo, índice kona-ba

democracia iha ita-nia Rain, a nível Ásia, Timor-Leste ocupa posição ida ne'ebé di'ak tebetebes. Tuir dados índice ba organização transparência ne'e mós índice corrupção nian husi tinan 2018 to'o 2022, Timor-Leste hetan pontuação ne'ebé di'ak tebes, ne'e hatudu katak iha período VIII Governo nia ukun, VIII Governo iha esforço ba governação di'ak. Iha 2022, Timor-Leste iha *rangking* 77, hateke ba kotuk uitoan iha 2021 Timor-Leste iha *rangking* 82, compara ho tinan 10 liu ba kotuk, 2011, ita iha *rangking* 143, iha 2012 tun uitoan, melhora uitoan, ba *rangking* 113.

Então, pergunta mak ne'e, Sr. Primeiro-Ministro: Sasukat saída mak ita usa hodi hatete tinan neen ukun VII no VIII Governo nian nu'udar período estagnação no nakonu ho violação sistemática?

Sr.^a Presidente do Parlamento Nacional, ha'u-nia pergunta mak ida-ne'e de'it! Ha'u hein Governo bele fó resposta ruma.

Maibé, antes termina intervenção badak ida-ne'e, ha'u hakarak afirma iha fatin ida-ne'e, Uma-Fukun povo Timor-Leste nian, katak FRETILIN, nu'udar oposição ativa no construtiva, hakarak IX Governo Constitucional ne'e ukun to'o rohan husi nia mandato.

To'o ona tempo atu hamosu no haburas cultura política democrática foun iha Timor-Leste, katak partido ne'ebé manán eleição, hetan ka la hetan maioria iha Parlamento ida-ne'e, nia mak kaer ukun, no Governo ne'ebé ukun ona, husik nia ukun to'o rohan, hodi assegura estabilidade política no evita lakon oportunidade ba ita-nia desenvolvimento, no la bele admite mós hamonu Governo ida iha kedas início tanba Programa rejeitado ka la iha confiança husi Parlamento Nacional, confiança povo ne'ebé hatudu ona iha urna mak prevalece interesse hotu-hotu nian.

Tenho dito, muito obrigado.

Sr.^a **Presidente**: — Muito obrigado, Sr. Deputado.

Tuirmai, Sr.^a Deputada Maria Angelina Sarmiento.

Sr.^a **Maria Angelina Sarmiento** (PLP): — Muito obrigada, Sr.^a Presidente, bom dia.

Bom dia ba membro da Mesa sira hotu. Bem-vindo ba Sr. Primeiro-Ministro e Srs. Vice-Primeiros-Ministros e elenco governamental tomak, distintas e distintos Deputados no povo doben Timor-Leste.

Em primeiro lugar, lori Bancada Partido Libertação Popular (PLP) nia naran hakarak aprecia ba IX Governo Constitucional, ne'ebé apresenta ona Ita-Boot sira-nia Programa IX Governo nian, atu hetan apreciação ka rejeição husi Parlamento Nacional, tuir Constituição da República Democrática de Timor-Leste.

Iha-ne'e ami hakarak destaca questão balu, ne'ebé reitera iha Programa do IX Governo Constitucional, ne'ebé hatuur iha livro ne'ebé Parlamento Nacional simu.

Iha Programa IX Governo ne'ebé apresenta mai Parlamento Nacional, hanesan hatete, iha reafirmação do Estado de direito democrático, barak liu mak halo julgamento, sem baseia ba factos, hasoru VIII Governo Constitucional, ne'ebé dehan revela total ineficiência estado da Nação iha período naruk, ne'ebé hamosu sistemática violação ba regras boa governação no transparência.

Declaração ida-ne'e la baseia ba provas no factos, e documento ne'e mós hatuur dehan Estado Timor-Leste frágil. Sim, ida-ne'e ita hotu reconhece tanba categoria Estado frágil e fragilidade ida-ne'e, keta haluha, ita político sira rasik mós contribui maka'as, ne'ebé ita hanaran impasse política. Exemplo concreto mak iha tinan 2020, Bancada do Governo rasik mak hakle'an liután fragilidade ida-ne'e hodi chumba OGE 2020, e ida-ne'e contribui ba hanaruk impasse política.

Governo la'o de'it ho orçamento duodécimo, implica ba programa desenvolvimento sira barak mak parado, e tanba ne'e mak dehan revela total ineficiência, iha razão de ser, tanba ita mós nu'udar autor hodi contribui ineficiência hahú iha tinan 2018 até 2020. Ita hotu hola parte iha laran, maibé sé nia bancada mak boot liu tem que assume mós responsabilidade.

Durante ita-nia história luta ukun an, Timor-Leste la'ós iha Governo lima de'it, maibé to'o ona sia, maibé iha IV ho VIII de'it mak ukun to'o rohan. Ita labele hatudu katak ineficiência governação ne'e hahú husi Governo dahituk no daualuk, maibé karik iha netik honestidade, dehan ba povo katak impasse política naruk ne'e tanba mai husi conflito política interna iha rai-laran, ne'ebé sei dada malu to'o ohin loron, no atual Partido Democrático no CNRT hola parte mós iha governação anterior no tem que toma responsabilidade política ba povo Timor.

Ita labele hatudu katak governação ida ba governação seluk buat hotu-hotu aat no minimiza ka halo advogado do diabo, no la iha sentido apreciação ba prestação serviço sira balu ne'ebé contribui no atribui progresso desenvolvimento di'ak ba Nação no povo.

Se ita-nia Estado hanaran Estado de direito democrático maka ita sei la'o tuir princípio lei nu'udar base fundamental, significa ema ruma atu processa, maka nia rasik iha obrigação hatudu provas.

Bainhira ita ko'alia violação sistemática ba regras boa governação no transparência, Governo cessante falta de transparência no falta responsabilidade financeira, ami hakarak hatuur iha-ne'e katak VIII Governo Constitucional nia programa sira povo mak haree no sente, la'ós grupo ki'ikoan iha nível médio ba nível alto mak sente. Iha relatório Câmara de Contas hatudu provas barak mak comprova katak iha V no VI Governo mós comete infração barak.

Nu'udar partido oposição, prática boa governação no transparência nian iha VIII Governo Constitucional hatudu evidência no prestação serviço, ne'ebé organização internacional sira hato'o iha sira-nia relatório.

Hanesan haktuir husi Transparência Internacional, Timor-Leste nia índice perceção corrupção hahú husi tinan 2012 to'o 2017, ne'ebé recai iha V no VI Governo Constitucional, ita hetan pontuação

iha 32. Iha 2015 ita-nia pontuação to'o 28, significa ita tama categoria nação corrupto iha mundo. Maibé, hahú iha 2020 ita sai ona husi grupo sira nação corrupto, ita-nia pontuação 40, ita aumenta positivo ba 42 iha tinan 2022. Nune'e ita bele orgulho katak iha classificação moderada no progressiva, sai ona husi nação sira considerado nu'udar país corrupto iha mundo. Hirak-ne'e tanba fator sira-ne'ebé contribui hahú husi 2020 ba leten mak hanesan: ita introduz Lei Medidas de Prevenção no Combate Corrupção, ne'ebé vigora iha agosto 2020; halo reforma lei sira iha setor judiciária; ita reforma setor finanças públicas, rigoroso liután iha execução Orçamento Geral do Estado. Fator hirak-ne'e mak contribui mós ba mudança iha CPI (*Corruption Perception Index*). Nune'e alegação sira-ne'e, ba ami, hanesan la iha provas atubele argumenta.

Ami husu atu IX Governo Constitucional continua serviço maka'as hodi hadi'a Timor-Leste nia CPI, atu ita bele hetan classificação di'ak. Keta halo ita bá fali kotuk hodi lori Timor-Leste tama fali classificação nu'udar país ne'ebé corrupto.

Nu'udar timoroan, ita tem que louva mós serviço ne'ebé presta ona husi instituição Estado no órgão soberano sira, liuliu instituição CAC, ne'ebé hala' o sira-nia knaar ho profissionalismo aas tebes.

Nune'e ami hakarak destaca pergunta balu. Iha Programa IX Governo nian sei iha melhoria iha política fiscal no gestão finanças públicas; foca ba hadi'a gestão recolha imposto no taxas; mobilização gestão dívida pública no recurso sira husi rai-li'ur; hadi'a gestão fundo petrolífero no hadi'a planeamento orçamental; plano atu revê mós Lei Tributária no IVA (Imposto de Valor Acrescentado); Revê no melhora LEO (Lei de Enquadramento Orçamental), Regime Jurídico de Aprovisionamento no Contratação Pública; Revê no altera Lei Dívida Pública no sira seluk-seluk tan. Maibé, ami hakarak hatene, programa ne'ebé apresenta iha Parlamento Nacional, iha VIII Governo Constitucional halo ona avaliação ba Plano Estratégia Desenvolvimento Nacional 2011-2030, será que Programa IX Governo Constitucional halo referência mós ba avaliação ida-ne'e? Tanba iha avaliação ida-ne'e mós nia objetivo atu buka hatene loloos sá resultado mak ita alcança ona husi tinan 2011 mai to'o tinan 2022, no saida mak ita precisa hadi'a.

Iha mós referências balu husi VIII Governo Constitucional nian hanesan halo ona apresentação ba Objetivos Desenvolvimento Sustentável (ODS), ida-ne'e sai mós hanesan referência ba VIII Governo Constitucional atu hatuur iha ninia Programa IX Governo nian hodi fó continuidade ba serviço sira-ne'ebé hala'o ona ka lae?

Nune'e mós política pública sira barak ne'ebé VIII Governo Constitucional halo, ami hein katak IX Governo kaer mós ba referência importante sira-ne'e atu la husik sasán sira-ne'ebé VIII Governo halo ona, ne'ebé implica ba custos, energia no trabalho ida-ne'ebé duro tebetebes hodi ita produz documento sira, e la'ós IX Governo ninia programa husik hela referência importante sira-ne'e.

Políticas públicas barak mak VIII Governo Constitucional halo, inclui oinsá mak atu halo reforma ba setor Administração Pública, ne'ebé Parlamento Nacional rasik halo autorização hodi fó competência exclusiva ba Governo atu halo reforma ba Administração Pública, ami hein katak política pública sira-ne'ebé VIII Governo Constitucional halo ona, sai hanesan referência ba IX Governo Constitucional atu fó continuidade ba serviço hodi hatuur Estado de direito democrático.

Mais ou menos, ida-ne'e mak ami-nia pergunta atu destaca iha-ne'e.

Muito obrigada, Sr.^a Presidente.

Sr.^a **Presidente**: — Muito obrigada, Sr.^a Deputada.

Tuirmai, Sr.^a Deputada Olinda Guterres.

Sr.^a **Olinda Guterres** (KHUNTO): — Bom dia ba Sr.^a Presidente do Parlamento Nacional, Vice-Presidentes, Secretária da Mesa, Sua Excelência Sr. Primeiro-Ministro ho nia elenco governamental tomak, colegas Deputadas e Deputados no maluk sira-ne'ebé participa iha-ne'e, ba mídia nacional no internacional no mós ba maluk sira-ne'ebé sintoniza hela iha rádio no televisão nian oin.

Ha'u só hatete de'it hanesan ne'e, Sr. Primeiro-Ministro: loloos ita ukun iha tinan 2021, antes, IX Governo, sala husi Ita-Boot sira. Ha'u hamutuk ho Ita-Boot sira forma AMP (Aliança da Maioria Parlamentar), KHUNTO hamutuk ho Ita-Boot forma AMP. Maibé, momento ne'ebá atu vota ha'u ladún compreende votação, então ha'u iha li'ur ne'ebá halai tun-sa'e buka, maluk colega sira husi CNRT mak sei iha-ne'e hotu, ha'u buka sira oinsá ita vota. Sira nem fó liafuan ida dehan katak vota nune'e. Karik momento ne'e dehan ita vota hanesan ne'e, forma IX Governo, tinan hirak liubá ne'e ita kaer ukun tiha. Ha'u só hatete de'it ida-ne'e. Ne'e hanesan aumenta de'it liafuan hodi halo abertura ba ha'u-nia liafuan oan ruma ne'ebé ha'u hato'o. Ita labele hatún malu hasa'e malu, ha'u hakarak ne'e ami-nia partido KHUNTO iha-ne'e móvel.

Povo tomak mak hili Ita-Boot sira, ami partido ki'ik atu halo saida? FRETILIN manán, ami bá FRETILIN, CNRT manán... naran katak haree povo nia moris, ida-ne'e mak KHUNTO nia hakarak. KHUNTO mai atu serbí, la'ós atu mai hanesan oposição ida halo hanesan uluk Ita-Boot sira halo, contra malu ne'e, lae! KHUNTO la hanoin ba ida-ne'e.

Geralmente ami rona tiha ona Ita-Boot ninia programa, programa ne'ebé apresenta ona iha aspeto barak hanesan mós programa VIII Governo nian ne'ebé hahú uluk ona ho partido CNRT nu'udar força política maioritária, antes mosu mudança iha composição parlamentar no governamental husi partido político sira iha 2018. Ne'e duni, tanba partido CNRT mak força política maioritária iha IX Governo, então programa ne'e iha semelhança barak no sei bele assegura continuidade ba desenvolvimento nacional. Maibé, iha parte ida mak ha'u hakarak compreende liután, parte ne'e mak

ida-ne'ebé refere ba Banco Desenvolvimento Nacional, iha página número 12 husi Programa ne'e, kona-ba Governo nia intenção atu cria Banco Desenvolvimento Nacional.

Knaar, papel central husi fundo veterano no fundo segurança social nian atu assegura sustentabilidade iha futuro. Fundo hirak-ne'e kona-ba utilização di'ak husi Fundo Veterano no kona-ba fornece segurança di'ak liután ba gestão fundo reforma nian hodi halo Estado livre husi organização financeira internacional, tema ne'e la aborda ohin iha página número 35 bainhira temi Fundo de Reserva da Segurança Social.

Referência ba Fundo Veterano sira-nian, se refere ba um bilhão ne'e, então la existe ona tanba Tribunal de Constas declara katak ilegal, halo ita atu hanoin katak dala ruma Governo tau sala iha Programa ne'e, ou talvez Governo refere ba fundo seluk husi veterano sira.

Maski nune'e, hakarak husu ba Governo atu clarifica situação ne'e, liuliu hanesan referência ba gestão Fundo de Reserva de Segurança Social ne'ebé fó ba Banco Desenvolvimento Nacional, tanba instituição ida-ne'e, ne'ebé foin moris, Banco Desenvolvimento Nacional bele iha capacidade atu gere valor montante hirak ne'ebé boot tebes? Será que banco foun ne'e bele gere fundo ne'e ho di'ak ka lae? Ha'u-nia preocupação mak ida de'it, mak ohin ha'u hato'o ona ba Ita-Boot sira-ne'ebé tuur iha oin.

Em geral, ba iniciativa ne'ebé IX Governo define iha programa ne'e, Partido KHUNTO contente ho programa ne'ebé apresenta husi IX Governo Constitucional. Programa ne'e furak no foca maka'as ba desenvolvimento nacional.

Tempo crise Covid-19 halo povo tomak terus, maibé tempo ne'e liu tiha ona. Partido KHUNTO contente hodi simu no apoia programa ne'e sem reserva. Ami sei fó voto a favor ba programa ne'e. Ha'u hakarak repete tan dala ida, programa ne'ebé monu ba povo nia laran, ami na'in-lima iha-ne'e pronto atu fó apoio sem reserva ba IX Governo Constitucional. Ita-Boot sira bele bolu ami ou la bolu, ami la interesse ba ida-ne'e, ami interesse ba povo nia hakarak ne'ebé fó apoio ba Ita-Boot barak tebetebes, to'o 31 cadeiras. Ami na'in-lima iha-ne'e fó a favor ba Partido CNRT, partido ne'ebé kaer Governo, Senhor Kay Rala Xanana Gusmão, ami fó apoio 100%. Ita-Boot nu'udar ami-nia aman, Ita-Boot nu'udar Timor nia aman, ami fiar katak Ita-Boot sei hala'o desenvolvimento nacional ho di'ak, e tau matan duni ba ita-nia povo ne'ebé iha município 14, e ba ita-nia ema sira-ne'ebé barabarak.

Liuliu mestre sira, matenek-na'in sira-ne'e mai husi professor, ne'e duni tem que aumenta salário ba professor sira atubele fó sira-nia matenek ba ita-nia estudante sira. Aluno sira mai husi professor, iha professor mak iha doutor, iha professor mak, hanesan Ita-Boot, iha Primeiro-Ministro, iha professor mak sai buat hotu-hotu. Ne'e duni Partido KHUNTO husu, liuliu ba Sr. Primeiro-Ministro, atu tau matan ba professor sira, tanba matenek iha sira-nia liman, atu nune'e sira labele

preocupa bá-mai bá-mai, maibé tem que preocupa ba ita-nia estudante sira, tanba Timor nia futuro iha jovem sira-nia liman. Ha'u iha 63 anos, Ita-Boot liu tinan hira, haree ba labarik sira!

Obrigado, Sr. Primeiro-Ministro, ha'u-nia liafuan mak ida-ne'e de'it. Atu simu ka la simu, Ita-Boot atu bolu ka la bolu, ami continua fó apoio ba Ita-Boot nia Governo 101%, la'ós 100%. 101% ami fó!

Sr.^a **Presidente**: — Muito obrigada, Sr.^a Deputada.

Tuirmai, Sr.^a Deputada Cristina Yuri Rebelo.

Sr.^a **Cristina Yuri Rebelo dos S. Costa** (FRETILIN): — Bom dia no obrigada ba Presidente, composição da Mesa, Sua Excelência Primeiro-Ministro, Sr. José Alexandre Kay Rala Xanana Gusmão, no Vice-Primeiros-Ministros, membros do Governo tomak, distinto Deputado no Deputada sira hotu iha-ne'e, ba ita-nia técnico, mídia no povo rai doben ne'ebé agora acompanha hela ita-nia sessão debate ba Programa IX Governo Constitucional nian. Bom dia ba ita hotu dala ida tan.

Bainhira ita simu Programa IX Governo ida-ne'e, e bainhira considera, lê filafali buat ne'ebé hatuur ona iha programa ne'e, hatete kedan iha-ne'ebá katak programa ne'e estabelece no baseia ba Plano Estratégico de Desenvolvimento Nacional (PEDN) 2011-2030.

Programa IX Governo ida-ne'e submete la halai sees mós husi objetivo ne'ebé tau ona iha PEDN, ne'ebé mencionado sai mós hanesan padrão ba desenvolvimento Nação Timor-Leste no alinha mós ho estrutura ne'ebé utiliza husi Governo anterior iha ninia apresentação programa iha VIII Governo Constitucional, ne'ebé aprovado iha julho 2018.

Organização temática husi assunto sira-ne'e menciona iha programa mak hanesan: ida, reafirma ba Estado de direito democrático; segundo, continua ho desenvolvimento husi capital social; terceiro, continua ho desenvolvimento infraestrutura; quarto, continua ho desenvolvimento economia; quinto, continua ho consolidação governativa; no sexto ho boa governação no combate hasoru corrupção.

Sua Excelência Primeiro-Ministro, bainhira ita haree ba programa ida-ne'e, ne'ebé baseia de'it ba PEDN 2011-2030, maka ha'u hakarak atu hatete loloos, infelizmente maior parte husi plano estratégico desenvolvimento ida-ne'e ita bele dehan katak *outdated* ka desatualizado, tanba nia metas barak mak la consegue atinge iha nia curto prazo husi 2011 to'o 2015, no período médio prazo 2016 to'o 2020 ne'e rasik. Husi PEDN ne'e hatudu katak husi metas ne'ebé hatuur tiha ona iha PEDN 2011-2030, metas 200 ne'ebé iha fase primeira, 2011-2015, no meta iha fase segunda, 2016-2020, ne'e iha de'it 26% mak conclui, inclui 46 metas ne'ebé geral liu no la bele sai sasukat. Especialmente ba kedas iha ponto 4, «Continua ho desenvolvimento economia», iha metas ne'ebé hatudu husi ita-nia PEDN 2011-2013, ita atinge de'it 31%, Sua Excelência.

Maibé, hanesan ohin ha'u mós cita no ha'u mós rona rasik, katak Sua Excelência hakarak atu halo revisão filafali ba iha PEDN, ha'u la hatene se atu halo revisão ba PEDN 2011-2030? Ou atu halo revisão ba ida-ne'ebé reajustado tiha ona, ne'ebe mak PEDN hala'o iha 2023 ne'e rasik, que hahú 2023 to'o 2038?

Halai ba assunto hirak ne'ebé ha'u hakarak atu cita iha-ne'e, Sua Excelência Primeiro-Ministro, ha'u sei foca liu ba iha pilar ida-ne'ebé ita ko'alia, kona-ba ponto 4, «Desenvolvimento economia ou desenvolvimento económico».

Iha pilar sira-ne'e mak ha'u sei foca mós pergunta balu que halai liu ba setor tolu de'it iha fatin ida-ne'e.

Primeiro setor ne'ebé ha'u hakarak atu toca, halai liu kedas ba petróleo e recursos minerais, tanba ha'u mós hatene kedas hahú husi compromisso ne'ebé Sua Excelência Primeiro-Ministro hato'o iha nia discurso bainhira toma posse, iha-ne'ebá iha assunto, ponto balu que menciona iha kedan discurso, balu cita ba loron atus ida ruanulu nia laran no balu mós cita husi compromisso ba fulan sanulu resin rua nia laran.

Senhor Primeiro-Ministro, iha página ne'ebé ha'u lê rasik, husi página número 88 to'o número 94 versão tétum nian husi programa IX Governo foca ba Projeto Tasi Mane, ne'ebé composto husi polo desenvolvimento haat: ida, mak desenvolvimento Base Logística iha Suai; segundo, desenvolvimento Refinaria Petrolífera ho Complexo Petroquímico iha costa sul; terceiro, desenvolvimento Fábrica Gás Natural Liquefeito; quatro, desenvolvimento Zona Costeira Sul.

E haktuir mós iha página número 89 katak Projeto Tasi Mane sei hamosu serbisu ou campo de trabalho to'o 10 mil postos de trabalho diretos no 50 mil postos de trabalho indiretos, maibé ohin ha'u contente tanba Sua Excelência Primeiro-Ministro cita katak bele liu 50 mil. Iha-ne'ebá la especifica hatete liu to'o hira, maibé ha'u hakarak atu hatene de'it, husi Sua Excelência Primeiro-Ministro, karik iha base de dados, histórico, no estudos balu que hatudu que permite ba VIII Governo hodi halo projeção ba número ne'ebé temi tiha ona iha assunto ida-ne'e?

Ha'u mós hakat filafali husi polo haat ne'ebé menciona ne'e, ha'u hakarak atu husu ba Sua Excelência Primeiro-Ministro ba IX Governo, katak husi polo desenvolvimento haat ne'ebé temi ona iha leten, ida-ne'ebé sai prioridade ba IX Governo atu halo iha 2023? Tanba iha-ne'e la cita ida-ne'ebé uluk, ne'ebé ikus, ne'ebé tuir, no segundo que la iha *timeline* iha-ne'e, karik Sua Excelência Primeiro-Ministro bele hatete?

No, Sua Excelência Primeiro-Ministro, ha'u mós hakarak atu husu ba Ita-Boot nia governação: sá balanço mak Ita-Boot haree iha VIII Governo halo ona ba setor ida-ne'e hahú husi 2018 no 2023? Tanba questão Tasi Mane ita haree kedas husi 2012 to'o mai agora la iha Governo ida ba contra, hotu-hotu sempre apoia.

Ikusmai, ha'u mós hakarak husu kona-ba polo ida tan, ikusliu, Polo Desenvolvimento Fábrica Gás Natural Liquefeito. Iha-ne'e hatudu katak Governo sei continua haka'as an atu desenvolve gás ne'ebé mai husi *Greater Sunrise* liuhusi construção gasoduto ka kadoras mai iha Timor-Leste. Sua Excelência Primeiro-Ministro, kadoras husi *Greater Sunrise* mai Timor-Leste ne'e questão interesse Estado, sai mós povo tomak nia interesse. Ha'u mós contente bainhira Sua Excelência hatete katak ida-ne'e interesse ema tomak nian, e loos duni, Sua Excelência Primeiro-Ministro, katak ida-ne'e la'ós interesse ema ida nian de'it ka grupo ida nian ka organização ida nian, maibé povo timorense nian.

Ida-ne'e mós hatudu tiha ona hahú kedas husi Governo anterior sira, I Governo to'ó mai VIII Governo iha *commitment* boot hodi hatuur ita-nia posição, katak ita hakarak duni atu dada kadoras mai iha Timor-Leste. E hatudu momoos mós husi VIII Governo Constitucional, ne'ebé ho sira-nia esforço tomak através nia Representante do Estado ba Negociação *Greater Sunrise*, consegue serbisu hamutuk ho Governo Austrália e companhia consórcio sira, ne'ebé la'ó di'ak tebes, e nia resultado foin daudauk ita hotu haree katak iha fulan julho 2023, Ministra Penny Wong, Ministra dos Negócios Estrangeiros, bainhira mai iha Timor-Leste, hatete no hatudu kedan importância no boa vontade husi Governo Austrália atu hatuur no hakarak duni *Greater Sunrise* tem que desenvolve lailais ona hodi bele fó benefício ba Timor-Leste. Maibé, Austrália mós continua hein resultado final husi companhia consórcio, bele mós husi operador hanesan *Woodside*, hodi ko'alia kona-ba opção ne'ebé di'ak liu atu dada kadoras.

Tanba ida-ne'e, tanba Austrália sei hasai nafatin liafuan ida-ne'e, maka ha'u mós iha pergunta ida hakarak atu husu ba Sua Excelência Primeiro-Ministro no ba IX Governo: iha fase tuirmai, saida mak Governo sei hala'ó hodi bele garante no assegura katak kadoras ne'e mai duni iha Timor-Leste? No mós hakarak atu hatene tutan tan: sá estudos mak karik relevantes no halo tiha ona atu assegura katak desenvolvimento campo *Greater Sunrise* ne'e mai duni iha Timor-Leste?

Ha'u halai filafali ba iha setor ida fali que ha'u hakarak atu ko'alia iha-ne'e, halai kedan ba setor do comércio, iha programa barak, hahú kedas husi página número 99, liuliu kona-ba Timor-Leste nia adesão ba ASEAN no WTO (*World Trade Organization*) ka OMK (Organização Mundial do Comércio). Relaciona ho ASEAN no OMK ne'e rasik, ha'u hakarak atu hatene: husi aspeto comércio nian, saida mak sai prioridade ba Governo atu halo hodi bele garante katak Timor-Leste halo tuir duni regras ne'ebé hatuur ona husi organização rua refere?

Iha pilar ida tan husi assuntos economia e desenvolvimento, ha'u hakarak atu hatene kle'an liután ba assunto emprego. Iha programa IX Governo Constitucional, iha setor emprego aposta ba objetivo tolu: ida, mak aumenta oportunidade ba criação emprego; segundo, produz força de trabalho ne'ebé qualificada no orientado ba crescimento económico diversificado ho ação sanulu ne'ebé menciona iha-ne'ebá. Perguntas ida mak ne'e: Governo hakarak aumenta tan número trabalhador timoroan ba estrangeiro hanesan hakerek iha ação número 4, enquanto iha parte seluk Governo mós

sei desenvolve projeto barak ne'ebé bele cria rasik serbisu iha rai-laran, hodi substitui produtos importados no orienta ba exportação. Então, oinsá Governo bele halo balanço ba exportação trabalhador nian ho demanda doméstica iha setor hirak ne'ebé Governo pretende atu halo ou atu desenvolve iha futuro?

E tuir mós dados husi *Internacional Labour Organization* no SEPFPOPE hatudu katak taxa desemprego iha Timor-Leste 5.1%, nune'e mós 30.5% husi jovem ho idade 15 to'o 24 anos mak la participa iha emprego no formação. Iha tinan lima ne'e nia laran, Sua Excelência Primeiro-Ministro, Ita-Boot nia Governo nia projeção atu reduz ba percentagem hira? Ida-ne'e mak ha'u mós hakarak atu hatene. E ikusliu, emprego foun hira mak Governo planeia atu cria durante tinan lima nia laran?

Obrigada, Sua Excelência, ba Ita-Boot sira hotu nia atenção.

Muito obrigada.

Sr.^a **Presidente**: — Distintos Deputados, atu fó hanoin de'it katak revisão do PEDN, ne'ebé VIII Governo halo e menciona iha intervenções dos Srs. Deputados, não chegou a ser discutido nesta Magna Casa por razões de participação de todos os Deputados. Ne'ebe, ha'u hanoin, depende ba Governo iha nia plano quinquenal atu menciona ka lae, depende ba Vossa Excelência Sr. Primeiro-Ministro.

Srs. Deputados, ha'u atu husu permissão deste Plenário, ita *break* bá *snack* 15 minutos, depois ita mai, tanba sei iha Deputados lubuk ida-ne'ebé atu halo intervenção. Ita descansa uitoan, filafali mai halo hotu tiha perguntas, ita fó ba Governo, depois do almoço talvez bele hatán. Se permite, *break* agora, ita filafali mai 15 minutos depois.

Sr. Primeiro-Ministro, ita sei *break* 15 minutos, depois ita filafali mai.

Muito obrigado.

Sessão ne'e suspende iha tuku 10 liu minuto 58 no retoma iha tuku 11 liu minuto 25.

Sr.^a **Presidente**: — Ita hahú fali ita-nia sessão.

Obrigado, Srs. Deputados hola tiha fatin ona.

Tuirmai, Sr. Deputado Luís Roberto.

Se la iha, então tuir kedas ba Sr. Deputado Joaquim dos Santos. Halo favor.

Sr. **Joaquim dos Santos «Boraluli»** (FRETILIN): — Obrigado, Sr.^a Presidente.

Bom dia, Sr. Primeiro-Ministro e membros do Governo, bem-vindo dala ida tan mai Uma-Lisan RDTL, Parlamento Nacional. Bom dia ba colega Deputado sira no ba povo Timor-Leste.

Depois de halo leitura ba iha Programa IX Governo, ha'u iha dúvida balu precisa hetan esclarecimento husi Governo.

Ita kaer ba Senhor Primeiro-Ministro nia discurso ne'ebé sintetiza husi documento Programa IX Governo ninian, liuliu iha página número 4, kona-ba conceito reafirma Estado de direito democrático, bainhira ita ko'alia kona-ba reafirma Estado de direito democrático, referências ba ita-nia comportamento político katak iha buat ruma la loos iha âmbito democracia, tanba ne'e mak iha Programa Governo hamosu conceito ida, iha kedas visão geral ne'e, dehan katak Governo ida-ne'e atu impor normalidade democrática. Tanba ne'e mak iha desagregação ba raciocínio atu impor normalidade democrática, Governo identifica, iha programa ne'e, iha assunto lubuk ida liga ho política, mós liga ho justiça.

Ha'u-nia primeira pergunta atu hetan esclarecimento mak ne'e: bele identifica anormalidade democrática durante década ida-ne'e? Lalika sura de'it husi VIII Governo nia período de governação, sura kedas husi II Governo nia governação, identifica to'ok anormalidade democrática durante ne'e iha to'o Governo hetan conclusão katak iha período VII Governo ho VIII Governo ne'e condiciona anormalidade democrática. Bele identifica mós causas principal e autor da anormalidade democrática?

Pergunta tuirmai: será que durante ne'e ita la consegue hetan resolução ba normaliza democracia iha ita-nia País?

Funcionário sira lora-lora serbisu normal, fulan-fulan simu vencimento la falha, Deputado sira, membro do Governo, Presidente da República, tribunal sira, durante ne'e la'o normal hela, atividade hotu-hotu la'o di'ak hela, de repente IX Governo mosu mai atu impor normalidade política, ne'ebe ba ha'u ne'e dúvida ida. Ha'u duvida boot ho raciocínio ida-ne'e, tanba ne'e ha'u precisa esclarecimento, halo ha'u hanoin fali atu compreende kona-ba conceito Estado. Tuir ema barak hatene, universalmente ema hatene, katak Estado compõe ho elemento haat: rai, povo, leis no Governo e reconhecimento internacional. Será que em termos de Estado, elemento haat ne'e falta ida ka rua ka tolu, ka la iha hotu kedas? Precisamente de repente IX Governo mosu mai impõe normalidade democrática. Ha'u hanoin, povo Timor-Leste tem que compreende conceito ida-ne'e: Estado ne'e saida?

Ita keta hanoin katak Estado ne'e moris iha lalehan de'it e Governo foin mosu iha 2007 mai oin, 2007 mak hahú governação. Portanto, processo ne'e la'o, inicia husi depois de ita restaura independências ne'e, hotu-hotu hamutuk harii Estado ida-ne'e e to'o ohin lora ita debate Programa IX Governo parece que maioria concorda katak durante ne'e democracia iha Timor la funciona, precisamente ho IX Governo mai normaliza democracia iha Timor, ha'u hanoin, ita tem que claro iha-ne'e kona-ba conceito de Estado ho normalidade democrática ne'e.

Segundo ponto, atu liga problema de justiça, IX Governo halo identificação caso lubuk ida iha-ne'e, ha'u foti ida ka rua de'it para hetan esclarecimento, liuliu kona-ba lei ne'ebé cria RAEOA,

ne'e imperativo constitucional, *status* ida-ne'e. Depois hamosu conceito ZEESM e, quando ita aprova lei ne'e tau hamutuk ho programa política economia social de mercado hamutuk ho autoridade RAEOA ne'e consensual, Parlamento ne'e la iha voto contra, de repente IX Governo atu mai halo fali estabelecimento autoridade foun. Atu hamosu autoridade foun iha conceito RAEOA/ZEESM ne'e ita precisa identifica causa saida mak impede ita-nia decisões políticas hodi hamosu RAEOA tuir Constituição ne'e la bele implementa e Governo ida-ne'e hakarak hamosu fali autoridade foun. Ninia impacto político-económico ne'e todan mai Timor tomak ka todan de'it ba iha Oe-Cusse? Ne'e problema ida.

Se Governo ida-ne'e hakarak duni atu halo mudança política, liuliu liga ba iha lei ne'ebé cria RAEOA, ha'u hanoin, ita hotu-hotu bele concorda malu, husu ba povo Oe-Cusse, halo referendo ba Oe-Cusse. Maioria povo Oe-Cusse dehan katak ami lakohi ona autoridade, ami hakarak filafali ba administração de'it, ami lakohi ona ZEESM, então IX Governo precisa cria condição para halo referendo ba iha Oe-Cusse, para povo Oe-Cusse mak decide atu concorda ka la concorda ho decisões políticas ne'ebé anteriormente ita halo e por consenso nacional.

Hanesan ne'e mós liga ba iha Ataúro, IX Governo nia hakarak atu anula tiha fali criação Município Especial Ataúro. Lei ne'ebé ita harii atu hamosu Município Especial Ataúro ne'e tuir mós Constituição, a não ser se decisões ne'ebé sai ba lei ita halo mosu Município Especial Ataúro viola Constituição, ita bele fó razão ba IX Governo hodi bele anula tiha. Mas, conceito jurídico, quando anula ne'e só lori lei mak anula, la'ós lori decisão política no administrativa de'it. Hanesan ne'e mós ha'u ko'alia ba Oe-Cusse, hakarak anula decisões política kona-ba atu hamosu Município Especial Ataúro ne'e tem que referendo! Ne'e Constituição mak husu, povo hakarak ka lakohi. Primeira decisão Parlamento ho VIII Governo foti ne'e baseia ba imperativo constitucional, moris tiha ona e povo contente hakarak ho ida-ne'e, Ataúro ho Oe-Cusse, sira contente durante ne'e. Tanba ne'e mak, ita muda de repente, ha'u hanoin, precisa esclarecimento ida kona-ba efeitos negativos iha mudança ne'e, prejuízo ba Estado no prejuízo ba povo Oe-Cusse no Ataúro

Terceiro ponto, liga ba ita-nia justiça, Governo ida-ne'e hakarak atu halo reforma ba lei barabarak. Ida ba PCIC (Polícia Científica de Investigação Criminal) ne'e atu halo mudança estrutural total, mas ita tem que cuidado didi'ak buat di'ak balu ne'ebé sira halo e existe to'o ohin loron, e ajuda Governo ukun iha estabilidade política. Ne'ebe, mudança ne'e atu ba garante ida-ne'e? Se la concorda ida-ne'e, tuir Constituição, entrega poder ne'e ba Polícia. Uluk kedas, quando atu hari órgão ida-ne'e, Partido FRETILIN la concorda, cria competição entre órgão do Estado iha matéria de investigação criminal. Ita agradece, ne'e hanoin di'ak, Governo hakarak atu hadi'a ida-ne'e, ita agradece, mas tem que tetu didi'ak kona-ba justiça, liuliu investigação criminal. Fó hotu ba Polícia ou fó ba iha Ministério da justiça, mas tem que tetu halo didi'ak tanba uluk decisão ne'e proposta mai husi Governo

ida ne'ebé Senhor Primeiro-Ministro Xanana rasik mak iha altura ne'ebá lidera e ohin loron hakarak halo mudança, graças a Deus.

Lei da Organização Judiciária, hakarak halo reforma, Senhor Primeiro-Ministro, ha'u hanoin lei ne'e ita implementa lai, la'ó lai, ita regista lai ninia incumprimento ruma mak ita halo emendas, tanba iha lei ne'e fó prazo ba instalação órgão judiciário sira, até tribunal supremo ho tribunal recurso sira-nia prazo estabelecido, iha lei ne'e. Norma ida atu hodi cria condição ba estabelecimento tribunais primeira instância, tribunal recurso e tribunal supremo la'ó hela, em curso, atu implementa daudaun, de repente Ita-Boot nia Governo mai halo alteração ba lei sira-ne'e, ha'u hakarak hatene: sá problema mak mosu iha lei ne'e e la bele aplica hodi garante processo de criação dos tribunais e formação do juiz ho sira seluseluk tan? Lei ne'e foin moris, seidauk tinan lima, implementação la'ó hela e comissão de recrutamento e administração hodi forma tribunal sira-ne'e sei hala'o hela serviço, implementação sira prepara hela atu harii condição sira-ne'e, husi VIII Governo nia tempo mai e que podia IX Governo garante de'it processo ne'ebé existe ona, mas o IX Governo hakarak halo reformulação, halo reforma. Ita hakarak hatene: causa principal ne'ebé impede processo ne'e mak saida?

Atu remata ha'u atu frisa buat balu. Tuir ita-nia experiência histórica ne'ebé ita iha, to'ó ohin loron IX Governo, e tuir ha'u-nia registo, to'o agora ne'e só governação rua de'it mak ukun to'o hotu, durante tinan lima, IV Governo ho VIII Governo. Ida-ne'e! IV Governo, quando CNRT ho PD fahe malu, FRETILIN ba halo incidência parlamentar pontual e garante governação ba to'o hotu. To'ó iha VIII Governo, quando CNRT, PLP ho KHUNTO fahe malu, tanba interesse Estado, FRETILIN avança halo viabilização tuir imperativo constitucional para Governo ne'e bele la'ó to'ó rohan, e to'ó rohan duni, to'o tinan lima. E existência IV Governo ho VIII Governo, quando ho FRETILIN nia presença, garante duni estabilidade política e económica.

Agora, IX Governo haluha tiha, haluha tiha e la temi iha-ne'e e buat sira-ne'ebé VIII Governo halo, e temi de'it mak II, III, IV e VI Governo. Be VIII Governo nia obras durante ne'e? E ita keta haluha katak VIII Governo ne'e hahú ho política AMP ne'ebé hetan fiar husi povo, e programa político ne'ebé ohin loron ita repõe filafali ne'e balu VIII Governo halo e povo contente, povo contente! Por exemplo, UKL (Uma Kbiit Laek) ne'e la iha população ida dehan katak ida-ne'e la di'ak, e sira halo comparação, UKL di'ak liu fali uma MDG (*Millenium Development Goals*). Tanbasá mak la menciona ponto positivo sira-ne'ebé durante ne'e VIII Governo halo? Ita haluha tiha, ita considera estagnado, para impõe normalidade democrática tanba irregularidades. Ne'ebe ha'u seidauk entende irregularidades ida-ne'ebé impede política desenvolvimento e IX Governo mai ho ninia hanoin ida atu hadi'a tiha irregularidade.

Sr.^a Presidente Parlamento, Sr. Primeiro-Ministro, ha'u-nia intervenção ba ohin dadeer ida-ne'e mak ne'e. Ha'u hein katak bele hetan resposta, depois ha'u sei halo *replay*.

Obrigado.

Sr.^a **Presidente**: — Muito obrigada, Sr. Deputado.

Tuirmai, Sr. Deputado Luís Roberto.

Sr. **Luís Roberto da Silva** (KHUNTO): — Obrigado, Sr.^a Presidente Parlamento Nacional.

Bom dia ba Ita-Boot, membro da Mesa tomak. Bom dia Sua Excelência Senhor Primeiro-Ministro ho ninia membro tomak, colega Deputado e Deputada sira, audiência tomak e povo doben Timor-Leste.

Depois de atan ha'u acompanha tiha IX Governo ninia programa, rona mós Sua Excelência Primeiro-Ministro nia discurso ne'ebé ohin ita ultrapassa tiha ona, ha'u acompanha capaz no furak tebetebes. Maibé, nu'udar geração foun, triste tanba ita, Timor-Leste, restaura ita-nia ukun an ne'e ba 21 anos, maibé ita-nia infraestrutura básica sira seidauk alcança 100%. Hanesan bee moos, estrada, eletricidade, ne'e hanesan infraestrutura básica, ita restaura ita-nia ukun an ne'e 21 anos mas seidauk alcança, ida-ne'e mak, nu'udar geração foun, halo ha'u triste.

Segundo, halai ba setor agricultura, programa ne'e capaz, iha-ne'e ha'u cita balu, katak IX Governo nia plano ita bele hasa'e produção hare ne'e ba 70% quando to'o 2028, e depois, estabelece mós instituição ida ba técnico sira atu halo sira-nia serbisu ho di'ak liután. Maibé, ita haree ba natar sira iha território laran tomak ne'e, ne'ebe estratégica atu produz ai-han ne'ebé di'ak, liu-liu hare, ita-nia população halo tiha uma iha laran.

Ha'u fó exemplo, hanesan iha Maliana, natar lubuk ida mak halo tiha uma iha laran. Ba parte Baucau, Vemasse, Laga, Manatuto mós hanesan. Tanba ida-ne'e mak ita-nia plano ba oin ne'e hanesan ne'ebé? Ita atu hasa'e produção hare ne'e ba 70%, ita foti husi ne'ebé? E depois, Governo anterior ne'ebé cria *bendungan* ou irrigação mós balu abandonado hela, balu aat hela la consegue hadi'a. Então, ida-ne'e mak halo nu'usá ita bele hadi'a, ha'u fiar katak IX Governo ida-ne'e bele cria iniciativa di'ak hodi bele hadi'a gestão ida-ne'e.

Ikusliu mak ha'u halai filafali ba setor justiça, Segurança ho Defesa ninian, iha-ne'e IX Governo nia hakarak, Excelência Senhor Primeiro-Ministro nia hakarak rasik, atu halo reforma iha PCIC. Maibé, uluk Maun-Boot nia iniciativa quando cria ida-ne'e, tanba iha ita-nia PNTL processo investigação la'o la di'ak, então Maun-Boot rasik mak cria iniciativa ida-ne'e iha 2015 ou 2016, se ha'u la sala, cria PCIC atu ajuda processo investigação iha ita-nia rai-laran. Maibé, agora daudaun ita iha plano atu halo reforma PCIC atu tutela filafali iha Comando Geral, di'ak ka lae ba futuro? Tanba durante PCIC estabelece, Maun-Boot nia iniciativa e iniciativa mós Constituição prevê, atu melhora liután setor justiça mós investigação especial sira. Ne'ebe ita-nia timoroan 70 pessoas ne'ebé serbisu iha-ne'ebá profissional tebetebes, maibé agora ita atu reforma, ida-ne'e, ba ha'u nu'udar geração foun, sei duvida. Reestrutura, sim! Quando reestrutura iha superior PCIC, sim! Ita concorda, maibé quando reforma, ita sei duvida, quando iha Comando Geral nia tutela. Tanba saida mak la mantém ida-ne'e ho

tutela iha justiça nia okos para melhora liután ita-nia setor justiça? Ne'ebe precisa explica kle'an ba ami, nia vantagem no desvantagem. Quando reforma PCIC, nia vantagem mak saida? Tanba nia desvantagem mak ha'u foin ko'alia. Iha Governo anterior ne'ebá iniciativa Maun-Boot nian rasik cria ida-ne'e hodi ajuda tan polícia nia serbisu, tanba polícia nia serbisu momento ne'ebá investigação la' o sabra'ut hela. Karik ita reforma iha setor justiça mak atu reforma tan iha PCIC, kona-ba nia vantagem no desvantagem precisa explica kle'an hodi bele compreende. Pergunta ida-ne'e mak ha'u hakarak husu ba Sua Excelência Sr. Primeiro-Ministro atu ko'alia, tanba ketahalobé PCIC ne'e ita reforma tiha ba tutela iha Comando Geral nia okos, depois ita-nia população ne'e bele generaliza, bele interpreta la tuir nia dalan karik. Keta aat ou pior liután karik quando reforma iha PCIC ninian. Ida-ne'e mak ha'u hakarak husu ba Sua Excelência Senhor Primeiro-Ministro hodi bele explica.

Ikusliu mak ba iha setor educação, ne'e chave importante tebes atu halo desenvolvimento ne'e ba oin, ita precisa hadi'a ita-nia curriculum *internal*. Hadi'a mós ita-nia professor sira-nia futuro, tanba balu serbisu to'o tinan ba tinan to'o reforma tiha de'it mós mak nafatin hanesan ne'e. Ha'u fiar katak iha Maun-Boot nia liderança ida-ne'e bele hadi'a ida-ne'e. Ba setor educação, agricultura, segurança no defesa, e setor justiça ita precisa hadi'a.

Iha-ne'e, quando ha'u acompanha, quando iha setor justiça atu reforma, atu hadi'a nia sistema, ne'e sim! Ne'e precisa hadi'a duni, para ita timoroan ne'e hotu-hotu iha acesso ba iha lei ne'e, acesso ba justiça ho di'ak, selae mak balu sai vítima filafali ba justiça.

Ne'e mak ha'u-nia pergunta ba Sua Excelência Senhor Primeiro-Ministro, maibé ba programa ida-ne'e ha'u aprecia nafatin. E, ha'u foti lema ida discurso Sr. Primeiro-Ministro nian dehan katak «Mai ita pró-ativo atubele alcança ita-nia desenvolvimento nacional ba futuro». La'ós pertence ba Governo ida-ne'e ninian la'ós ba Deputado sira-nian e la'ós ba órgão ida ninian, ita hotu ninian, interesse nacional ne'e, importante loos ba ita. Mai ita pro-ativo! E, husu mós ba Deputado na'in-65 atu sério iha fiscalização para bele alcança programa ne'e ho di'ak, para bele tau ba implementação. Selae mak programa ne'ebé furak, quando implementação fraco, depois de cinco anos mós ita hakdasak nafatin, fisicamente sei la mosu buat ida.

KHUNTO mai atu hakarak hadi'a duni desenvolvimento nacional, tanba ita ukun an 21 anos maibé ita-nia infraestrutura básica sira seidauk alcança.

Ida-ne'e mak ha'u hakarak hatu'o e obrigado barak, Sr.^a Presidente.

Sr.^a **Presidente**: — Muito obrigado.

Tuirmai, Sr.^a Deputada Maria Angélica Rangel.

Sr.^a **Maria Angélica Rangel da C. dos Reis (FRETILIN)**: — Muito obrigada, Sr.^a Presidente.

Bom dia Sr.^a Presidente, ba ita tomak.

Excelência Sr.^a Presidente do Parlamento Nacional, Vice-Presidentes, Secretária da Mesa, colega Deputado sira hotu, Sua Excelência Senhor Primeiro-Ministro no membro Governo tomak, no mós ba povo Maubere tomak, hakarak hato’o parabéns ba povo tomak hodi fó ona legitimidade ba Partido CNRT hodi ukun.

Ohin Parlamento Nacional hahú halo debate ba Programa IX Governo Constitucional, programa ne’ebé, quando ita lê didi’ak, la iha diferença boot no espelha ba programa lubun ida husi VIII Governo nian.

Senhor Primeiro-Ministro, fragilidade Estado ida-ne’e nian ita balu kala hanoin dehan foin sente iha VII no VIII Governo nia tempo ka nia ukun. Iha política, bainhira ita hakarak justifica buat ruma no hasees an husi falhanço ruma, la iha liafuan seluk, ita sempre buka comparação entre ita ho ema seluk. Maibé, dala barak liu ita-nian mak loos, ita-nia mak di’ak no ita-nia definição mak perfeita liu.

Ha’u começa husi página número 5, parágrafo terceiro, ho citação ho lian português dehan nune’e, iha programa ne’e: «Perante este desafio, iremos continuar a investir entre as áreas fundamentais, capital social, capital de desenvolvimento e infraestrutura, e desenvolvimento económico, alicerçados num quadro institucional eficaz que contribua para eliminar a corrupção e a burocracia excessiva e que por outro lado promove a competência, o profissionalismo, a honestidade, a transparência». Vide, dada husi capital social, desenvolvimento infraestrutura, desenvolvimento económico husi IV, V, VI Governo nian hodi compara ho VII no VIII Governo nian, liuliu tabela ne’ebé organização internacional fó-sai ka ko’alia kona-ba corrupção no haree modelo burocracia excessiva ne’ebé uluk nian hodi compara entre situação IV, V, VI ho VII no VIII Governo nia política.

Ita haree dados ne’ebé ohin colega sira ko’alia hotu ona, *ranking* corrupção ne’ebé aas tebes husi 2006 to’o iha 2016 iha por volta de 7 tun to’o iha 2016 iha 65%. Hahú fali husi 2017 to’o 2022, tuun to’o iha 58% ne’ebé melhora ona tanba ukun ho regras no la’o tuir. Maibé la’ós regras de’it, la’ós lei de’it, mentalidade dos governantes mak importante hodi hatún *ranking* corrupção sira-ne’e.

Haree mós husi dados número desemprego hodi halo análise comparativo atubele foti veracidade, hodi hatene sira-ne’ebé abandona escola husi 2007 to’o 2016 ou to’o 2017, hodi ba buka serbisu, nível educação sira-nian oinsá, formação profissional oinsá, compara ho resultado prestação no assistência ne’ebé VII no VIII Governo halo durante sira-nia mandato ho tempo ne’ebé curto tebes, Senhor Primeiro-Ministro.

Compara mós dados husi infraestrutura, no sukat nia benefício curto, médio no longo prazo nian oinsá? Exemplo, ba estradas ou projetos infraestruturas barak ne’ebé VII Governo, maski ho duodécimo de’it, consegue resolve balu. Empréstimo ne’ebé halo ba loke estradas ne’e nia benefício oinsá? Processo devolução das dívidas ne’e oinsá ona no nia sustentabilidade projeto hirak ne’e oinsá?

Água potável no saneamento, ho tempo naruk nia laran iha mandato anterior ne'e nia processo de instalação atinge percentagem hira ona? Compara ho política VII no VIII Governo ho BTL, E.P. iha período de tempo ne'ebé curto tebes iha diferença ka lae?

Excelência Senhor Primeiro-Ministro no povo Maubere tomak, tebes, Timor-Leste tem que hamriik ho economia ne'ebé moderna, diversificada no próspera, sei halo husi dalan construção setores industriais, estratégicos no transformadores.

Indiscutível, Senhor Primeiro-Ministro, se la sala visão política ida-ne'e contempla ona iha documento ida uluk naran PEDN, ne'ebé hatuur loloos metas no tempo ba execução plano 2011 to'o 2030.

Pergunta mak ne'e, Senhor Primeiro-Ministro: indústria estratégica no transformadora hira mak harii tiha ona iha tempo uluk ukun iha 2007 to'o 2016 ou to'o iha 2017? Mercado hira iha aldeias no sucos? Ninia condição oinsá? Iha tempo ne'ebá, ho viabilização tomak husi partido hirak ne'ebé hetan assento iha Parlamento Nacional, ho recurso financeiro ne'ebé abundante tebes ho situação política no segurança ne'ebé estável tebes, garantia ba estabilidade governativa, maibé nia resultado saida?

Agricultura, pescas, pecuária no recursos florestais sai nu'udar fontes rendimento no alimentação ne'ebé crucial duni ba desenvolvimento, iha tempo hirak-ne'e, iha IV, V, VI Governo nia ukun tansá prioridade hirak-ne'e la desenvolve?

Ha'u sei hanoin slogan ida furak tebes, Senhor Primeiro-Ministro, «Povo kuda, Governo sosa», setor hirak-ne'e ninia desenvolvimento no nia sustentação oinsá molok iha 2017 povo fó fali ukun ba iha FRETILIN?

Excelência Senhor Primeiro-Ministro, povo Maubere tomak, husi política ne'ebé IV, V, VI Governo apresenta no aprova iha Parlamento Nacional, ne'e setor ida-ne'ebé husi hirak temi iha leten ho *slogan* furak, «ne'ebé hatama rendimento ba Estado», iha mudança ruma ba economia base ka lae?

Ho equipamentos no tratores ne'ebé agora sai tiha hotu ona *besi tua* ne'e, hein katak atual Executivo sei la sosa tan tratores foun, maibé ho política de poupança ne'ebé IX Governo iha, sei hadi'a filafali trator hirak-ne'e no halo distribuição equitativa tuir duni categoria ho necessidades ne'ebé agricultor sira apresenta, haluha tiha cor tanba população base precisa equipamentos modernos atubele usa halo to'os no natar.

Turismo, hanesan setor chave ida mós, tem que sai investimento prioritário tanba nia apresenta perspectiva mudança rápida ba desenvolvimento económico país ida nian. Lihosi ninia beleza, diversidade no localização estratégica Timor-Leste nian ba mundo, ha'u hatene katak setor ida-ne'e sei fó atividade laboral permanente no sazonal ba ema, liuliu jovem sira.

Ha'u lembra, foin lailais iha entrevista ida, jornalista ida dehan, «*Pemerintah baru tapi dengan muka-muka lama*», bele ka lae iha tempo ne'ebá apresenta solução ba setor chave ida-ne'e ho setores

produtivos seluk hodi hadi'a situação económica no acelera desenvolvimento ne'ebé iha equilíbrio no sustentado ba povo no País ida-ne'e.

Excelência Senhor Primeiro-Ministro, membro do Governo tomak no povo doben maubere tomak, iha página número 118 Programa IX Governo Constitucional, ko'alia kona-ba orçamento por programas, dehan nune'e: «Verificou-se nestes últimos cinco anos que o VIII Governo não provou ter alguns programas para o desenvolvimento do país, tendo surgido vários pacotes de medidas de despesas absolutamente irrelevantes que só levará o Estado a entrar em despesas supérfluas e inúteis, indicadores de corrupção», Sr. Primeiro-Ministro la hatudu indicadores ruma que bele sai nu'udar base ba justificação ida-ne'e, lakohi hatene nia implicação mai husi saida no husi ne'ebé.

Ita hakiduk uitoan ba kotuk atubele haree ho certeza ba base ka acontecimento hirak ne'ebé provoca tempo ne'ebá, hanesan estabilidade governativa ne'ebé Sua Excelência rasik mak inicia hodi forma VIII Governo ho naran AMP versão I, bloco coligação ida-ne'ebé constitui husi CNRT, PLP no KHUNTO, e ikusmai CNRT rasik mak chumba tiha orçamento ida 2020 no afeta duni ba normalidade funcionamento órgão Estado nian.

Buka mós haree situação hirak ne'ebé acontece iha tinan hirak tuituir malu, iha 2019 to'o 2022 hanesan ita hotu hatene, começa ho pandemia Covid-19 ne'ebé afeta mundo tomak, inclui Timor-Leste. Iha 2021, ohin Sr. Primeiro-Ministro nia declaração mós reconhece, Nação hasoru inundação boot, calamidade nacional, ne'ebé lori estragos no implica mós despesas inesperadas la tama iha OGE, maibé consegue ultrapassa, ita fila ba normalidade e população hala'o hikas nia atividade hanesan baibain.

Situação crucial hirak-ne'e halo com que VIII Governo ho Estado tomak tem que foti decisão extraordinária hodi aprova osan atu responde situação imediata ba calamidade ne'ebé ho urgência liuhosi despesas Estado nian.

Concretamente, VIII Governo Constitucional harii Centro Integrado de Gestão de Crise ne'ebé liderado husi Brigadeiro Aluk Descartes no coliderado husi Comodoro Pedro Klamar Fuik, atual Ministro da Defesa. Ação hirak-ne'e hotu hatudu seriedade, responsabilidade no integra an tomak husi VIII Governo Constitucional ba causa nacional ida.

Iha intervenção ne'ebé VIII Governo halo consegue reduz número de óbitos no lori filafali esperança ba cidadão sira atu moris iha tranquilidade no sente orgulho tanba iha órgão Estado nian mak dispõe nia an tomak hodi fó tulun ba cidadão sira bainhira mosu ameaça ruma hasoru sira-nia moris.

Excelência Sr. Primeiro-Ministro, membro Governo tomak no povo maubere tomak, haree ba organização índice programa ne'ebé IX Governo Constitucional nian hatudu semelhança ho programa VIII Governo Constituição nia, ita reflete didi'ak iha de'it mudança balu ne'ebé kmaan loos, mak

Combatentes Libertação Nacional ne'ebé Sua Excelência Primeiro-Ministro rasik reconhece atu tau fali fundos ba iha ita-nia veterano sira.

Economia azul, desenvolvimento ba estudo geológico ba setor minerais no política monetária, significa katak programa IX Governo Constitucional nian sai nu'udar reflexo husi programa VIII Governo Constitucional nian. Tanbasá? Reconhece mérito VIII Governo Constitucional nian, maibé tanba la suficiente atu executa, tan ne'e IX Governo Constitucional mai hatutan tan de'it, ita bele justifica.

Atu conclui, Sr.^a Presidente, Sr. Primeiro-Ministro, colega Deputado no povo maubere tomak, atu husu perguntas ba iha Sua Excelência Primeiro-Ministro. Ohin iha discurso ko'alia nune'e: «Atu halo auditoria ba RAEOA no ZEESM». Sr. Primeiro-Ministro, ami simu tiha ona auditoria ne'ebé husi Tribunal de Contas no mós iha relatório contraditório ne'ebé Tribunal de Contas halo tiha ona ba iha Oe-Cusse. Karik Ita-Boot ba halo tan, agradece!

Sr. Primeiro-Ministro, oinsá ho auditoria ne'ebé resulta ba ita-nia Estado lakon osan barak hanesan relatório TL Cement, relatório Porto Naval Hera, gerador boot tolu ne'ebé sosa iha tempo ne'ebá, maibé la usa, relatório Tribunal de Contas kona-ba Jetty Hera, relatório kona-ba *Light House*, relatório kona-ba uma MDG's, sira-ne'e bainhira mak halo? E balu deteta ona katak ne'e crime e membro Governo e ema sira-ne'e halai lakon to'o agora seidauk mai.

Ikusliu, Sr. Primeiro-Ministro, ohin Ita-Boot nia programa ne'e capaz tebes, maibé mai ho alteração lubuk ida hanesan alteração ba leis estruturantes ne'ebé requiere consenso, hanesan Lei RAEOA, Lei Câmara de Contas, Lei de Enquadramento de Gestão Financeira, que agora la existe ona e revogado tiha ona, agora existe mak Lei Enquadramento Orçamental, que iha artigo ida ko'alia kona-ba «Orçamento por Programa» ne'ebé Sua Excelência rasik mak dehan katak sei continua orçamento por programa, ha'u louva ida-ne'e, Sr. Primeiro-Ministro.

:Ikusliu, Sr. Primeiro-Ministro, ha'u hakarak husu pergunta ida: atu halo alteração ba Lei Dívidas Públicas ho definição títulos *bonds*, títulos *bills* no títulos *notes* ne'e, será que ida-ne'e mós sei halo alteração ba Lei Fundo do Petróleo? Tanba ida-ne'e ko'alia kona-ba fundo soberano Nação nian.

Ha'u hanoin, ida-ne'e de'it mak ha'u hakarak husu, ami FRETILIN sempre dehan: «Hamutuk ita bele».

Muito obrigada, Sr.^a Presidente do Parlamento Nacional.

Sr.^a **Presidente**: — Obrigada.

Tuirmai, Sr.^a Deputada Cedelízia Faria.

Sr.^a **Cedelízia Faria dos Santos** (CNRT): — Muito obrigada, Sr.^a Presidente Parlamento Nacional.

Uluknanain ha'u hato'ó ha'u-nia respeito ba Ita-Boot no ha'u-nia boa tarde ba Ita-Boot ho composição da Mesa.

Ha'u-nia respeito no hakru'uk boot ba Sua Excelência Primeiro-Ministro IX Governo Constitucional, Maun-Boot Kay Rala Xanana Gusmão, ba Primeiro Vice-Primeiro-Ministro no Ministro Coordenador dos Assuntos Económicos no Ministro do Turismo e Ambiente, Excelência Sr. Francisco Kalbuadi Lay, Segundo Vice-Primeiro-Ministro e Ministro Coordenador dos Assuntos de Desenvolvimento Rural, Excelência Sr. Mariano Assa-Nami Sabino, distintos Deputados, elenco governamental, audiência sira-ne'ebé acompanha hela iha Plenária ida-ne'e, maluk haree-na'in, karik sintoniza transmissão direta, mídia no povo doben Timor-Leste.

Atu começa ha'u-nia intervenção, uluknanain ha'u hakarak hato'ó ha'u-nia parabéns ba Sua Excelência Primeiro-Ministro ne'ebé mai ho nia membro Governo, ne'ebé maioria mesak jovem de'it. Ne'e hatudu katak Ita-Boot iha duni hanoin di'ak hodi transfere ou transmite governação ida-ne'e ba mós ita-nia jovem sira, ho ida-ne'e ha'u hakarak hato'ó ha'u-nia parabéns dala ida tan.

Agora daudauk ita moris hela iha ciclo milenial, iha-ne'ebé mundo adapta ona sistema ODS ou Objetivos Desenvolvimento Sustentável, ne'ebé implementa começa husi tinan 2015 to'ó 2030.

Ita-nia Rai doben Timor-Leste, hanesan ohin ita-nia colega Deputado sira-ne'e mós hatete, katak ita mós adapta ita-nia Plano Estratégico Desenvolvimento Nacional, ne'ebé ninia implementação husi 2011 até 2030.

Bainhira ha'u lê Programa IX Governo ida-ne'e, ha'u bele hatete iha-ne'e katak Programa IX Governo Constitucional ida-ne'e di'ak tebes tanba implementa duni saida mak hakerek iha ita-nia plano estratégico, ne'ebé baseia ba, ita dehan, *local content* ou conteúdo local no mós adapta tebes ba sistema moderado no sustentável ne'ebé hakerek loloos iha ODS. Tanba ne'e, ha'u hakfodak uitoan bainhira ha'u rona ita-nia colega Deputada balu hatete dehan programa Governo ida-ne'e la baseia ba ODS. Ha'u hanoin, Ita-Boot ohin ladún acompanha discurso husi Sua Excelência Primeiro-Ministro ninian, iha-ne'ebá mós cita ninia meta número hira kedas, meta número 6 no seluk tan. Ida-ne'e hatudu katak programa Governo ida-ne'e, loos duni, nia mós baseia ba ODS husi tinan 2015 até 2030.

Ha'u acompanha mós ita-nia Deputado balu ne'ebé hatete katak programa IX Governo ida-ne'e maioria foti husi Programa VIII Governo Constitucional nian. Loos duni, tanba maioria programa iha VIII Governo ne'e na'in mós mak Partido CNRT ne'ebé hola parte mós iha Governo ida-ne'e no Partido no Bancada CNRT mak bancada ida-ne'ebé halo mós aprovação ba Programa VIII Governo ida-ne'e, la'ós hanesan Bancada seluk ne'ebé vota contra tiha programa VIII Governo, ikusmai sai fali viabilizador ba programa refere.

Ha'u hakarak hatete, responde uitoan ba Deputado balu ko'alia katak entre 2017 to'o 2023 hanesan período estagnação ida, tuir loloos ne'e ita lalika husu malu, husu pergunta ba malu kona-ba assunto ida-ne'e tan tanba ita hanoin katak período ne'e liu ona. Maibé, tanba Deputado balu hakarak husu, então di'ak liu ha'u fó hanoin uitoan de'it. Ita timoroan la iha sala ida atu ita fó hanoin ba malu.

Se ita haree filafali ba kotuk uitoan, começa husi tinan 2017 ne'ebé Governo ida la manán ona maioria iha eleição, obriga avança ho Governo minoria ne'ebé resulta programa la pasa, maski momento ne'ebá iha ona Aliança Maioria Parlamentar foun, maibé ita-nia Presidente cessante avança ba eleição antecipada. Resultado husi eleição antecipada fó ona fiar ba Aliança Mudança ba Progresso hodi kaer ukun. Maibé, ita hotu acompanha, ita-nia Presidente República cessante lakohi fó posse ba membro Governo husi Partido CNRT no Partido KHUNTO ho razão no alegação ida-ne'ebé ladún moos.

Ikusliu, ita haree, depois de tinan lima mós ita-nia membro Governo indigitado ne'ebé la fó posse, sira la hetan condenação ida husi Tribunal. Tuir loloos sira mós iha direito atu levanta caso hodi hetan naran di'ak ba sira, maibé ami agradece ba povo doben Timor-Leste tanba sira mak tribunal ida-ne'ebé di'ak liu, tanba sira mak julga ona no iha tinan 2021 ita iha ona ita-nia Presidente da República foun.

Ha'u hanoin, situação sira-ne'e tuir loloos ita lakohi ko'alia, maibé ita precisa duni halo esclarecimento di'ak ba povo hodi bele hatene.

Ko'alia kona-ba chumba ba OGE 2020, ha'u hanoin, momento ne'ebá Bancada CNRT fó nia votos abstenção, bancada seluk mós contribui ho vota contra, ne'ebé Orçamento 2020 la passa iha Casa Magna ida-ne'e. Iha razão lubuk ida maka Bancada CNRT considera hodi la fó ninia votos a favor tanba iha mudança ba sistema ne'ebé durante CNRT nia ukun tau tiha ona iha fatin, ikusmai programa sira-ne'e la la'o tuir nia dalan, tanba ne'e mak Bancada CNRT fó nia votos abstenção atu fó hanoin ba Governo naquela altura hodi bele tau fali sasán ba fatin.

Ha'u hakarak ko'alia iha-ne'e mós katak índice corrupção sira-ne'ebé tau, ne'e mós la'ós dados ida ka la'ós buat ida atu hatete katak governação anterior ne'e di'ak tebes, tanba índice sira-ne'e mai husi organização internacional sira. Keta haluha katak Partido CNRT iha ninia *commitment* boot hodi combate corrupção, tanba ne'e mak iha ninia ukun harii ona organização lubuk ida hanesan CAC (Comissão Anti-Corrupção) no seluk tan hodi combate corrupção.

Ita dehan katak programa baseia ba orçamento ne'ebé VIII Governo adapta no mai iha IX Governo ida atu iha continuação, sim, ha'u concorda ho orçamento baseia ba programa, maibé ha'u mós confusão uitoan tanba iha iha LEO, Lei Enquadramento Orçamental, ita halo tiha orçamento baseia ba programa, maibé iha lei LEO ne'e rasik, nia fó oportunidade ba Governo atu halo transferência ou *virement* 100% sem liuhosi Parlamento Nacional. Ha'u hanoin, condição rua ne'e la condiz ba malu, tanba ne'e ha'u concorda tebes ho plano e Programa IX Governo ida-ne'e hodi halo

filafali alteração, hodi sincroniza entre LEO ho Lei Gestão Financeira ne'ebé menciona mós iha Programa IX Governo ida-ne'e nian. Tanba ne'e, ha'u hanoin, ha'u fó hanoin mós ba Governo ida-ne'e, halo favor ida, labele renova fali erro ne'ebé Governo anterior comete ona, tanba tau tiha orçamento baseia ba programa, maibé bainhira halo *virement*, la considera ba programa sira-ne'ebé iha tanba haree de'it ba orçamento ne'ebé aloca ona. Tanba ida-ne'e, bainhira ita halo *virement* ou transferência haree de'it ba orçamento, la considera ba ninia programa, ne'e sei fó impacto boot tebetebes ba programa ne'ebé traça tiha ona. Ha'u hanoin, situação ida-ne'e iha governantes anteriores la'ós acontece de'it ba iha linha ministerial, maibé acontece mós iha órgão segundo ida-ne'e. Tanba ne'e, dala ida tan ha'u hussu atu Governo ida-ne'e, ba oin tem que haree didi'ak no ha'u concorda tebes se ita halo alteração ba lei LEO no lei seluk ne'ebé iha relação ho Orçamento.

Ha'u mós concorda ho Programa IX Governo nian ne'ebé serbisu hamutuk ho Banco Central Timor-Leste hodi promove desenvolvimento ba setor financeiro. Governo ida-ne'e mós iha iniciativa di'ak tebes hodi harii Banco de Desenvolvimento Timor-Leste ou BDTL hodi bele fó acesso financeiro ho tempo naruk, ho taxa de juros ne'ebé acessível, tanba banco ida-ne'e sei fó oportunidade ba empresa Timor hodi hamriik, emprega ba ema barak harii infraestrutura, ho ida-ne'e, automaticamente sei contribui mós ba diversificação economia. Maibé, ha'u mós hakarak fó hanoin ba Governo atubele cria equipa ida-ne'ebé forte hodi acompanha nafatin ita-nia maluk timoroan sira-ne'ebé foin atu começa sira-nia emprego ba nia an no nia equipa, fó formação ba ita-nia maluk timoroan sira, halo controlo ba sira-nia *business* ki'ikoan sira-ne'e atu nune'e sira labele monu ba laço sira-ne'ebé ladún di'ak.

Nune'e mós, ha'u hanoin, Ita-Boot sira-nia programa ida-ne'e hanoin di'ak tebes ba banco nacional, Banco Nacional de Comércio de Timor-Leste, ne'ebé ohin ita-nia Primeiro-Ministro iha nia discurso mós ko'alia ona buat lubuk ida, hodi melhora di'ak liután ba BNCTL ida-ne'e. Maibé, ha'u mós hakarak fó hanoin liuliu kona-ba atendimento ba ferik katuas sira-nian karik, ha'u hussu, ba oin Governo mós tem que tau matan ba assunto sira-ne'e.

Iha parte seluk, ha'u mós hakarak ko'alia uitoan kona-ba ita-nia..., maski agora ita ko'alia ba Programa, maibé ha'u hatene iha tempo badak Governo sei lori nia Orçamento Retificativo mai no mós tuir bá LEO (Lei de Orçamento de Estado) iha dia 1 de outubro, sei lori mós...

Sr.^a **Presidente**: — Conclui, Sr.^a Deputada!

Sr.^a **Cedelízia Faria dos Santos** (CNRT): — Está bem, eu vou concluir.

Ho ida-ne'e ha'u hanoin katak Programa ne'e capaz tebes, ba ami sente katak orgulho no ha'u fiar katak baseia mós ba artigo 110.º Constituição RDTL ne'ebé hussu Parlamento atu fó voto confiança ba IX Governo Constitucional ida-ne'e, ha'u fiar Deputado sira sei fó sira-nia votos a favor

tanba ita hotu hadomi ita-nia povo no ita hotu hakarak ita-nia rai doben Timor-Leste tem que la' o ba oin.

Ikusliu, ha'u conclui ha'u-nia intervençãu, ha'u hakarak lei sai fali saida mak hakerek ona iha Programa IX Governo ida-ne'e ne'ebé afirma katak «Se natureza ne'e rico, povo la bele sai kiak».

Obrigada barak.

Sr.^a **Presidente**: — Muiíssimo obrigada.

Srs. Deputados, ha'u husu atu haree katak iha ponto 8 do Guião, não pode exceder 10 minutos. Molok atu fó ba intervençãu dos Srs. Deputados, iha pedido de ponto de ordem husi Sr.^a Deputada Olinda Guterres, mas husu para fundamenta. Atu husu explicaçãu ka oinsá?

Halo favor, um minuto.

Sr.^a **Olinda Guterres** (KHUNTO): — Di'ak, Sr.^a Presidente do Parlamento Nacional.

Ha'u husu ba membros Governo ne'ebé agora daudaun completo iha-ne'e, ida-ne'ebé tutela ba ahi, eletricidade, daudaun ne'e ema Suai telefona mai, Zumalai, Rai-Mea, sira hakarak acompanha debate ida-ne'e, maibé coitado, ahi la iha. Ne'ebe, sira hussu favor ida, aproveita oportunidade ida-ne'e hato'o ba membro Governo ne'ebé tutela ba ida-ne'e bele liga *langsung* ba iha-ne'ebé ou se bele ba município hotu-hotu para sira bele acompanha debate ida-ne'e.

Obrigada, Sr.^a Presidente.

Sr.^a **Presidente**: — Obrigada.

Tuirmai, Sr. Deputado Gabriel Soares.

Sr. **Gabriel Soares** (CNRT): — Obrigado, Sr.^a Presidente.

Bom dia ba Presidente, Vices e Mesa em geral, e Excelência Sr. Primeiro-Ministro, Maun-Boot Kay Rala Xanana Gusmão, Vice Primeiro-Ministro, maun Francisco Kalbuady Lay, Segundo Vice-Primeiro-Ministro, maun Assa-Nami, membro do Governo tomak, Deputado sira tomak, audiência sira tomak e mídia sira tomak, povo doben Timor-Leste.

Hanesan representante povo, depois de lê didi'ak Programa IX Governo Constitucional, e kaer tan ho discurso Sua Excelência Primeiro-Ministro nian ohin, ha'u hakarak atu hatete hanesan ne'e: ida-ne'e mak dehan programa do povo, programa ne'ebé mai husi povo, husi povo e sei filafali ba povo. Ha'u fó parabéns tebetebes ba IX Governo Constitucional que consegue elabora programa ida que di'ak tebes hanesan ne'e, e la'ós foin ohin, maibé nanis tiha kedas ona.

Partido CNRT ho nia aliado apresenta nia Programa mai iha-ne'e, mai kedas husi IV Governo Constitucional, mai V Governo, mai VIII Governo, e mai to'o iha IX Governo, ohin ita tuur lori

debate. Balu programa mai mak la liu hela de'it, la liu hela de'it, ohin hatete katak la bele iha hanoin atu hamonu Programa husi Governo balu, husu rasik ba ita-nia an tanbasá mak programa ne'e monu.

Quando ha'u lê uitoan iha Programa IX Governo, iha ditado hatete hanesan ne'e: «sei la husik ema ida ba kotuk», katak povo timoroan tomak iha direito tomak ba na'in ba iha Programa ida-ne'e. E programa ida-ne'e hakerek kapás tebetebes kona-ba, liuliu, atu valoriza ferik ho katuas sira. Uluk temi dehan terceira idade, maibé muda iha-ne'e, temi heróis vivos, e sira merece atu hetan duni título ida-ne'e. Ida-ne'e precisa Sr. Deputado sira atu estuda didi'ak, hanoin halo didi'ak.

Iha Deputado balu e Deputada balu ohin hatete, «Governo ida-ne'e mai atu julga», iha Programa IX Governo ha'u nunca lê hetan kona-ba julgamento ba sé-sé de'it. Maibé, atu lembra filafali ba Srs. Deputados, ita hotu iha-ne'e, katak na'in ida be julga ne'e mak povo, ne'ebé julga tiha ona ita iha eleição liubá, iha 21 de maio liubá, povo mak julga! Ita iha-ne'e, tanto governante e tanto Deputado, ita la julga malu, povo julga e fó confiança ba iha partido rua e ohin harii IX Governo atu lori hela sira-nia resultado julgamento ne'e mai atu mai discute e atu lori haree halo didi'ak. Nia julga kona-ba saida? Povo julga kona-ba saida? Ohin balu temi estagnação, iha-ne'e IX Governo mai, la halo estagnação ba iha sé-sé de'it, maibé povo mak tau Programa ne'e para ohin IX Governo mai apresenta.

Iha facto lubuk ida que acontece ba kotuk, ita hotu tuur iha-ne'e e lori acompanha halo didi'ak sá modelo ukun mak ita halo ba povo. Iha facto balu ita bele hatete, ita mai aprova iha-ne'e kona-ba fornecimento Cesta Básica, tau ba cada indivíduo 50 USD para que no fim ita compra ikan dois, hudi kaek, lori bá fó filafali ba sira, valor ida 50 USD ne'e lakon. Ida-ne'e mós ita bele hatete katak faz conta husi julgamento ne'ebé povo julga hela ita. Ne'ebe, ita lalika duun katak iha-ne'e IX Governo atu mai halo julgamento ba sé e sé. E IX Governo mai atu hadi'a, atu hadi'a ato ne'ebé karik iha kotuk la'o ladún loos, hadi'a halo loloos tanba ida-ne'e atu lori serbí povo Rai ida-ne'e nian.

Colega balu mós hatete katak Governo ida-ne'e, hanesan ema balu hatete, katak «*Pemerintahan baru dengan muka-muka lama*». Maibé, ha'u mós encoraja ba ema balu hatete ne'e atubele hatete mós hanesan ne'e: «*Legislatura baru dengan muka-muka Deputados lama*». Ita mós tem que coragem ba ida-ne'e, ita labele hakarak hatudu de'it liman ba ema, maibé ita haluha mai ita-nia an rasik. Ne'ebe, *muka-muka lama* la'ós ema seluk, ida-ne'e mesak Timor nia oan de'it. Maibé, ha'u encoraja atubele halo balanço ba iha ita-nia linguajem sira-ne'e, labele ita «*lempar batu sembunyi tangan*». Ita só gosta hatudu liman ba ema, maibé iha ita-nia an rasik ita la bele hasai rai-henek ou rai-rahun iha ita-nia matan nia rasik.

Ne'ebe, maluk sira, ha'u sente, atu hatete de'it ba ha'u-nia maluk Deputado sira tomak katak ha'u mós sente satisfaz quando Programa ida-ne'e mai, husi bancada sira balu hatete katak aprecia e, se la iha objeção atu haree ba Programa ida-ne'e, pronto, parabéns ba Ita-Boot sira, ita mesak

timoroan de'it, governação mak ida-ne'e, maibé governação mai la separa A e B, e governação ida-ne'e governação do povo, husi povo e atu filafali ba iha povo.

Ne'ebe, maluk sira, facto barak mós ita kaer hela, ita kaer hela, oinsá ita atu esclarece ba malu, maibé iha Programa ita halo apreciação de'it, ita fó valorização ba Programa para fó tempo ba Governo oinsá Governo bele executa tanba povo hein hela, povo hein hela, bainhira mak atu haree kona-ba condição sira-nian ne'ebé durante ne'e ita hotu, tanto bancada Governo ka la'ós iha Governo, sente. Tanba ita debate hotu tiha, ita sei filafali ba comunidade, iha vizinho ida-idak, e ita rasik sente e haree ho matan kona-ba povo nia dificuldades.

Tanba ne'e, dala ida tan, parabéns ba IX Governo Constitucional, parabéns ba Sua Excelência Primeiro-Ministro tanba Programa ida-ne'e ha'u aprecia tebes. E última palavra husi Sr. Primeiro-Ministro nian hatete katak husu ba «ita hotu-hotu tem que sai diplomatas ba ita-nia País ne'e rasik». Ita-Boot sira mak interpreta bá, liafuan ne'e liafuan di'ak ba ita, liuliu ba iha geração foun atu lori aprende kona-ba conceito sira hanesan ne'e.

Obrigado, Presidente.

Sr.^a **Presidente**: — Obrigada, Sr. Deputado.

Deputados, molok atu ba oin, iha ponto de ordem, mas ha'u hussu Sr.^a Deputada Maria Angélica Rangel atu invoca Regimento molok intervém. Ita-Boot iha um minuto.

Sr.^a **Maria Angélica Rangel** (FRETILIN): — Obrigada, Sr.^a Presidente Parlamento Nacional.

Invoca Regimento ba ponto de ordem, katak afinal Sr. Deputado ida husi CNRT ne'e la lê Programa Governo. Iha índice husi Programa ne'e keda ko'alia nune'e: «cometidas durante este longo período de estagnação.», então Sr. Deputado sira mai para gaba malu de'it, gaba Sr. Primeiro-Ministro. Ohin ha'u dehan *muka lama* ne'e, não sou eu é que disse, la'ós ha'u mak dehan, mas ha'u repete intervenção ne'ebé iha jornal ko'alia kona-ba *muka-muka* lama. Agora ha'u husu ba Sr. Deputado, be Primeiro-Ministro ne'e *muka* foun ka? Vice-Primeiro-Ministro, maun Sico ne'e, *muka* foun ka? Ministro, Sr. Agio ne'e, *muka* foun ka? Sr. Bendito ne'e *muka* foun ka? – Oh, Sr. Assa-Nami halai tiha ona – Sr. Ministro Assa-Nami *muka* foun ka? Sr. Benevides ne'e *muka* foun ka? *Apalagi*, Sr. ex-Deputado Hugo, Adérito ne'e, *muka* foun ka?

Hai! Ha'u ko'alia hanesan ha'u Deputada, agora hanesan fali Ita-Boot mak membro Governo, Ita-Boot mak sente an fali. Desculpa, Sr. Deputado.

Muito obrigada, Sr.^a Presidente Parlamento Nacional.

Sr.^a **Presidente**: — Ha'u sei la fó ponto de ordem atu hatán malu, tanba realmente iha livro hakerek nune'e duni, ne'ebe ha'u sei la fó.

Tuirmai, Sr.^a Deputada Veneranda Lemos.

Sr.^a **Veneranda E. M. Lemos Martins** (CNRT): — Obrigada, Sr.^a Presidente Parlamento Nacional, meio-dia di'ak ba Ita.

Ba elenco governamental, ba Mesa Parlamento nian, ba Sr. Primeiro-Ministro ho Governo tomak, loraik di'ak ba ita, dala ida tan.

Ha'u aprecia ba Programa ne'ebé apresenta ona mai Parlamento Nacional atu hetan apreciação. Parabéns ba IX Governo e parabéns mós ba povo ne'ebé hatene hatudu ninia escolha. E povo tau expetativa boot tebetebes ba Governo ida-ne'e, ba IX Governo, ho membro Governo sira hotu atu serbisu ho didi'ak, serbí povo ho didi'ak tanba ita mesak timoroan de'it e povo, hanesan ohin Primeiro-Ministro hatete, kolen ho situação ida-ne'e. Tanba ne'e povo fó ninia escolha atu Governo foun ida-ne'e, IX Governo, atu ho *muka lama* ka, atu ho *muka baru* ka, maibé povo hein ita hotu nia serbisu. E ha'u fiar katak ho Programa ne'ebé foin lori mai iha primeiro dia ne'e, programa ida ne'ebé furak e iha mós continuidade husi VIII Governo, tanba hanesan ha'u-nia colega Deputada ohin dehan, katak CNRT mós hola parte iha VIII Governo e halo aprovação ba Programa. E la sala bainhira iha continuidade husi IX Governo ba programa sira-ne'ebé Governo anterior nian. La sala! sira-ne'ebé di'ak ita continua e sira-ne'ebé la di'ak, claro que ita tem que buka dalan ida para hateten iha irregularidades e ita tem que assume duni.

Ha'u hakfodak uitoan ho intervenções husi colega Deputado balu que ko'alia kona-ba irregularidade, ita sente hanesan alérgica filafali. Ita hotu iha memoria institucional, maioria, ita hatene saida mak acontece iha Parlamento no acontece iha ita-nia governação, e liuliu iha Estado tomak. Ita hotu iha memoria ida-ne'e. Irregularidades, sim, la bele alérgica atu simu ida-ne'e. Se Governo ne'e hakarak atu lori Programa no implementa programa di'ak atu hasai povo husi susar no mukit, tem que halo duni investigação, tem que haree duni irregularidade sira-ne'ebé acontece.

Iha dia 18 e 19 de maio 2020, saida mak acontece iha Parlamento ne'e ita hotu acompanha, ita hotu mak sei tuur iha-ne'e, tanba saida mak ita alérgico ho liafuan sira temi «Governo haree katak sei hakarak atu hadi'a irregularidade sira-ne'ebé acontece iha Governo anterior»? Bainhira hatete kona-ba reforma lei estruturante, ita sente hanesan alérgico loos, ita sente hanesan ne'e la bele book ona. Tanbasá? Se ita hakarak atu hadi'a, se ita hakarak iha boa governação, ida ne'ebé aat tem que hadi'a, ida ne'ebé di'ak tem que continua. Tanba ohin iha discurso Sr. Primeiro-Ministro nian mós la hateten buat ida que dehan atu estraga, pelo contrário, hakarak atu hadi'a sasán sira.

Iha mós, ha'u aprecia tanba Governo ida-ne'e fó espaço boot tebetebes ba ami feto sira, liuliu atu hadi'a economia feto nian. Ha'u hein katak Programa ida-ne'e bele lori espaço di'ak ba feto sira atubele hadi'a sira-nia economia, liuliu micro e pequena empresa sira. Iha Ministério barak que sei implementa plano ida-ne'e, liuliu ba SEI (Secretaria de Estado da Igualdade), ha'u husu atu Governo,

bainhira lori ona ninia Orçamento mai karik, ita bele haree ona oinsá maka Governo bele lori benefício barak liután ba feto sira.

Tuirmai, depois de haree programa ba feto nian, Sr. Primeiro-Ministro, ha'u hakarak atu hussu de'it programa ida hatete, «continua implementa Plano de Ação Nacional kona-ba Feto, Pás e Segurança», hakarak atu hatene de'it programa ida-ne'e sei iha tutela ba Ministério ida-ne'ebé nian? Tanba desde Governo sira anterior, plano ida Plano Ação Nacional kona-ba Feto, Pás no Segurança ka Resolução 1325 «Conselho Segurança ONU nian, ne'e la hatuur iha fatin ida ne'ebé ita dehan katak Ministério ida mak sei iha responsabilidade hodi continua Resolução 1325 ida-ne'e. Ha'u-nia pergunta mak ida-ne'e.

E tuirfali, ida ikusliu, ha'u mós hakarak atu agradece ba Governo Dasiak hodi hatuur nafatin Declaração Maubisse ne'ebé envolve Ministério lubuk ida hodi bele fó kbiit ba feto sira atu sira-nia negócio bele la'ó ho di'ak. E hanesan ohin hatete, colega sira balu ohin hatete, katak *muka-muka lama* ne'e, ha'u haree Ministro lubuk ida ne'ebé uluk assina Declaração Maubisse ne'e mós mai filafali ona iha IX Governo, ha'u espera katak Declaração Maubisse, Resolução 1325 no mós Plano Ação Nacional Violência Baseia ba Género ne'e bele la'ó ho di'ak no bele fó espaço forte liután ba feto sira hotu.

Muito obrigada.

Sr.^a **Presidente**: — Tuirmai, Sr. Deputado Natalino dos Santos.

Sr. **Natalino dos Santos** (CNRT): — Obrigado ba tempo.

Boa tarde ba Sr.^a Presidente do Parlamento Nacional, Mesa Parlamento Nacional, Sr. Primeiro-Ministro, Vice-Primeiros-Ministros, elenco membro Governo, ne'ebé ha'u respeita, e colega distinto Deputado sira hotu.

Primeiro, ha'u hakarak aprecia IX Governo Constitucional ne'ebé cumpre ona ninia mandato e iha tempo badak bele lori Programa Governo nian mai iha Parlamento Nacional atu halo apreciação. Tanba ida-ne'e, ha'u hakarak fó parabéns ba IX Governo Constitucional.

Depois de haree tiha documentos ne'ebé Governo submete mai Parlamento Nacional, haree katak programa sira-ne'e programa continuação husi governação IV Governo, V, to'ó VI Governo Constitucional. E foi bem iha 2017, programa sira-ne'e la bele halo continuação tanba iha estagnação ka ita tama iha impasse política ne'ebé resulta hodi la bele halo continuação ba programa sira-ne'e. Tanba ida-ne'e, ha'u hakarak aprecia katak Governo ne'ebé lori nia Programa mai, e hatudu duni vontade povo nian ne'ebé fó confiança ba Partido CNRT. Ho ida-ne'e, ha'u hakarak hato'ó ha'u-nia resposta balu relaciona ho Deputado balu ne'ebé ko'alia kona-ba chumbo Orçamento Geral do Estado iha 2020. Iha-ne'e hakarak halo clarificação katak Partido CNRT la chumba Orçamento iha 2020,

tanba Programa ne'ebé aprova iha Parlamento Nacional, VIII Governo la cumpre Programa ne'ebé lori mai apresenta iha Parlamento Nacional, VIII Governo, Primeiro-Ministro rasik, cria filafali programa seluk que contradiz hosi Programa VIII Governo nian. Ha'u foti exemplo, VIII Governo atu halo continuação ba processo desenvolvimento ne'ebé la' o tiha ona iha IV, V e VI Governo nian, hanesan projeto ne'ebé iha Tibar, la fó continuação ba projeto sira-ne'e, Projeto Tasi Mane ne'ebé la fó continuação. Projeto Tasi Mane ne'e hatudu katak afirmação soberana ita-nian, katak projeto ne'e tem que continua, ho nune'e rico-soin ne'ebé povo ne'e rasik terus ba rai ida-ne'e atubele dada e explora mai ita-nian Rain. Ho assunto sira-ne'e mak Partido CNRT foti decisão ida, halo abstenção, hodi hussu Governo atubele hadi'a filafali programa sira-ne'e.

Iha mós Orçamento Geral iha 2020 nian, orçamento sira-ne'e aloca la tuir categoria Orçamento Geral do Estado. Ha'u foti exemplo, iha Capital Menor tau filafali ba Transferência Pública, tanba ida-ne'e CNRT hussu atu hadi'a, e Primeiro-Ministro rasik la continua, la fó importância ba resultado retiro ne'ebé AMP halo, tanba ida-ne'e mak CNRT vota abstenção e atu husu atenção ba Governo.

E hakarak fó hanoin katak ohin colega balu ko'alia kona-ba RAEOA nian, husu atu halo referendo, ha'u aceita tebetebes atu halo lailais alterações ba lei ne'e porque implementação Zona Economia Social de Mercado ho RAEOA durante ne'e gasta osan quase oitocentos cinquenta milhões de dólares americanos iha Oe-Cusse e desenvolvimento ne'e la iha equilíbrio ba povo ida-ne'ebá. Nune'e mós iha RAEOA rasik, Presidente Autoridade ou liderança ne'ebé chefia iha-ne'ebá la compreende kona-ba conceito ne'ebé tau iha lei. Hanesan artigo 37.º, hatete katak estabelece Zona Economia Social de Mercado, iha tinan sia nia laran la consegue introduz, la consegue halo separação entre Zona Economia Social ho Autoridade. Tanba ida-ne'e, ba ha'u, husu para IX Governo Constitucional atu halo revisão ba lei ne'e, ho nune'e desenvolvimento ne'ebé iha Oe-Cusse bele la' o ho di'ak tuir mehi povo nian.

Hakarak husu tan ba Governo atubele tau atenção, liuliu ba setor social ne'ebé durante ne'e fó ona benefício ba povo sira, liuliu ba idoso, ba veteranos, ba bolsa da mãe, bolsa de estudos ne'ebé beneficia duni ba povo ida-ne'e. E tempo to'o ona Governo atubele continua processo sira-ne'e e atu garante katak povo ida-ne'e iha duni ninia direito atubele goza desenvolvimento ba rai ida-ne'e nian...

Sr.^a **Presidente:** — Conclui, Sr. Deputado!

Sr. **Natalino dos Santos** (CNRT): —...Tanba ida-ne'e, ha'u husu ba Governo atubele continua ninia processo tuir nia Programa ne'ebé lori mai apresenta iha Parlamento Nacional.

Obrigado.

Sr.^a **Presidente:** — Tuirmai, Sr. Deputado Patrocínio.

Sr. **Patrocínio Fernandes dos Reis** (CNRT): — Obrigado.

Boa tarde ba Sr.^a Presidente do Parlamento Nacional ho ninia membro da Mesa sira.

Sua Excelência Primeiro-Ministro e elenco governamental do IX Governo Constitucional, distintos e distintas Deputados, público tomak, boa tarde ba hotu-hotu.

Primeiro, hakarak atu fó apreciação boot ba IX Governo Constitucional ne'ebé, ho sério tebetebes, bele cumpre Constituição hodi submete Programa Governo nian mai iha Parlamento Nacional ho tempo ne'ebé badak tebetebes hafoin de simu posse iha dia de 1 de julho de 2023.

Programa ne'e nu'udar documento político Governo nian ba tinan lima nia laran, nune'e, hafoin ita haree, lê tiha Programa, Governo mai ho compromisso neen, pelo menos, ne'ebé nu'udar orientador político para Governo bele tau iha plano de ação sira anual nian hodi bele buka alternativas no solução ba povo, Estado no Nação ninia problema ba moris di'ak nian.

Ha'u hakarak atu aprecia mós ba afirmação husi bancadas oposição, ne'ebé halo sira-nia apreciação ne'ebé di'ak, ho crítica construtiva sira-ne'ebé atu contribui para hadi'a, tanba ita hotu-hotu aposta ba interesse Estado, interesse Nação no interesse povo nian.

Ita bele haree katak documento ida-ne'e, se ita habadak karik, compromisso neen ne'e, ba buat rua de'it: ida mak atu hadi'a povo nia moris husi desenvolvimento Nação nian, ida seluk mak atu hametin instituições Estado nian, reforça instituições Estado nian hodi loke dalan atu lori atendimento público sira ba povo no ba Nação hodi sai husi moris mokit no kiak ba moris di'ak.

Ohin mós ita acompanha crítica balu, apreciação balu, temi mós kona-ba reforma sira-ne'ebé Governo, iha nia afirmação, iha tinan lima que precisa atubele haree, atu hadi'a.

Ita ko'alia mós kona-ba problema estagnação, bainhira ita haree didi'ak, Programa ida-ne'e reflete tebetebes realidade tinan lima, tinan neen, ne'ebé ita-nia povo hasoru. Dala ruma ita hanoin katak governação ida liubá halo tiha ona buat hotu-hotu di'ak, ita la'ós dehan hotu-hotu aat, balu bele di'ak, maibé realidade iha povo maka ita haree, nafatin ita rona halerik povo nian kona-ba sira-nia moris, nune'e mós kona-ba atendimento público sira-ne'ebé precisa Estado, Governo, oferece ba sira.

Bainhira ita ko'alia kona-ba reforma sira-ne'ebé Governo mai apresenta nu'udar ninia afirmação política, nu'udar Estado, ita hanoin katak ita tem que iha duni coragem atu hanoin katak la'ós ita atu mai sukit malu, atu haree husi ida-ne'ebá sala, maibé ita tem que iha duni coragem atu regista iha ita-nia percurso de Estado, percurso de Nação, katak ita hakat liu duni irregularidade balu-balu. Ita bele regista, hanesan ohin Deputado balu temi ona, husi 2017 ita hanoin halo nu'usá, ita hamosu Governo minoria ida ne'ebé la consegue hetan maioria parlamentar, la bele sustenta ninia governação e programa Governo la bele liu, monu! Sira-ne'e hotu contribui ba impasse política iha ita-nia Rain, ita-nia Estado, e ikusmai saida? Implica ba desenvolvimento, sofre estagnação desenvolvimento Nação nian.

Nune'e mós mai iha 2018, ita mós regista buat lubuk ida, iha-ne'ebé Presidente da República cessante utiliza ninia competência nu'udar Presidente da República hakat liu tiha Constituição, hodi la fó posse ba membros do Governo balu, ne'ebé ita hanoin katak la'ós de'it ida-ne'e mak halo CNRT tem que hasees an husi governação ida iha-ne'ebá, maibé mós tanba razão barak ne'ebé maka VIII Governo ne'e rasik la cumpre ona programa político Governo nian ne'ebé mai apresenta nu'udar compromisso eleitoral ba povo iha tempo ida-ne'ebá.

Seluk, revisão sira seluk ne'ebé atubele haree, ohin mós ko'alia uitoan kona-ba RAEOA ho Ataúro. Loos duni, iha Constituição da República, artigo 5.º, ko'alia kona-ba estatuto RAEOA ho Ataúro nian. Ita cria tiha Lei n.º 5 ba Ataúro nian, maibé durante tinan barak ne'e nia laran ita la rona povo Oe-Cusse ko'alia kona-ba sira sente ona, simu ona buat ruma, benefício ne'ebé di'ak, bele satisfaz sira, ho presença lei ida-ne'e nu'udar cumprimento ba artigo 5.º Constituição da República nian be ko'alia kona-ba tratamento económico especial ba Oe-Cusse no mós Ataúro. Constituição obriga katak Ataúro tem que hetan tratamento especial, la obriga dehan katak Ataúro tem que sai município, tratamento especial ne'e maka exigência Constituição da República nian. Ne'e duni, ha'u hanoin katak Governo mai ho ninia orientação política sira-ne'e, iha razão, atu haree katak oinsá maka Governo bele iha solução ida di'ak liu hodi bele fó respostas ba exigência Constituição nian ne'e hodi dehan katak Ataúro nu'udar parte ida husi povo Timor-Leste ne'e, que tuir Constituição haruka, tem que hetan duni tratamento especial ba administrativa no mós ba economia.

Ne'e duni, ha'u hanoin katak ida-ne'e maka ita bele haree, la iha sala bainhira Governo hakarak atu mai ho reformas, hodi bele hametin di'ak liután enquadramento legal sira-ne'ebé em vigor ona mas la responde ona ba realidade, ba situação ne'ebé ita iha. Tanba ita rona beibeik população nia halerik kona-ba assistência ba setor justiça no buat hotu-hotu, então, Governo ida-ne'e mai duni ho ninia afirmação atubele halo intervenção ho enquadramento legal ho buat sira-ne'e hotu para depois bele fó respostas ba exigência ida-ne'e.

Ita mós regista buat barak, ohin colega Deputado sira ko'alia lubuk ona, ha'u lalika repete, maibé ko'alia kona-ba violação, irregularidades, ha'u hanoin, nu'udar Estado ita tem que iha duni coragem atu hatete katak hahú husi 2017 hodi mai ne'e ita iha duni irregularidades ba lei sira e próprio ba Constituição. Hamosu Governo minoria, depois la fó posse ba membro do Governo sira nu'udar proposta mai husi Primeiro-Ministro, e depois haruka tiha halo movimento político hamosu coligação ida atu apresenta para hamosu IX Governo, ita ignora tiha, depois hamosu fali conceito foun ne'ebé extra-constitucional, ne'ebé, ha'u bele hatete, ita temi beibeik dehan Governo viabilidade. Sira-ne'e hotu ita tem que regista nu'udar percurso Estado nian katak ita hakat liu duni norma constitucional ruma iha ita-nia percurso do Estado ne'e.

Obrigado barak.

Sr.^a **Presidente**: — Muito obrigado, Sr. Deputado.

Ikusliu ba sessão ohin dadeer nian, Sr. Deputado António da Conceição.

Sr. **António da Conceição «Kaloan»** (PD): — Muito obrigado, Sr.^a Presidente do Parlamento Nacional.

Excelência Sr.^a Presidente Parlamento Nacional e Mesa, Excelência Sr. Primeiro-Ministro, Excelências Srs. Vice-Primeiros-Ministros, ilustres membros do Governo no povo rona-na'in tomak, ba dala uluk, ha'u lori Bancada Partido Democrático nia naran, nu'udar mós bancada do Governo, hakarak hato'o parabéns ba IX Governo ba apresentação Programa iha loron ida ohin. Tempo ne'ebé badak, maibé Governo hola responsabilidade duni atu fó hikas confiança ba povo hodi lori fali normalidade atu hala'o hikas fali desenvolvimento Nação nian tanba tinan neen nia laran ita moris duni iha situação incerteza política nia laran. La hatene sé mak sala, maibé atos incertezas ne'e mós la mosu husi lalehan de'it, «la iha ahi suar se la iha ahi», passado ida ne'ebé ita tem que foti nu'udar lição atu aprende hodi buka atu hadi'a. Tanba ida-ne'e, IX Governo hola responsabilidade atu normaliza fali situação sociopolítico no socioeconómico país nian.

Programa ne'ebé ohin Excelência Sr. Primeiro-Ministro apresenta baseia ba Plano Estratégico de Desenvolvimento Nacional 2011-2030, programa ne'e mós assenta ba pilar haat Plano Estratégico Desenvolvimento Nacional nian, ho compromisso neen hanesan ohin. Se programa ida-ne'e iha semelhança ba programa VIII Governo nian, ne'e mós tanba VIII Governo versão um apresenta duni programa ida iha Uma-Fukun ida-ne'e, hodi hetan aprovação husi Parlamento Nacional. Maibé, ida ne'ebé la existe maka depois de VIII Governo hetan viabilização, Governo la halo alteração política hodi insere hikas políticas tuir partido ne'ebé viabiliza Governo nian, tanba ne'e, semelhança ne'ebé ita hola, nafatin ho base ba Pano Estratégico de Desenvolvimento Nacional 2011-2030. Programa ne'ebé ohin Sr. Primeiro-Ministro apresenta reflete capacidade política Governo ida-ne'e nian hodi halo mós leitura ba condição moris sociopolítico no socioeconómico País nian.

Mós iha exposição Excelência Primeiro-Ministro nian, temi ita-nia restauração da independência halo ona tina 21. Loos duni, ho tempo ne'ebé la'o, ho mudanças ne'ebé iha, precisa duni halo introspeção ida hodi buka atu haree fali ba oin, década rua ona, política ba desenvolvimento precisa iha revisão no precisa mós atu contextualiza.

Ukun sira ba kotuk la'o ho período ida ne'ebé ita foin ukun an, no ita mós ukun hodi aprende ukun. Iha ukun hodi aprende ukun, certamente la'ós ukun ida ne'ebé loos de'it, errar é humano mesmo. Errar é humano, maibé erro mós bele hadi'a. Ohin ita hahú kolu malu hikas ho fantasma corrupção, ohin ita kolu malu, maibé taka mós ita-nia fracassos iha povo nia matan. Hanesan Bancada ida-ne'ebé sempre dinamiza política iha Uma-Fukun, hakarak fó apoio incondicional ba Governo ida-ne'e ho hakat ukun nian, ho Programa ida-ne'ebé agora daudaun apresenta.

Bancada Partido Democrático mós hato'ó apreciação ba declaração ne'ebé hato'ó husi Deputado Presidente Aniceto, ne'ebé fó apreciação e apoio ba Programa do Governo no mós apoio husi Deputada Olinda husi Bancada KHUNTO.

Ho permissão Excelência Sr. Primeiro-Ministro nian, permite ha'u cita filafali de'it Sr. Primeiro-Ministro nia repto ka apelo eh pedido ne'ebé ohin hato'ó «Mai ita hotu hakuak causa nacional foun ida, mai hamutuk ita luta ba ita-nia Estado de direito democrático ho kilat ne'ebé naran vontade atu serviço, ho kilat musan husi participação ativa no construtiva ida que di'ak, hamutuk ho hanoin no visão ida de'it kona-ba liberdade no desenvolvimento». Ita la'ó bá e tempo mak sei julga ita. Hanoin hanesan iha 1999, ita hamutuk conquista ita-nia ukun an, hamutuk ita-nia desenvolvimento precisa nafatin ita-nia hamutuk, «A união faz a força!».

Obrigado barak, Sr.^a Presidente.

Sr.^a **Presidente**: — Muiíssimo Obrigado, Srs. Deputados, ita consegue to'ó 12h56, 1h00 ita bele almoça. Maibé, Sr. Primeiro-Ministro ho colegas Deputados, sei iha ponto de ordem rua, minuto ba cada ha'u sei fó.

Ba Sr. Deputado Antoninho Bianco, um minuto.

Sr. **Antoninho Bianco** (FRETILIN): — Ha'u hanoin, três minutos, tanba ohin ne'e temi loloos de'it mak «viabiliza ne'e hakat liu, hakat liu». Ne'ebe, ha'u iha-ne'e atu halo defesa de honra em nome do partido, tanba sé mak viabiliza VIII Governo ne'e FRETILIN. Karik Sr.^a Presidente bele concede três minutos.

Sr.^a **Presidente**: — Bele três minutos, faz favor.

Sr. **Antoninho Bianco** (FRETILIN): — Obrigado.

Ha'u-nia respeito ba Presidente ho componente Mesa, ha'u-nia respeito mós ba Primeiro-Ministro IX Governo ho membro sira hotu, colega Deputada no Deputado sira hotu.

Ha'u acompanha intervenção balu ne'e liga de'it dehan Governo ida be FRETILIN viabiliza ne'e maka hakat liu Constituição.

Ha'u hanoin, ita hotu hatene muito bem, Parlamento exerce nia direito dentro Constituição fó, Presidente da República, nu'udar Chefe Estado, exerce ninia serbisu tuir Constituição fó, Tribunal mós nune'e e Governo mós nune'e. Tanba ne'e, ohin maluk balu temi beibeik Presidente cessante, ha'u sente katak Presidente cessante momento ne'e nu'udar Chefe Estado.

Maluk barak questiona e decisão depois sira lori mós ba Tribunal, dala barak, só que Tribunal decide dehan dentro do corredor princípio Constituição e Presidente exerce nia serbisu. Ita iha-ne'e

mós lori decisão barak bá Tribunal, Tribunal dehan nune'e, ne'e decisão mai órgão soberano. Se hanesan ne'e, se ita duun matak de'it ba Presidente cessante, la'ós iha fatin.

Ohin ha'u rona e acompanha intervenção husi Primeiro-Ministro hatete, último liu: «mai ita hamutuk», la'ós hanesan uluk-uluk «fiar an», la iha ona. Ne'e significa mudança, buat hotu la'o tuir tempo.

Então, ita bele dehan nune'e: se ita hakarak ko'alia di'ak buat ne'ebé iha ita-nia livro página 171 programa ne'e, 18 páginas discurso ne'e, então ita tem que orienta ho liafuan murak ne'ebé mai husi ita-nia ibun, liafuan ne'e mai husi ita-nia fuan. Então, mak ne'e, sai ativista labele iha Parlamento! Sai político iha Parlamento, e se bele sai estadista! Ne'e maka ita precisa.

Ha'u hanoin, ha'u mai hatete ida-ne'e tanba ha'u lakohi repete ita-nia erro, tanba FRETILIN halo mós ema di'ak sira sei la nega. Maibé ita la'ós sura buat ne'ebé ita halo, herói sira halo mós sira nunca sura, sura ba ita katak ita bele halo tuir ba sira ka lae. Tanba ne'e, maluk sira, FRETILIN mai dehan nune'e: «Sé mak manán, mesak ukun de'it mós bá rohan, naran katak ukun tuir buat ne'ebé ita bele, la precisa dehan barabarak, ida de'it mesak ukun mós bá rohan». Ne'e mak ita atu valoriza, tanba ukun la'ós ba partido nia hakarak, ukun ba povo nia hakarak.

Ohin ami-nia declaração ikus husi abertura Presidente Bancada e ami hatutan ida-ne'e para hatete katak ami laran moos, laran moos neon moos.

Mak ne'e de'it. Orsida ha'u sei halo intervenção tanba ponto principal balu, ne'e ha'u ko'alia ona kona-ba programa ho discurso.

Obrigado barak.

Sr.^a **Presidente**: — Muito obrigado, Sr. Deputado.

Ikusliu, ponto de ordem ba Sr.^a Deputada Angelina Sarmiento.

Sr.^a **Maria Angelina Lopes Sarmiento** (PLP): — Muito obrigada, Sr.^a Presidente.

Bota tarde, Senhor Primeiro-Ministro, dala ida tan.

Ba oportunidade ida-ne'e ha'u hakarak atu esclarece katak ohin ko'alia kona-ba irregularidades ne'e, ha'u hanoin, bancada oposição ne'e la alérgica ida, maibé, tanba ami hakarak declaração ida-ne'e tem que iha provas, tem que hatudu ho factos.

Iha ami-nia intervenção, intervenção ida que ami hatudu ho factos. Ita tem que orgulho, bainhira ita ko'alia kona-ba sistemática violação ba regras boa governação nian, ami intervém ho factos, factos maka se violação karik, ita-nia CPI (*Corruption Perception Index*) ne'e la sa'e ida, ita mantém nafatin hanesan uluk. Ne'e factos ne'ebé ami comprova atu debate fali tese ida dehan ita iha violação sistemática ba regra sira boa governação e transparência nian.

Se ita ko'alia kona-ba irregularidades ligado ho acontecimento dia 18 e 19, ha'u hanoin, Regimento artigo 14.º n.º 4, artigo 20.º no artigo 22.º fó dalan. Regimento, cabimento legal ne'e iha, e liuliu tanba resultado ida-ne'e Ita-Boot sira contesta ba tribunal e decisão tribunal nian, ha'u hanoin, ita hotu hatene e ha'u la precisa hatete iha-ne'e. Ne'ebe, irregularidades, mas ita bele dehan katak regra sira-ne'e dentro de corredor constitucional e democrático.

Obrigada.

Sr.^a **Presidente**: — Muiíssimo obrigada, Srs. Deputados.

Hodi nune'e, Sr. Primeiro-Ministro ho Srs. Ministros, Srs. Deputados, ita bá almoço. Ita fila 3h00h.

Muiíssimo obrigado e bom almoço.

Tanba ohin halo pergunta barak, Sr. Primeiro-Ministro sei hatán Ita-Boot sira agora, se bele convoca atu mai tanba 3h00 ita hahú. Se bele, sira-ne'ebé ohin halo perguntas, para bele rona rasik resposta husi Sua Excelência o Primeiro-Ministro, se bele bancada sira convoca ita-nia Deputados atu hola fatin para hodi rona.

Obrigada.

Sessão ne'e suspende iha tuku 13 liu minuto 2 no retoma fali iha tuku 14 liu minuto 56.

Srs. Deputados, ohin ita promete atu hahú tuku 3 e agora tuku 3 loloos. Ne'ebe, tempo tomak Governo ninian atu hatán ba perguntas dos Srs. Deputados.

Sr. Primeiro-Ministro, halo favor.

Sr. **Primeiro-Ministro** (Kay Rala Xanana Gusmão): — Obrigado, Sr.^a Presidente.

Husu desculpa ba povo no ba sociedade tomak, atan oan ha'u hanesan *muka lama dan wajah tua* ona mak mai ko'alia iha-ne'e.

Senhor Primeiro-Ministro hamnasa.

Ohin rona questões barak, ha'u sei la temi ida-idak no responde ida-idak, maibé ha'u sei hili assuntos gerais hodi hatán tanba ikus fali mai oportunidade sei iha ba cada Ministro karik atu reponde ba questões balu.

Ne'e duni permite ha'u, depois haree tiha assunto sira-ne'ebé tau, ha'u sente katak obrigação ha'u-nian atu responde ba conceito de Estado.

Conceito de Estado, ida-ne'e liuliu atu ko'alia ba hotu-hotu ne'ebé acompanha Plenário ida-ne'e liuhusi televisão tanba, loos duni, conceito de Estado, Estado iha ninia instituições haat: Presidência, Parlamento, Governo ho justiça.

Guiné-Bissau hahú funu ho Portugal, sira mak hahú uluk, depois mak Angola tama, Moçambique tama, sira hetan ukun an iha 1974. Iha 2014, tinan 40 tiha ona, no ita restaura independência ho tinan 12, mak foin bá iha Guiné-Bissau atu ajuda sira-nia Estado bele hetan primeiras eleições livres e democráticas. 40 anos de independência, ho Estado Guiné-Bissau ne'ebé mós sai nu'udar motivação boot ba ita bainhira ita enfrenta situação difícil iha funu, ne'ebe, conceito de Estado, G7⁺ iha daudauk sorin ne'ebá mós haree ba Estado sira-ne'ebé seidauk Estado loloos. Ha'u la dehan katak ita-nian lae ou ita-nian seidauk loos, mas atu percebe conceito de Estado, ita bá to'o iha conceito sira-ne'e hotu hodi ita compreende didi'ak tanbasá mak ita temi ida-ne'e ou temi ida-ne'ebá.

G7⁺, organização intergovernamental ida-ne'ebé hetan ona estatuto observador permanente iha Nações Unidas, haree ba rain sira-ne'ebé sira-nia Estado seidauk iha. Naran Estado, iha Presidente, iha Parlamento, iha Governo no iha buat hotu-hotu, bolu Estado frágeis. Ne'e duni maka, bainhira ita temi Estado, ita la bele dehan katak funcionário sira serbisu daudauk, Parlamento serbisu, Governo, buat hotu-hotu serbisu normal hela, nu'usá mak dehan fali ita-nia Estado frágil.

Conceito de Estado la bele ba de'it Estado iha instituições haat, ida-ne'e to'o ona. Ha'u sei la lori tempo barak atu ko'alia ba ida-ne'e, maibé atu dehan de'it katak conceito de Estado ne'ebé ami iha la hanesan ho Deputado ida ohin temi kona-ba Estado.

Kona-ba mós RAEOA (Região Administrativa Especial Oe-Cusse Ambeno), ZEESM (Zona Especial de Economia Social de Mercado), dehan iha Constituição, Constituição mak haruka halo, ne'e la'ós buat foun. La'ós dehan atan oan ha'u halo buat hotu-hotu, mas iha tempo ne'ebá maka harii. Atu dehan de'it katak tem que halo revisão tanba ZEESM, Zona Especial de Economia Social de Mercado. Quando mosu ZEESM, ami buka aprende saida mak ZEESM, tanba aprendizagem iha toda a vida, la'ós ita aprende to'o de'it iha quarta classe, segundo ano, mak ne'e ona, toda a vida aprende. Atan oan buka aprende, mesmo *wajah lama* tiha ona, *muka tua* tiha ona, buka aprende nafatin.

Ne'e duni, ZEESM, Zona Especial de Economia Social de Mercado, quando ita temi dehan Zona Especial ne'e ita bele kaer tuir ita-nia Constituição, mas Economia Social de Mercado la iha Constituição ida. O que é que Constituição fó, dehan nia iha autonomia ne'e atu fó benefício ba povo ida-ne'ebá, tanba ne'e mak cria, ho lei ne'e cria. Bele dehan katak mai critica de'it, critica de'it, lae! Ami iha-ne'e la'ós advogado de diabo, tanba ami mós la'ós santo, sala-na'in boot liu mak ami, mas tanba povo mak dehan katak «Ó bá buka to'ok, corrige!», ho ida-ne'e mak haree katak conceito ZEESM ne'ebé hakerek iha Lei ne'e, plano ida ba ZEESM, linha oan ida mós la iha depois de tinan sia.

Tanba ida-ne'e, tanba karik la iha perceção di'ak kona-ba RAEOA, kona-ba ZEESM, maka precisa duni atu separa RAEOA nu'udar autoridade da região ne'ebá, ZEESM nu'udar entidade ida-ne'ebé haree ba economia social de mercado. Iha português, atan oan ha'u mós nunca ba universidade, mas dehan economia social katak sociedade povo tomak mak tem que envolve an iha economia ba sira-nia rai rasik. «De mercado», quando ita temi de mercado, la'ós atu, em vez de produz foos, sosa *Folsom*, sosa boek, sosa buat sira-ne'e, mas de mercado katak nia produz buat ruma atu fa'an, ida-ne'e mak dehan de mercado. Mas, como la iha, la iha definição tuir ou plano tuir lei ne'ebé cria, maka precisa tebetebes halo revisão ida hodi separa tiha buat rua ne'e, para labele iha confusão boot kona-ba RAEOA no ZEESM, ne'e mak RAEOA temi ZEESM, temi RAEOA temi ZEESM. Atan oan ha'u, durante período Covid-19, la'o hale'u Oe-Cusse tomak tanba iha-ne'ebá iha perigo liu Covid-19 mai husi Kefa, mai husi Atambua, bele tama iha-ne'ebá oho hotu Atoni sira. Tanba momento ne'ebá mós husi Indonésia buat ne'e sa'e tebes mak ha'u bá, e husi ne'ebá to'o agora haree katak iha duni necessidade boot ida atu halo revisão hodi separa: autoridade, autoridade! ZEESM, ZEESM! Hanesan ne'e mós quando ita ko'alia kona-ba descentralização iha Governo, iha assembleias municipais, portanto sempre iha separação. Ho ida-ne'e maka atu explica de'it katak bele hakerek tiha ona iha Constituição, sim! Mas, tanba dala ruma ita bele halo leis ita bele revoga, ita revoga ita bele halo sala, ita revoga sala tiha karik, ita tem que halo nafatin revisão ba progresso e bem-estar população nian, mas iha caso RAEOA/ZEESM ba população Oe-Cusse.

Sim, iha repto ida husu halo referendo, hmmm! Bele halo para la bele dehan katak *muka tua wajah lama* ne'e mak hakarak halo buat hotu-hotu, nia mak manda iha Timor. Lae! La manda.

Ne'e duni com ou sem referendo, necessidade boot tebetebes atu halo revisão hodi separa ida-ne'e hodi ZEESM nu'udar conceito bele hasai plano ida ba Oe-Cusse nia oan sira atu hadi'a sira-nia rain.

Kona-ba projeto Tasi Mane, sim! Projeto Tasi Mane projeto ida-ne'ebé precisa compreensão didi'ak ba processo tomak ne'ebé mosu iha-ne'ebá, tanba iha acordo fronteira entre Timor-Leste ho Austrália, iha documentação acordo ne'e nian iha mós anexos e, anexo sira-ne'e temi kona-ba saida mak precisa atu halo.

VII Governo, agradece tebetebes ba VII Governo, Governo FRETILIN nian, agradece no hakru'uk ba kbiit atu kaer metin soberania nacional hodi concorda no assina acordo ne'e hodi haruka ba Nova Iorque, ba Secretário-Geral ONU (Organização das Nações Unidas), ho anexo sira-ne'e hotu. Ne'e VII Governo mak assina, la'ós fali IV, V Governo la saida buat ida, sira sai tiha ona, toba hela iha uma, descansa hela iha uma. VII Governo mak kaer metin, defende metin soberania nacional, interesses Estado, assina acordo ne'e e haruka ho anexos ne'ebé iha-ne'ebá bá to'o Nova Iorque hodi assina entre Austrália ho Timor-Leste. Iha anexo sira-ne'e temi katak atu hahú processo *Greater Sunrise*, precisa iha códigos mineiros, código de tributação, buat sira-ne'e hotu, ne'ebé to'o agora

seidauk iha. Ami la critica, ami dehan de'it seidauk iha, tanba ida-ne'e maka sei hala'o, sei hala'o tanba documento sira-ne'e ami buka estuda. Ami la'ós hatene buat hotu-hotu, ami buka estuda dehan precisa ida-ne'e, precisa ida-ne'ebá. Iha tiha ona mak foin bele ko'alia ho companhia sira, ho Governo australiano.

Kona-ba plano, sim! Iha tiha ona, tanbasá mak bele convence Comissão Conciliação, convence hodi *chairman* ho tan comissário ida mai to'o iha-ne'e, bá to'o iha Suai, convence sira katak ami iha, *Woodside* la iha. Ami apresenta, tanba ne'e plano iha tiha ona.

Agora, ohin husu katak ida-ne'ebé atu começa uluk, atu começa uluk, depois de programa ne'e aprova. Karik la aprova, *ya* ita bá eleições antecipadas ou então iha fali plataforma foun fali mai. Mas, depois de aprovado tiha, Governo sai tiha legítimo, sei apresenta *draft* ba códigos mineiros no códigos de tributação ne'ebe sei opera iha área *Greater Sunrise* nian, nune'e bele ona hahú ko'alia ho companhias e ho Governo australiano.

E obra sira-ne'e, depois de ida-ne'e mak sei começa haree ona halo saida uluk ou halo saida daudaun, tanba se atu dada mai to'o iha costa sul, ita la bele halo tiha, dada tiha mai to'o iha-ne'e maka costa sul halo fali, lae! Tanba ida-ne'e mak atu esclarece ba povo tomak katak programa ne'ebé ohin apresenta, hodi ou Governo aprova ou rejeita, programa ne'e ba cinco anos, tinan lima ninian. Tanba tinan lima, ita hotu bele hanoin katak primeiro ano 2024 halo saida, 2025 halo saida, 2026 halo tan saida, 2027 halo tan saida, tanba ita hakarak halo uma la bele hahú uluk husi zinco, hahú uluk ke'e rai tiha. Ita foin ke'e daudauk, ita halo ona cama ba iha toba fatin, ne'ebe ita bele halo ona ida-ne'e, bele halo tan ida-ne'ebá, bele halo tan ida-ne'e, mas, durante tinan lima ninian ne'e maka ami seidauk bele temi. Ami temi de'it ida ideias gerais ba cinco anos, programa geral ba cinco anos, e ba 2024 iha plano de ação ida ba Governo tomak, ba ministério ida-idak, ba área ida-idak, setor ida-idak, saida mak ida-idak sei halo iha 2024, hodi haree katak iha 2025 atu halo saida, 2026 atu halo saida, 2027 atu halo saida to'o 2028. Ida-ne'e mak problema kona-ba Projeto Tasi Mane.

Ohin fali ha'u rona, ha'u ohin temi tiha ona, Presidente Parlamento, Deputado sira, katak buat barak ha'u sei la simu hanesan ne'e, responde ba buat hotu-hotu tanba Governo la'ós ha'u mesak, ha'u mós la vale buat ida se la iha Ministro sira ida-idak kaer nia serbisu.

Ne'ebe, atu temi karik katak ohin dehan: «Oh, Estado da Nação, buat sira-ne'e hotu, la halo buat ida, critica de'it, buat sira-ne'e hotu» Lae! Ami la dehan katak mate, ami dehan moris hela. Book iha-ne'e, book iha-ne'ebá, buat barak ne'ebé ami haree katak halo duni, povo mak dala ruma sente katak buat ne'e la to'o karik sira-nia uma maka hili fali ami, mas halo buat barak iha tinan lima nia laran, buat barak tebetebes halo, ami haree. Agora, como decisão soberana iha povo, dala ruma seidauk to'o iha uma ida-idak ne'e maka povo hili sala fali, hili tan fali ami.

Maibé, problema boot ida-ne'ebé husi 2004 hahú harii, ohin mós balu temi índice de corrupção, índice de corrupção, índice de corrupção, loos duni, ha'u simu. Ha'u simu katak IV e V

Governo, membros do Governo husi PD ho CNRT mak corrupto liu, balu tama tiha ona iha cadeia. Ami dehan lae, mas tama tiha ona.

Ita haree de'it sistema financeiro ne'ebé ita ohin iha, karik husi IV Governo buat ne'e sala to'o agora, ne'e ami mak sala duni, maibé autor ba sistema financeiro ne'ebé di'ak tebetebes ho ita bele fó-sai ita-nia experiência ne'e ba rai barak iha África ne'ebá, iha fatin seluk mós, autor ba ida-ne'e Emília Pires. No mós Emília Pires, corrupta boot ida, corrupta tebetebes, ho ninia hanoin, ho ninia matenek kona-ba economia maka ita bele investe fundo petróleo ba iha APT *bonds*, hodi ohin loron, ho nia política ne'e fundo petróleo simu mais de oito bilhões tiha ona. Mas, nia corrupta tebetebes hodi sosa cama ne'ebé uluk Presidente Tribunal de Recurso moras hela, ajuda nia hodi nia atu han foti hela nia, hatoba fali, foti nia. Mas, tanba corrupção boot, tuir índice ne'ebé Ita-Boot sira ohin temi, loos IV, V Governo e VI Governo corrupto tebetebes, foin reduz ne'e husi VII to'o VIII Governo, ami basa liman ba ida-ne'e.

Agora, tanba temi kona-ba «critica, critica, sai fali advogado do diabo, provas dos factos iha-ne'ebé?», loos! Loos duni, provas dos factos la iha.

Maibé, quando ita haree ba buat sira-ne'ebé la'o, se ita seidauk iha provas dos factos, ita buka! Tanba ne'e mak ha'u temi tiha ona katak sei halo auditoria iha-ne'e, auditoria iha-ne'ebá hodi buka to'ok. Se la iha provas dos factos, Governo ida-ne'e loloos demite an tiha tanba acusa ema acusa falso de'it.

Temi Comissão Função Pública, hasai diretor sira-ne'ebé hatene, hatama de'it, hatama de'it, hatama nune'e, hatama nune'e, hodi osan bens e serviços nian ba selu casuais, hatama, hatama, agora Governo foun hatama, dehan: «Ohh, ami agora contrato to'o setembro». Halo saida? Ami nunca simu contrato. Hmm, la'ós sanulu ka ruanulu. *Virement*, se ita agora moris tanba ita-nia fundo petróleo ita consegue gere ho di'ak, sistema ne'ebé monta hodi CNRT sai husi Governo tanba lakohi rona ona. *Virement* bens e serviços ba seluk, husi salário e vencimentos ba *virement* fali ba buat seluk, husi Ministério ida kaer ninia verba sira-ne'e haruka tun no haruka sa'e, muda tun muda sa'e, ida-ne'e ita la iha transparência no la iha responsabilização. Provas dos fatos sei buka, tanba ne'e mak sei halo auditoria, la'ós tanba hakarak lori ema ba cadeia, lae! Hakarak atu hatudu de'it katak sistema ida-ne'e sala, ida ne'e sala! Husi ministério ida simu osan mai, tanba orçamento dehan katak tinan ida nian..

Sr. Primeiro-Ministro baku mesa.

... tinan ida nian hotu, saida mak gasta gasta ona, saida mak la gasta fila ba cofre de Estado. Ho ida-ne'e mak ita gere didid'ak ita-nia receitas para ba futuro, para ba haree fali aspeto sira seluk hodi dudu economia. Tanba fó ona kbiit ida-ne'e ba iha ministério sira, ministério kaer osan hatama ba nia conta ba iha banco to'o fim do ano, gasta hira ita la hatene tanba kaer hela iha ne'ebá de'it, atu

gasta nafatin. Ida-ne'e falta de responsabilidade, de transparência, de eficácia iha gestão de riqueza do povo. Ida-ne'e mak problema boot, la'ós tanba acusa ema ida-ne'e, ida-ne'ebá, lae! Ida-ne'e fó dalan ba estraga povo nia osan.

Povo mak terus, povo mak halo funu! Buat ida halo funu ne'e la'ós kaer de'it kilat, ha'u mós la hatene oho, tanba ne'e mak ha'u nem sai veterano tanba, coitado, hatene subar an de'it. Ne'e duni, buat irregularidades ne'e tanba estraga tiha sistema ne'ebé ita tau ona iha-ne'ebá atu salva didi'ak osan povo nian, Nação nian, fundo soberano, receitas, riqueza nacional ne'e.

Tanbasá mak tem que halo auditoria fali ba... la'ós ha'u mak atu bá halo nem Governo, quando temi auditoria ne'e katak sei husu: «Tribunal de Contas, ó haree ida-ne'e ka lae?».

Senhor Domingos Caeiro bá to'o iha Tribunal, bá toba iha cadeia fulan hira kedas, ho buat ida que nia la sala tan. Ho ida-ne'e, ho ida ne'ebá, osan sira-ne'e ba iha-ne'ebá la iha controlo, Estado la consegue controla, oinsá? Ida-ne'e importante tebetebes tanba ita hakarak descentraliza, ohin temi, ha'u mós temi, «descentralização financeira» tem que iha controlo ida di'ak, lae! Iha 13 municípios, osan ba hanesan ne'e, ita-nia fundo mina-rai osan la iha tiha ita bá husu osan. Tanba ne'e importante tebetebes ba povo tomak, sociedade tomak, liuliu jovem sira, política atu kaer didi'ak, gere didi'ak osan fundo mina-rai ninian. Ami sei la buka prova dos factos atu hatama sé de'it, ami lakohi! Bá cadeia, ami lakohi rona ida-ne'e, ami hakarak provas dos factos atu prova katak sistema ida-ne'e la di'ak, ida-ne'e la di'ak! Kaer osan tau hotu iha banco.

Cesta Básica ita la hatene relatório iha-ne'ebé, oinsá, buat sira-ne'e hotu. Ida-ne'e atu hatudu katak husi buat ki'ik, ita viola ona regras ne'ebé iha kona-ba gestão fundo petróleo, buat boot. Tanba ne'e mak sei haree. Sei haree tanba se projeto fó de'it, fó de'it, ida-ne'e ita-nia sistema atu ba to'o iha-ne'ebé, ita-nia Estado ne'e bainhira ita bá ko'alia karik iha li'ur, «Ó lalika mai ko'alia tanba ami hatene katak iha imi-nia rain ne'ebá buat ne'e la'o hanesan ne'e, la'o hanesan ne'ebá».

Índice, sim! Capaz, e tuir índice ne'ebé fó, husi 2007 to'o 2016 Governo tolu ne'e mak corrupto liu iha Timor. Ami bele dehan, sim! Tanba hatama duni membro do Governo sira ba iha-ne'ebá. Maibé, ami la'ós mai atu buka hatama ema, ami mai buka atu dehan katak «Ida-ne'e sala no ida-ne'e loos, ida-ne'e sala». Sala labele halo tan, tanba se ita ba descentralização mak ita kaer sistema sira ohin lora la'o daudauk, ita sei lakon controlo boot tebetebes ba gestão financeira. Ida-ne'e mós atu hatudu katak tanbasá mak iha *virement* oioin nune'e, Ministério ida kaer nia osan husi bens de serviço ba halo ida-ne'ebá, husi fali capital menor ba selu ida ne'ebá, husi fali salário ba fali halo fali ida seluk. Ida-ne'e kona-ba gestão.

Ha'u la'ós matenek boot ida iha finanças, maibé uluk ha'u serbisu iha finanças, tanba ne'e mak conta um mais um ne'e dois ne'e atan oan ha'u hatene. Ho buat sira-ne'e hotu mak ami la critica, ami foti liman, basa liman ba VII Governo, VIII Governo halo buat barak tebetebes, infelizmente la to'o povo tomak nia uma ne'e mak sira mós hili fali ami, sala tiha iha-ne'e, maibé halo buat barak tebes. O

que é que ami haree, tanba sistema monta ne'e iha ami-nia tempo, sistema ida kala aat tebetebes, dificulta ema atu serbisu, ho ida-ne'e mak ohin loron hakarak hatene loloos se osan ne'e ba tiha ona iha ne'ebá, ba tiha Ministério, Ministério tau tiha iha banco, buat ne'e responde ba sé. Se nune'e, se ita hotu halo hanesan ne'e, fundo petróleo, antes de *Greater Sunrise* fó mina no gás mai ita atu fa'an, buat ne'e bele hotu lailais tiha. Ne'e duni, kona-ba finanças, atan oan bele dehan de'it katak importante tebetebes ba consolidação do Estado de direito democrático ne'e hadi'a finanças iha fatin hotu-hotu. Ami sei la buka provas dos factos ne'e atu dehan katak hatama ema ne'e ka hatama ema ne'ebá, lae! Ami dehan de'it, provas dos factos ne'ebé loron ruma ami sei hatudu katak sistema ne'ebé tau iha-ne'e sala boot tanba husik hela osan lakon hela iha-ne'ebá. Tanba ne'e mak até ha'u temi e ha'u sente husi mós vizinho sira dehan: «*Hai, aat boot ida hanesan ó ne'e, oin tuan hanesan ó, muka lama hanesan ó ne'e, o hakarak atu mai auditoria ba ami?*». Atu husu nune'e, se tuir buat ida dehan relatório anual de contas, se ha'u tem que husu buat ne'e: «*Osan gasta 20 dólares ne'e gasta ba saida? Tem que iha documentação buat sira-ne'e hotu, nu'usá mak ida-ne'e ó taka tiha matan?*» Auditoria nune'e de'it hodi bele hadi'a. Iha Inspeção Geral do Estado, tanbasá mak nune'e?; Comissão da Função Publica tanbasá mak nune'e?; Provedoria dos Direitos Humanos e Justiça. Se ita atu serbisu di'ak hela de'it, di'ak hela deit, ah furak loos! Se nune'e, então ita la precisa programa, ita mai tuur iha-ne'e hodi ita ba ukun to'o tiha tinan lima to'o ona, e depois seluk mai fali, no di'ak liu mai *muka baru* oan sira-ne'e para hotu-hotu bele participa iha desenvolvimento Timor nian. Ne'e duni, atan oan haree de'it ba assunto ne'ebé boot liu ne'e mak hatán, hodi buat sira seluk ne'ebé ohin balu temi ha'u kala ikus fali sei fó ba membro do Governo ida-idak ka ida-ne'ebé bele hatán atu hatán.

Kona-ba ASEAN, iha ona, iha ona, lae! Loos duni, ha'u mós temi iha ha'u-nia discurso de tomada de pose, ha'u dehan katak tanba buat ba ASEAN dehan ha'u prepara, atan oan ha'u la'ós ha'u mak prepara, Governo mak prepara uluk kedas ho Secretário de Estado ida ba ASEAN ninian. Maibé, haree katak, sim! ASEAN, ASEAN! O que é que iha é 1400 ka 1500 ka 1600 reuniões por ano, ne'e katak loron ida halo reunião tolu. Ita atu temi ASEAN, tama ASEAN, dala ruma balu, – ha'u la ko'alia tan Tailandesa la ko'alia ida-ne'e, ne'ebe ida besik liu ita – dehan: «*untuk apa tiap hari ada tiga, empat meeting?*» Ne'ebe, iha tomada de posse mós ha'u dehan, sim! Honestamente haree tuir dalan ne'ebé ita percorre tiha ona to'o agora atu ba ASEAN, ha'u tem que dehan katak ita seidauk preparado iha recursos humanos. Atu haruka de'it bá, bele! Bá! Bá loron haat ka lima fila, «*Imi ba ko'alia saida?*», «*Eipaa sira ko'alia buat barak atu mate*», aban fali mosu fali seluk, «*Ai, sira ko'alia buat barak atu mate*». Ne'ebe, ha'u temi iha-ne'ebá, ba ASEAN sei estuda didi'ak iha área saida mak beneficia Timor-Leste.

Atan oan ha'u por acaso bá to'o iha Cambódia foin daudauk ne'e, ho Primeiro-Ministro cambojano, Hun Sen, ami ko'alia kona-ba ida-ne'e. Nia dehan: «*Ami mós atu tama ami sei lori tempo kleur atu mate, hodi estuda oinsá mak ita tama ba hodi buat ne'e fó aproveitamento mai ita*». Ha'u dehan:

«Ida-ne'e duni mak ami-nia problema boot». Ne'ebe, ami dehan tiha ona no ko'alia tiha ona, no nia dehan: «Ami bele simu imi nia ema sira-ne'ebé imi buka atu prepara, mai discute ho ami, para ami hanesan ko'alia ho sira hodi prepara sira para imi bele tama ASEAN, tama iha área saida». Ita la'ós bá tama buat hotu-hotu, ita bá ONU mas ita la ba fatin hotu-hotu iha ONU ne'ebá. Ne'e duni, loos, benefícios saida husi ASEAN mai ita? Benefício saida mak ita atu hetan ho sai membro pleno ASEAN ninian? Ida-ne'e mak sei hala'o 2024, karik 2025 bele tama.

Membro pleno ne'e la'ós katak membro ba buat hotu-hotu ne'ebé iha-ne'ebá ita tem que assina, assina, assina de'it, mas membro pleno katak ho direito pleno atu halo ida-ne'e, atu ko'alia kona-ba ida-ne'ebá, atu participa iha decisões balu. Ita temi nune'e tanba conjuntura mundial halo ita tem que prepara an, labele sadere liu ba iha potência ida-ne'e, labele sadere liu ba potência ida-ne'ebá. Ba ita-nia política externa la iha amigos, la iha inimigos, la iha aliados, hotu-hotu amigos. Lae, tanba rai ida hakarak nune'e, nune'e ita dehan *yes, yes, yes*, ida seluk sai tiha ita-nia inimigo. Ne'e duni, ASEAN importante.

Hanesan mós ita temi CPLP, tanba sira mós dook, ita mós ko'alia ita-nia português ne'e *tetumguês* tan, ne'ebe benefício saida ona mak ita hetan husi CPLP? Saida loos? Husi Portugal oin seluk, husi CPLP saida? Tanba ne'e mak sai membro ba buat ida, sai membro ba buat seluk, ita atu haree to'ok benefício saida mak ita bele hetan husi sai membro ba ida-ne'ebá. Ne'e duni, ha'u la bele responde ba buat hotu, la bele ko'alia kona-ba saida de'it mak ohin temi ha'u hakerek, hakerek, hakerek, barak tebetebes, ne'ebe ha'u-ata kala kona-ba buat sira importante ne'e mak kala para iha-ne'e, ha'u fó de'it kona-ba Finanças, RAEOA/ZEESM, Tasi Mane, ida-ne'e mak ba atan oan ha'u sente katak ida-ne'e mak importante ha'u atu responde.

Ne'ebe, Sr.^a Presidente, ba Deputado sira, karik iha questões kona-ba áreas específicas, se Deputado sira dehan: «Ami hakarak rona, ami hakarak rona, ami hakarak hatene», depois sei bolu membros do Governo iha área específica ida-idak para sira bele mai ko'alia.

Obrigado barak ba Ita-Boot sira-nia atenção.

Sr.^a **Presidente**: — Muiússimo obrigada, Sr. Primeiro-Ministro.

Se permite, sei iha quatro intervenientes ne'ebé hakarak halo perguntas. Ha'u sei husu ba Ita-Boot sira ho resposta de Sua Excelência Sr. Primeiro-Ministro, Ita-Boot sira hakarak halo pergunta ka lae.

Ha'u bolu uluk Sr. Deputado Marcos Soares. Sei hakarak halo intervenção?

Está bem!

Sr. **Marcos Soares** (CNRT): — Obrigado ba oportunidade.

Desculpa, Excelência Senhora Presidente, ha'u la iha pergunta maibé só apreciação de'it. Tanba ne'e ha'u retira. La iha pergunta.

Sr.ª Presidente: — Sr. Deputado, hakarak ko'alia ka retira Ita-Boot nia intervenção?

Sr.ª Marcos Soares (CNRT): — Di'ak, ha'u sei aproveita oportunidade ida-ne'e, ha'u bele hato'o de'it apreciação ba Excelência Primeiro-Ministro, Vice-Ministro no mós ba Ministro sira hotu.

Ami aprecia ho serbisu ne'ebé ho tempo badak bele produz programa ida-ne'ebé ami considera completo, e, iha momento ida-ne'e, ha'u, pessoalmente representa Ermera, seidauk bele fó parabéns, maibé ami sei fó parabéns bainhira ami haree ona realização atividade ka programas iha terreno hanesan ohin menciona iha compromisso n.º 3, ligado ba desenvolvimento estrada, hanesan iha Ermera Tuan ba Atsabe e Maliana, husi Ermera ba Hatolia, husi Railaco ba Aileu.

Ami mós sei hakarak atu resolve estatuto dos professores contratados ne'ebé durante ne'e sira hein, fiar katak Governo ida-ne'e bele responde netik ka halo mudança ba sira-nia estatuto tanba balu mate ona mós sei iha vida hanesan contratado hela de'it.

Iha parte seluk, iha Ermera iha polícia sira balu mós questiona katak sira-nia condições, apoio ba sira-nia serbisu, hanesan carreta, motor, dala ruma manutenção la suficiente atu sira bele hala'o sira-nia knaar hanesan segurança no defesa.

Ha'u hanoin, provisoriamente hanesan ne'e, e obrigado e respeito ba ita hotu, boa tarde.

Sr.ª Presidente: — Ideia ohin di'ak, Sr. Deputado, mas ne'e iha orçamento. Tuirmai mak ita sei ko'alia.

Tuirmai, ha'u mós sei confirma Sr. Deputado Romeu Moisés. Sei hakarak intervém? Quer ou retira, Sr. Deputado?

Sr. Romeu Moisés (CNRT): — Obrigado ba tempo.

Ha'u-nia boa tarde ba Sr. Primeiro-Ministro ho membro Governo tomak, Sr.ª Presidente Parlamento e membros da Mesa, distinto no distinta Deputada sira.

Apreciação geral ba IX Governo Constitucional.

Agradece no congratula IX Governo, ne'ebé lidera husi Primeiro-Ministro, Maun-Boot Xanana, ne'ebé hatudu nia eficiência iha serbisu hodi consegue hato'o ona Programa IX Governo lailais mai Parlamento Nacional hodi halo apreciação no fó nia aprovação tuir Constituição haruka.

Programa ne'e identifica áreas fundamentais chave ne'ebé IX Governo sei investe hodi desenvolve Timor:

1. Capital social – hadi’a povo nia situação iha área educação, saúde, hela-fatin, apoio ba ferik katuas ho faluk sira, atu hotu-hotu bele saudável; jovem barak ne’ebé la iha serviço bele isin di’ak no hetan capacitado atu serbisu hodi acompanha Nação nia desenvolvimento.

2. Infraestrutura – lurón, portos, aeroportos, bee moos sai mós importante ba IX Governo Constitucional,

3. Diversifica no moderniza economia hodi cria indústria no transforma Nação liuhusi setor turismo, agricultura, pesca, pecuária, floresta atu nune’e bele desenvolve indústria iha Timor-Leste; Projeto Tasi Mane ne’ebé sei transforma costa sul, nia efeito sei multiplica iha município hotu-hotu kedas.

Hakarak louva mós Primeiro-Ministro, Maun-Boot Xanana, ne’ebé tau prioridade máxima ba negociação hodi finaliza ita-nia fronteiras terrestres no marítimas ho Indonésia, no implementa tratado fronteira marítima ne’ebé Maun-Boot consegue ona negocea ho Austrália, atu nune’e assegura Timor-Leste nia soberania total.

Prioridade ne’ebé identifica no política ho intervenção sei hasoru duni realidade ne’ebé povo no nação enfrenta hodi hetan crescimento economia 7%, ne’ebé Governo hakarak atinge, bele iha impacto ba sira-ne’ebé kiak liu iha Timor-Leste.

Iha oportunidade ida-ne’e, debate Programa IX Governo, nu’udar Deputado povo nia representante, hakarak atu fó hanoin ba Ministro, Vice-Ministro, Secretário de Estado sira hotu atu tau atenção duni ba implementação programa no assegura duni resultado ba povo.

Husu mós atu halo plano ação ba programa ne’ebé implementa atividade iha setor ne’ebé identifica ona. Tanba programa ne’e documento ida-ne’ebé define política macro hodi guia Governo nia orçamento no implementação, ha’u precisa fó hanoin balu atu inclui iha plano ação ministério sira iha setor balu.

Primeiro, setor educação – precisa hatama *curriculum* hahú iha ensino básico, ensino secundário geral no ensino técnico-vocacional, programa Ciência Tecnologia, Engenharia, Arte no Matemática hodi assegura qualidade husi ita-nia recursos humanos iha mundo ne’ebé digitalizado no usa tecnologia ne’ebé avançado, selae ita hela ba kotuk.

Kaer ba liafuan integrado, atu usa tecnologia, hakarak husu: escola hira iha rai laran tomak, husi capital to’o foho, hahú usa tecnologia *online* ho *laptop* ka *tablet* hodi lori matenek ba povo timoroan hotu? Ho cabo submarino, ita precisa investe iha plataforma tecnologia hodi facilita professores atubele transmite informação no conhecimento iha disciplina oiain;

Setor saúde – política atu reforma laboratório nacional, husu atu considera laboratório hodi assegura qualidade equipamentos no capacidade atu teste moras hotu ho lailais.

Questão saúde importante ba ema hotu no povo labele tau nia vida iha risco. Filipina, Malásia, Brunei, nação ne'ebé fornece recursos humanos competente iha área ida-ne'e no bele fó formação ba ita-nia profissional saúde sira;

Tuir fali mai, desenvolvimento economia – loos duni agricultura mak ita-nia setor produtivo ne'ebé povo bele hasa'e produtividade nacional. Tecnologia, dalan ida ita bela aplica hodi moderniza, aumenta produção no valor ita-nia produto hodi fa'an iha mercado.

Senhor Primeiro-Ministro, tempo to'o ona atu cria micro, pequenas no media empresa hodi bele aumenta produção. Husu ba Ministro Agricultura atu considera modelo ka mecanismo negócio inclusivo, ha'u repete tan «negócio inclusivo» hanesan forma ida ita bele adota hodi envolve uma-kain sira-ne'ebé rai ki'ik hodi tau hamutuk sira-nia produção hodi fa'an iha mercado livre. Negócio inclusivo importante tanba fó oportunidade di'ak ba negócio ki'ik sira ka meéio hodi participa no tau hamutuk produto atu aumenta quantidade, cria cadeia valor hodi bele exporta ba rai-li'ur iha região ka iha comércio global. Ho conceito ida-ne'e fó dalan ba negócio ki'ik ka méio atu participa, selae negócio boot de'it ho contacto no osan boot mak bele halo.

Iha área turismo – husu ba Ministério da Administração Estatal, precisa resolve lailais: ida, lixo iha Timor laran estraga ita-nia imagem no la di'ak ba ita-nia saúde. Iha Díli laran lixo lekar iha fatin hotu-hotu, negócio no população no so'e lixo la tuir dalan. Município Díli la halo gestão ba lixo ho di'ak, método colheita lixo mós la muda ka moderniza ho equipamento foun hodi separa lixo no ajuda atu implementa política reciclagem plástico. Sunu lixo plástico la di'ak ba saúde povo nian, liuliu labarik ho katuas no ferik sira.

Sr.^a **Presidente**: — Conclui, Sr. Deputado.

Sr. **Romeu Moisés** (CNRT): — Ha'u-nia hanoin, como tempo mak la permite, ha'u finaliza ha'u-nia intervenção, obrigado.

Sr.^a **Presidente**: — Muitíssimo obrigada, Sr. Deputado.

Tuirmai, Sr.^a Deputada Maria Barreto.

Hakarak halo intervenção ou retira?

Sr.^a **Maria Gorumali Barreto** (CNRT): — Obrigada, Sr.^a Presidente.

Ha'u retira tanba ohin ha'u acompanha tiha ona resposta husi Sua Excelência Senhor Primeiro-Ministro, claro tebetebes e ha'u hein iha debate tuirmai.

Obrigada barak.

Sr.^a **Presidente**: — Muitíssimo obrigada.

Tuirmai, ikusliu, Sr. Deputado Armando dos Santos Lopes.

Sr. **Armando dos Santos Lopes** (CNRT): — Ha'u retira tanba la iha pergunta.

Sr.^a **Presidente**: — Muitíssimo obrigada ba paciência.

Srs. Deputados, ha'u haree katak esgota. Bele ha'u hatete nune'e?

Sr. Deputado David, quer intervir? Faz favor.

Sr. **David Dias Ximenes «Mandati»** (FRETILIN): — Muito obrigado, Presidente.

Excelência Senhor Primeiro-Ministro, Vice-Primeiros-Ministros.

Ha'u atu halo loos de'it liafuan ruma. Ami-ata mós la'ós dehan katak perito iha área ne'e, mas como ita ohin dehan katak fó hanoin ba malu, ita atu fó hanoin malu de'it, la'ós atu critica malu tan ami-ata sé atu critica fali Ita-Boot.

Ohin Ita-Boot duni mak ko'alia dehan katak dona Emília Pires ne'e corrupta boot, la iha ema ida acusa nia dehan katak nia corrupta boot, nia iha acusação de corrupção iha Tribunal. Nia la'ós corrupta, lae! Porque seidauk trânsito em julgado para ita bolu ema corrupta, porque nia iha direito ba presunção de inconsciência. Só que problema iha-ne'e katak ita la coopera ho ita-nia justiça.

Quando ita desautoriza ita-nia tribunais, significa que ita-nia Estado mós la iha ona. Ida-ne'e mak ha'u atu husu de'it para ita hotu-hotu hamutuk respeita ita-nia tribunais.

Tribunal da primeira instância, karik decide sala, ita halo recurso ba segunda instância, Tribunal de Recurso iha, maibé quando ita desautoriza, depois ita la mosu, ne'e ladún loos!

Iha artigo 91.º Código Penal, iha-ne'ebá ko'alia kona-ba notificações, iha número 4 dehan katak «quando funcionário sira notificado mak la bá, nia iha sanção criminal», quanto mais Ministra ida. Ami la'ós dehan katak acusa, seidauk iha ema ida acusa. Ita tem que evita buat ida sentença através da mídia ou então sentenças na rua, ne'e ladún di'ak! Ida-ne'e mak ita hotu-hotu hamutuk para evita, para reafirma autoridade ita-nia Estado ninian.

Quando ita-nia tribunal sira la iha ona autoridade, significa que ita-nia Estado, hanesan ohin Ita-Boot dehan, «buat ruma la loos».

Primeiro, uluk ita hasai ema magistrado judicial internacional sira, ita-nia timoroan mak julga fali, ne'e mós la di'ak hotu, então ida-ne'ebé di'ak hatudu mai ba para ita halo tuir.

Muito obrigado.

Sr.^a **Presidente**: — Muitíssimo obrigada.

Sr. Primeiro-Ministro, tempo Ita-Boot nian.

Sr. **Primeiro-Ministro** (Kay Rala Xanana Gusmão): — Obrigado, Sr.^a Presidente.

Obrigado, Senhor Deputado David Ximenes.

Ha'u la acusa! Tanba ohin Deputados balu hasai índice corrupção, tanba ne'e mak sira husu prova de fatos quando ha'u dehan katak irregularidades, falta de transparências, corrupção, sira dehan «Ó-nia prova de factos iha-ne'ebé? Ó-nia prova de factos iha-ne'ebé?»

Ne'e mak ha'u temi dehan: «Ami-nia prova de fatos ami sei buka, atu haree dehan la'ós de'it sé mak halo mas sistema ne'e halo ho di'ak lae».

E tuir índice ne'ebé Deputado na'in-rua ka na'in-tolu temi, haree katak husi 2007 mai 2016, membros Governo CNRT ninian ho tan coligação partido, sira-ne'e mak corrupto liu, tanba ne'e mak corrupção sa'e, tanba ida-ne'e mak na'in-rua ka na'in-tolu ba tiha ona cadeia ho buat sira-ne'e hotu, ho tan Emília.

Atu dehan de'it katak Deputado sira iha razão duni tanba husi 2007 to'o 2016 membros IV, V, VI Governo ne'e mak corrupto, tanba ne'e mak iha caso agora ida-ne'e Bendito mós hetan ona notificação atu bá, buat sira-ne'e hotu. Tanba ne'e mak dehan duni índice ne'ebé ohin temi, loos, ami concorda, ami simu, corrupção ne'e husi 2007 to'o 2016, 2017 mai iha-ne'e buat hotu limpo.

Ami respeita justiça, respeita justiça! Maibé la'ós kona-ba osan Estado nian. Maibé, atan oan ha'u uluk *pengacara*, seidauk sai Primeiro-Ministro sai *pengacara* ne'e ha'u, *pengacara* ida, *pengangur tapi banyak acara*. Tanba ne'e mak população mai iha-ne'e, bolu ba iha-ne'ebá, bolu ba iha-ne'ebá, haree ba atuação husi justiça ladún loos, hodi nune'e mak ami dehan katak hanesan problema ida uma iha leten ne'ebá, hanesan uma iha sorin balu ne'ebá, ne'ebe ami fó-sai dehan katak atu hadi'a ne'e tanba povo precisa fiar ba justiça.

Mak ne'e de'it.

Obrigado barak.

Sr.^a **Presidente**: — Muitíssimo obrigada.

Senhor Deputado, se ha'u fó Ita-Boot ko'alia, Senhor Primeiro-Ministro hatán, Ita-Boot ko'alia fali, ne'e diálogo. Ne'ebe, ha'u husu desculpa tanba ohin, ha'u hanoin, responde claramente.

Sr. **David Dias Ximenes «Mandati»** (FRETILIN): — Não! Mas precisamente uma resposta, é preciso, é pertinente!

Sr. **Primeiro-Ministro** (Kay Rala Xanana Gusmão): — Sobre o que?

Sr. **David Dias Ximenes «Mandati»** (FRETILIN): — Respondo já.

Sr.^a **Presidente**: — Se nune'e, Senhor Deputado, ha'u fó um minuto para concluir, pode ser?
Obrigada.

Sr. **David Dias Ximenes «Mandati»** (FRETILIN): — Senhor Primeiro-Ministro ohin temi kona dehan katak ita-nia justiça halo sala ne'e mak Ita-Boot sai *pengacara* iha uma iha leten ne'ebá.

Senhor Primeiro-Ministro, buat ne'e, quando primeira instância ita la contente, Primeiro-Ministro, por favor recorre ba segunda instância, Tribunal de Recurso, labele halo impedimento hanesan ne'e, ne'e Ita-Boot rasik mak constrói Estado ida, ne'ebé Ita-Boot rasik mak desautoriza Estado ne'e rasik.

Muito obrigado.

Sr. **Primeiro-Ministro** (Kay Rala Xanana Gusmão): — Ho polícia, ho *Land and Property* bá hasai sasán husi uma sira-ne'ebá, harahun hotu tiha ona, ha'u labele ba protege povo? Sala?

Sr. Deputado David Dias Ximenes hatán katak sala duni.

Sala?

E depois rai-na'in dehan katak ne'e ninian, ida-ne'ebé bá reclama, serbisu iha Justica ba reclama ne'e la iha relação sanguínea ho rai nia na'in ne'e. Desculpa, Sr. Deputado, desculpa tebetebes.

Sr.^a **Cedelízia Faria dos Santos** (CNRT): — Ponto de ordem, Presidente.

Sr.^a **Presidente**: — Srs. Deputados, ita debate tiha ona liga ho Programa do IX Governo. Se ita ponto de ordem, ha'u suspende ita ba *snack* tanba, ha'u hanoin, esgota ona, ne'ebe ita fila mai ha'u sei fó ba cada bancada atu hato'o sira-nia hanoin e ita bá votação.

Ne'ebe, ita *break* ba *snack*, 15 minutos.

Sr.^a **Olinda Guterres** (KHUNTO): — Do que hatán malu nafatin, di'ak liu ita ba *break*.

Intervalo.

Retoma fali sessão.

Sr.^a **Presidente**: — Bele hola fatin para ita continua ita-nia sessão.

Srs. Deputados, ha'u hanoin, iha número 12 hatete nune'e, iha ita-nia guião: «O debate termina em cada dia quando não houver mais pedido de palavras ou estiverem esgotados os tempos globais atribuído, podendo a Mesa determinar caso se justifique no último dia de debate a atribuição de tempos adicionais a cada uma das bancadas parlamentares e ao Governo».

Tanba ida-ne'e la acontece, ha'u bá liu kedas ida número 13, «No final do debate, a Mesa dá a palavra aos líderes das bancadas parlamentares e ao Primeiro-Ministro para querendo proferirem uma declaração final pelo tempo máximo de 10 minutos cada».

Não, hein lai ha'u husu, ha'u husu! Se ita hakarak, tanba ne'e mak ohin ha'u lê, tau *headseat* para rona, selae ita la entende malu, por favor.

Tanba ne'e mak ha'u lê ne'e ha'u fó ba Ita-Boot sira. Se lakohi, ita bele continua! Mas, como la iha pedidos, ha'u conclui katak ita esgota ba ohin. Mas se ainda tem...

Iha Deputado balu halo estrondo.

... espera, não é hoi, hoi.

Ne'e mak ita tem que rona malu. Se hakarak Ita-Boot sira inscreve filafali o que é que querem falar, faz favor tanba ita tau loron tolu. Mas, como la iha registos ou dá para concluído ohin mak ita la iha tan intervenção, ita bele fila, aban mai fali e Ita-Boot sira regista para halo fali intervenção. Pode ser?

Então ha'u fó ba líderes das bancadas atu pronuncia, está bem?

Hahú husi Senhor Presidente da Bancada da FRETILIN, pode ser? Para pronunciar alguma coisa. Faz favor.

Sr. **Aniceto Longuinhos Guterres Lopes** (FRETILIN): — Concorda, la iha objeção, Senhora Presidente. Maibé por cada dia, para bele sukat katak tempo ne'e esgota, Deputado sira inscreve ka la inscreve, tem que iha prazo ida-ne'ebé limite.

Por exemplo: to'o 12h00 tem que iha ona inscrição hotu, se liu ona 12h00 mak la iha ona inscrição, é considera esgotado, ne'e mak ita la iha, guião la define ida-ne'e. Então, aban se ita começa, ita tem que anuncia kedas, prazo ba inscrição ne'e to'o 12 horas, por exemplo, avisa kedas ona. Liu 12h00 mak la iha tan inscrição, é considerado esgotado, ita bá fali fase seluk.

Obrigado.

Sr.^a **Presidente**: — Muiíssimo obrigada.

Tuirmai, ha'u fó mós ba Bancada do PLP.

Sr.^a **Maria Angelina Lopes Sarmiento** (PLP): — Obrigada, Sr.^a Presidente.

Ha'u secunda ho Presidente Bancada da FRETILIN nian, ita tuir guião karik ba grelha ne'ebé atribui ba cada bancada, como ohin ita utiliza ona e quase menos ba daudauk, então ohin ita bele suspende para aban ita continua e, ami-nian tanba iha de'it dois minutos, então ami hakarak compila hamutuk ka aumenta tan ba ida aban nian para ami bele iha minuto barak tan.

Obrigada.

Sr.^a **Presidente**: — Tuirmai, Bancada do KHUNTO.

Sr.^a **Olinda Guterres** (KHUNTO): — Boa tarde ba Sr.^a Presidente do Parlamento Nacional, ba colegas Deputados, ba membros do Governo no ba Sr. Primeiro-Ministro.

Bancada KHUNTO lakohi secunda, iha hanoin para ko'alia. Então mak ne'e, la iha objeção, quando la iha registo, *berarti* la iha, di'ak liu ita encerra, aban ita continua 9h00 até 12h00 hotu.

Encerra agora para ita mós bele ba descansa uitoan, hola malirin uitoan iha li'ur ne'ebá, hemu café ruma, aban mak ita tama fali mai, começa 9h00 até 12h00.

KHUNTO nia hanoin ketak, ami-nia ema mós ohin ida la ko'alia, na'in-rua la ko'alia, hakarak aban fó tempo ba sira ko'alia uitoan mós.

Obrigada.

Sr.^a **Presidente**: — Ne'e mak democracia, Sr.^a Deputada. Tanba ne'e mak ha'u husu ba hotu-hotu atu ko'alia molok ita encerra ohin nian. Ne'e ga?

Ne'ebe, la bele huuu haaa. Tanba ne'e mak ha'u fó oportunidade ba hotu-hotu atu pronuncia.

Tuirmai, Bancada do PD.

Sr. **António da Conceição «Kaloan»** (PD): — Sr.^a Presidente, loos! Se ita haree ba grelha ne'ebé iha, Bancada balu tempo la iha ona. Sira kala iha, maibé limita tiha fali ba tempo ne'ebé fó iha grelha, então halo hotu-hotu iha hela reserva.

Ha'u hanoin, di'ak liu ne'e ita suspende para nune'e aban fó continuidade e ema bele mai ho pensamento ne'ebé mais cooperativo. Tanba programa ne'e ba cinco anos, ne'ebe ita tem que ser hanoin didi'ak hamutuk.

Obrigado.

Sr.^a **Presidente**: — Muito bem.

Ikusliu, Bancada do CNRT.

Sr. **Duarte Nunes** (CNRT): — Sim, Sr.^a Presidente.

Ha'u hanoin, ha'u secunda colega sira tanba balu sei iha e sira seluk ne'ebé que la iha ona, ha'u hanoin, tempo mak ne'e ona, hotu ona. Se aban mai mós sira-nia tempo mak ne'e de'it ona.

Ne'ebe, ita fó oportunidade para aban sira usa sira-nia tempo atu ko'alia.

Obrigado.

Sr.^a **Presidente**: — Srs. Deputados, ida-ne'e esgota ba ohin. Nos outros dois dias também vai ter a mesma contagem, tanba se Ita-Boot sira haree, iha total 30 minutos, ita iha 6 horas e 30 minutos por dia, ne'e máximo. Mas, como esgota ou ohin balu zero, ita suspende, aban ita hahú filafali com uma nova contagem, a mesma grelha para amanhã. Está bem?

Hodi nune'e ho respeito tomak, Sr. Primeiro-Ministro ho membros do Governo tomak, distintos e distintas Deputadas, ita encerra ita-nia sessão ba ohin e aban ita hahú tuku 9, *on time*.

Audiência tomak mak ami respeita, até amanhã.

Sr.^a Presidente encerra sessão plenária ne'e iha tuku 16 liu minuto 37.